

近代中國史料叢刊第二十二輯  
沈雲龍主編

湘軍水陸戰記（卽湘軍志）

王闔運著

文海出版社印行

湘  
軍  
水  
陸  
軍  
紀

此書即王闓運湘軍志

乙酉仲春月京  
都同文堂石印

湘軍水陸戰紀序

吾友虞山鮑舍人叔衡隱滬上有遠略棄帖括小家書凡經世有用文字能如國語國策者銳資獨播不尠余甚躑之丙戌五月過申叔衡又得曾文正湘軍水陸戰紀四卷底稿示曰此非今之國語國策者乎翻閱一過徐應曰然後十月僑寓雲間叔衡將此書石印告成郵寄囑序余喜叔衡勇於任事遂爲文以壯之曰古稱作記以柳州爲絕詣然柳州之紀紀遊也山紆石折路曲巖幽無一複沓空泛之境令讀者心迷神往詫爲奇觀豈山水果於斯而絕歎抑亦記者之筆有以幻之也若紀戰而亦隨意點綴涉筆成趣可乎吾讀水陸戰紀而知曾文正創湘軍首團練盡起湖湘非常之士雲集響應縱橫天下卒平大難凡所經行省紀其勝績共一十六篇若不經意隨筆點綴亦若柳州紀遊刻劃山紆石折路曲巖幽無

一復沓空泛之境使讀者旌旗炫彩如在目前嗚呼何其神也夫能戰而能紀者文正之學問也戰無不勝勝無不紀者文正之謹慎也余常箬約言曰我朝自髮逆創亂以來惟服曾文正胡文忠駱文忠三公爲今世瑜亮而曾文正之學問胡文忠之經濟駱文忠之策畫皆天予之且曾文正用力於謹慎胡文忠用力於果決駱文忠用力於靜攝各有心得故能出險履夷驅瘴掃氛如遊山者之穿雲踏霧曲疊成趣不待勉強然胡駱二公遺集薨後始傳惟曾文正乃能自紀其篇未及薨而藁已脫非胸有學問以致力於謹慎何能自立不敗之鄉而偉茲經世大文哉若夫柳州之筆以紀遊而神不知文正之筆以紀戰而神以遊而紀眼中預有此境以戰而紀眼中非預有此境以無境而若預有此境如尋溪問壑忽而山重水複忽而柳暗花明天然變幻故紀戰較紀遊爲更神矣紀戰而偶紀一勝

之戰爲意中事必其屢戰屢勝而盡紀之無一彷彿則非意中事而必期諸意中假戰陣以宏其文者是湘軍戰紀一書其爲天地之大文古今之至文萬世之傳文也奚疑又兵法曰兵不厭詐考古今七十餘家未有堂堂正正如曾文正者而文正歷軍十餘載所向皆捷無壬遁風角詭譎之術以炫異耳目此文正所以得稱爲正抗絕前古者以此惟其正故無復沓空泛之戰亦無復沓空泛之紀陰陽開闔順天理之自然協人心之同然而其文當駕國語國策而上之是爲千古戰紀之祖學者當讀其文慕其行如蘇季子獲陰符簡練而揣摩之其有資經世之學不淺此正今之國語國策者豈紙上談兵諸子所能望其肩背哉功名顯於天下文章傳於後世文正之賢所以獨隆千古矣余甚敬之佩之私淑之余生也晚惜未親炙其門爲成材之選深以爲慨茲讀其集益嘉叔衡勇於任

事之意蓋爲之代其說以遍天下

光緒十二年丙戌冬十月上澣永川宋楫志於雲間蝶仙館

湘軍水陸戰紀總目

卷一 湖南防守篇

卷二 曾軍篇

卷三 湖北篇

卷四 江西篇

卷五 曾軍後篇

卷六 水師篇

卷七 浙江篇

卷八 江西後篇

卷九 臨淮篇



卷十 援江西篇

卷十一 援廣西篇

卷十二 援貴州篇

卷十三 川陝篇

卷十四 平捻篇

卷十五 營制篇

卷十六 籌餉篇

湘軍水陸戰紀總目終

湖南防守篇第一

自古言軍勢者多侈言形勝要害積疆弱之故然其實非也項羽繆言郴爲天下上游湖南自郡縣以來曾未嘗先天下 國朝移行省於長沙復漢國制控扼十六大城以苗防故鎮守頗有精兵出征四方至其材賦全盛時才敵蘇松一大縣院司之選在直省下等咸豐初元巨寇洪秀全自全州出永郴圍省城掠舟洞庭遂連破名省天下莫能當 文宗憂之詔湖南治團練善後以鄉人副巡撫湘軍始萌芽矣方圍城時官吏倉皇治軍劣愈於武昌安慶其後湘軍日彊巡撫亦日發舒體日益尊至庭見提鎮易置兩司兵餉皆自專湘軍則南至交趾北及承德東循湖汀乃渡海開臺灣西極天山玉門大理永昌遂度烏孫水屬長江五千里擊柝聞於海自書契以來湖南兵威之盛未有過此者也無他故事滅洪寇之功耳然而洪寇之盛則亦由湖南始始合圍而縱之後起偏師追而殲之豈天數邪一二人謀力之所致也道光三十年五月庚戌廣西亂始上聞其時慶遠平樂潯州在在劫掠而名者陳亞貴廣東英德盜掠浚光戕守備走懷集湖南始戒嚴駱秉章爲巡撫九月 詔徵鎮守兵二千詣梧州從兩廣總督進征起李星沅於長沙授欽差大臣專赴廣西又 命秉章出境防勦秉章奏省城居中宜鎮定且飭邊吏屯戍十二月陳亞貴平乃討金田金田村者潯州倚郭桂平縣地前史所稱大藤峽也其西則武宣貴縣土客民自來襟居相讎姦民楊秀清利客豪資說令求土民女爲妾又自至土家激撓之因勸豪劫女使相攻燒衆

無所歸秀清則悉劫之以叛有衆數千惡自倡亂乃投金田合於洪秀全自明末西夷人以數算新法訖  
中國因得布其祿教愚民傳奉世代祕守婦女尤惑之秀全亦假以招誘懼官吏訛索遂拒險屯結秀清  
至自言通天語秀全當爲天兄咸豐元年僭號天王出掠旁縣廣西巡撫周天爵提督向榮將萬人并前  
發諸軍四千餘人圍之大黃江星沅天爵不相下奏請統帥大學士賽尙阿帥二都統將四千五百人駐  
湖南爲聲援四月 詔賽尙阿代星沅星沅薨寇自武宣潰圍東北走象州秉章奏言湖南防兵四千餘  
前 詔提督余萬清出境會攻力不足 命總督程喬采行邊六月寇還武宣八月潰圍大破巴清德軍  
東走藤北犯永安陷之余萬清母喪解官留營九月鮑起豹爲提督屯江華二年二月永安寇潰圍直北  
趨陽朔四總兵敗死遂圍廣西省城余萬清將千人往援屯北門三月郴盜劫餉銀殺知州胡禮箴四月  
寇解廣西省城圍東北陷興安全州撤七千人追之以和春將壬寅寇入湖南境將趨永州阻水退走道  
州余萬清先還守道州城總督駐衡州聞寇遽乘舟北走萬清亦棄城不守乙巳道州陷巡撫委事總督  
總督聞永州寇退復還衡州六月庚辰朔賽尙阿移駐永州合兵二萬餘人圍寇道州檄鮑起豹還長沙  
丁亥寇分陷江華殺知縣劉興桓壬辰陷永明丁未陷嘉禾戊申陷藍山七月己酉朔陷桂陽州知州李  
啓詔走死庚戌陷郴州殺知州孫恩保 詔罷駱秉章遣治余萬清以羅繞典治軍長沙料兵唯二千餘  
人練勇三千餘人巡撫張亮基未至總督程喬采託衛防不來秉章繞典方議築土城禁謠言未能謀兵

事也寇既陷彬疑府往己未走永興殺知縣溫德宣分黨踞之大軍悉移永興蕭朝貴者以膽謫自奮謂  
羣寇逼懷獨率千餘黨謀襲長沙繞山道東北行百九十里掠安仁丙寅陷之北犯攸丁卯陷之遂過醴  
陵丙子至省城南十里止城中料寇當從耒衡正道來民走報寇至怒其無公文執將斬之石馬鋪屯將  
尹培立以潼關副將率陝西軍千人倉卒拒戰陝軍不慣稻食所屯地無麪皆買之城軍未朝食相持  
一時許皆潰散培立死之於是潰軍或走城中巡撫方巡城乃遽還塞南門然猶不知何軍潰敗城外居  
民亦不知寇已至蕭朝貴設幕城南有楊生者誤以爲達官上謁獻策朝貴領之俄而寇將至怪問何人  
朝貴曰此楊先生條程事者生覺蒲伏幕後踰山走而寇望城東南隅高樓以爲城樓趨之則非門返而  
南門塞城中乘城分守矣寇據郭外民居不知所以攻但發礮擊城礮丸及城中街有賣漿者方食而碎  
其盃城中大震或議發城上大礮擊之或曰無礮臺必驚崩城垣不可輕也寇至之日城中兵勇八千餘  
統將數百名隸巡撫巡撫不敢言節度諸生及舉貢各自請領百人或二十人佐巡堞口多詣羅繞典言  
事布政使恆福內召潘鐸代之未至署司道周顥張其仁等莫敢與兵餉大議惟善化知縣王葆生頗好  
言兵諸大吏將帥亦莫之問也鮑起豹居城南樓迎城隍神大像與對坐張亮基已至甯鄉界聞警還屯  
常德集兵八月壬午鄧紹良將楚雄兵九百入屯南城始發礮擊外寇潘鐸至步巡城中令居民商賈各  
安業無恐城中被圍七日亦稍自定 詔奪賽尙阿程喬采官以徐廣縉并代之促向榮赴援向榮自四

月初稱疾居桂林賽尙阿深劾之罪至遣戍榮終不起聞賽尙阿罷乃疾行癸巳至丁酉張亮基至己亥  
駱秉章解任留居城中庚子彬寇悉趣長沙益募礦夫穴城根九月丙辰賽尙阿至諸援師大集近五萬  
矣向榮不樂居城中以寇渡湘亦率所部渡湘爲屯時獨搏戰不利諸軍相視莫往城南戰事主於和春  
屯白沙井自以扞遏爲功而江忠源以偏師與合屯或以爲忠源之謀然寇與官軍均踰伏屯內屯外一  
里行人來往自如入城者唯避南門其餘六門皆可窺以出入衢巷間婦女娛遊酒食過從盛於平時若  
忘其爲圍城焉丙子南城地雷轟發城崩四丈鄧紹良部軍方集天妃祠攤錢博戲紹良獨拔刀當城缺  
斫先登一人者顛部軍聞之皆棄錢奔城缺寇不敢上練丁輦木石塞缺口城守復定十月己卯地雷再  
發不及城垣甲午地雷發城崩八丈瞿騰龍拒缺口寇復退走於是徐廣縉方止湘潭議者以爲合兵腹  
背擊寇可殲也而巡撫群官以爲賽尙阿在城中廣縉不宜來逼之其前軍將福興寔來乙未夜半寇渡  
湘西走丙申城上調寇屯疑空虛有呼者曰賊去矣將帥聞報皆愕且懼無敢言賀而僚吏士民相慶論  
功不復問寇所往張亮基奏請防湘潭徐廣縉以爲寇走甯鄉遣兵南防湘鄉故寇收罷衆從容以去或  
曰和春軍士賈縱之或曰非也寇不畏官軍安肯賄之戊戌寇破益陽掠船出資口十一月己酉破岳州  
岳州之防以土人領漁船五百柵土星港遏諸商賈民船萬數寇至漁船散走悉掠兩岸人船寇勢自此  
盛矣諸將唯向榮遣兵尾追陣亡副將紀冠軍湖北提督博勒恭武道員王東槐將八百人防岳州寇至

與府縣官俱走 文宗悔用徐廣縉嚴詔切責廣縉知事必敗遂益逗留與人書自言屏息以待雷霆湖  
北巡撫常大滄奏留江南提督雙福助守悉斂兵入城寇以故水陸長驅十二月己卯湖北省城陷辛丑  
逮治徐廣縉以張亮基署總督潘鐸署巡撫羅繞典以雲貴總督防荆襄會國藩以在籍侍郎幫辦團練  
丁亥遣江忠源討瀏陽土寇方省城之被圍也瀏陽廩生王應璜得周國虞通寇書國虞懼殺應璜言官  
發其事事下巡撫張亮基稱豫未敢發周國虞者忠義堂盜魁也忠義堂自承平時有之劫掠私門陰署  
徒黨歷年不能治亮基畏其衆初作奏以爲不足煩兵已而跂足臥且思躍起曰決矣乃遣忠源忠源初  
至國虞以爲兵少易與遽襲其營官軍出衆駭退遂逼其巢下令良民投營領牌者貸死其夜解散數千  
國虞走江西斬其黨衆十餘人湖南討土寇自此起三年正月丁未寇棄武昌東下壬戌陷安慶張亮基  
至湖北治軍奏以江忠源自隨是時會國藩始至省城議練軍城中守兵四千將領多者統五百人少或  
百人以游擊色欽額總營務練勇成軍者有南勇瀏勇楚勇寶勇湘勇率以文員領之而同知王葆生官  
最大餘悉用生監新田張榮組以知州在籍頗被擢用有事輒令將以往道員張其仁爲總巡而夏廷楹  
裕麟爲委員魏翰練得與謀議二月寇連陷江甯揚州益趨東北潘鐸奏撤兵二千餘人留沅州兵千七  
百防省四月鐸病免騎乘章自湖北移撫湖南江西上猶土寇犯桂東廣東陽山土寇犯宜章臨武永興  
土寇起掠安仁並遣夏廷楹率張榮組往討之軍至寇解散國藩奏重懲內姦因以便宜捕斬姦民胥隸

甚衆以劉長佑王珍將練勇州縣上言積盜拒捕者輒以兵往衡山新田劫盜起皆討禽之又令在城官  
兵月六會操以署參將塔齊布訓練勤特奏遷一階令兼領練軍五月廣西興安恭城寇起犯永明江華  
藍山臨武零陵永桂官兵拒討之酃縣衡山姦民復相扇動張榮組羅澤南往捕之江甯寇分黨掠江西  
圍省城別遣寇黨沂江陷安慶江忠源自湖北率所部軍入南昌助守請援於湖南秉章國藩以楚勇最  
有名檄寶慶知府魁聯募二千人益以湘勇千人鐘尊辰沅兵六百人遣夏廷樾朱孫詒各統之而羅澤  
南實主其軍純用其弟子領營哨別用忠源弟忠淑率楚勇先進期會於瑞州忠淑軍於道潰散廷樾等  
至南昌一戰不利諸生死者七人收衆入城忠源以新軍不可用令往吉安擊土寇七月廣東樂昌寇犯  
興甯王珍拒走之八月南昌圍解援軍還江西太和寇陷茶陵王葆生塔齊布王珍合討之寇進陷安仁  
殺訓導吳棠尋退走鮑起豹以南昌圍故入城治防惡塔齊布之爲會國藩用也長沙協清德因而間之  
縱提標兵圍國藩行轅國藩走免遂移駐衡州語在會軍篇九月湖北防江軍潰於田鎮張亮基免吳文  
鎔爲總督廣東英德寇犯宜章周鳳山儲致躬拒走之十月常甯土寇闖入治滅殺典史吳世昌把總許  
得祿遂走嘉禾殺把總邵定太圍攻藍山圍總孫紀良鍾良欽等拒戰死儲致躬張榮組破走之十二月  
江忠源死於廬州始議大集兵援湖北

四年正月乙卯總督吳文鎔敗死黃州以台湧爲總督寇自武昌犯岳州巴陵知縣朱元燮死之二月乙

亥寇陷湘陰西從陸道犯甯鄉曾國藩自衡州率水陸大軍浮湘東下聞寇至遣儲致躬往援甯鄉壬午甯鄉陷致躬聞警馳赴之衆議以寇盛宜止屯致躬曰賊不取正道而旁出必人少也自吾領軍皆擊土賊今遇大賊不進何以率衆及至寇方縱掠致躬軍見寇少遂驅之寇驚走出遇掠者還相擠致躬軍屯城外獨率十餘人卒與寇遇戰死南門羣寇傳相告官軍當來即夜引去湘陰岳州寇聞官軍大至亦俱北還賂乘車遣朱孫詒王珍率三千人出通城攻蒲圻聞寇復至收集保岳州三月丁未寇大上圍岳州國藩軍亦至屯南津戊申岳州軍潰退寇從而上軍還省城寇踞靖港再陷甯鄉敗湘軍三營甲子陷湘潭省城上下皆寤屯巡撫提督委戰事於曾軍四月庚午國藩自攻靖港寇不利布政使徐有壬按察使陶思培會詳巡撫請奏劾侍郎曾國藩且先罷遣其軍巡撫不可城中亦不復設備辛未塔齊布大破寇於湘潭丙子湘潭靖港寇俱退走踞岳州巡撫提督上功而曾國藩請罪有 詔詰責提督鮑起豹以專閔大員不聞出戰惟會銜奏報即日免官以塔齊布署提督塔齊布以都司署守備僅二年超擢大帥新從湘浦立功歸受印之日文武民士聚觀相歎詫雖起豹倖從亦驚喜以爲 皇上知人能任使軍氣始振焉是時依故事提督列銜在巡撫前曾國藩以事降黜銜名又在巡撫後而塔齊布謹事國藩自比於列將徐有壬等皆詣國藩賀且謝罪 詔令國藩擇司道大員隨營主餉有壬等惴惴恐在選中國藩笑謝之謂所親曰此輩怯懦徒敗吾事雖請同行吾固當止之況不欲平乃修船選士合謀渡湖五月岳州



寇常德分陷龍陽澧州援軍將周鳳山胡林翼李輔朝等自龍陽退保益陽水軍方艤船不能救常德知府景星副將富勒敦同知李春暄武陵知縣朱元增死之寇留屯十五日六月戊辰朔棄城北走時武昌聞久湖北巡撫琦寧以請援就餉爲名南走長沙己巳武昌陷湖南聞飢民避寇從琦寧來者萬數人心皇怖乘章運米往迎之則潰兵數百飢悴無人色青寧至長沙留數日西保荊州 詔斬以徇台灣免楊需爲總督庚辰提督塔齊布從曾國藩出師進攻岳州署寶慶知府魁聯以習兵事 特補岳州知府與胡林翼各將兵勇繼進署提督多順還屯常德遣江忠淑趙盾玉等自平江出攻通城七月乙卯塔齊布大破寇於岳州禽寇將會天養烏之目三日猶視武昌羣寇聞之爲齋醮三日閏七月戊辰朔克岳州甲戌江忠淑等收浦城廣西土寇侵郴桂永州邊以王珍周雲耀防江華王葆生李輔朝防郴桂恭城寇犯全州增設陳立紀江忠濟防零陵東安八月己未曾國藩水陸軍克武昌漢陽湘軍自此名顯連州寇犯臨武參將趙永年拒走之仁化寇犯桂陽乳源寇犯宜章滋陽寇犯道州江華甯遠嘉禾王珍周雲耀及游擊駱元泰等先後合擊寇散走出境十一月駱秉章奏劾署提督多順庸劣落酒罷之自此軍事奏報專於巡撫五年正月總督楊需黃州師潰曾國藩分水軍還援武昌餉道阻絕水陸軍將胡林翼李孟羣彭玉麟等皆仰資湖南大發船礮火藥銀錢拯之仁化寇陷桂陽趙盾玉拒戰寇棄城還避富川寇屯聚縣城王珍周雲耀出境攻討不利二月庚戌王葆生等攻廣東連州寇破之收其城湖北省城復陷三

月富川寇入犯永明王珍等自江華馳擊破之貴州寇起鎮遠沅晃戒嚴是時諸軍專備廣東邊廣西防以委永州知府黃文琛岳州防以委魁聯辰沅防以委永順知府翟誥惟以不請兵餉者爲能事魁聯慙直好爭議秉章弗善也會詔補魁聯按察使不令還省受印魁聯自以奉特簡徑還省城秉章因劾以委軍仍降知府幕客左宗棠雅善衡永道文格文格時擢廣西按察不欲往因奏以文格署按察使翟誥權辰沅道但張戰功且募資助軍不以煩院司故尤重翟誥奏補實授論薦甚力長沙知府倉景恬以失察盜鑄爲巡撫所持奉令最譴巡撫專聽左宗棠宗棠以此權重司道州縣承風如不及矣守令能者朱孫詒知寶慶陸傳應知衡州及東安賴史直湘潭孫坦澧州胡鑄湘鄉唐逢辰邵陽邵綬名雖清濁有別皆敢於爲政省城大政則鹽道孫麟委員王加敏得與操縱之柄自餘司道拱手而已於後論軍政吏治者推湖南而謗議亦自此起四月總督楊霽免以官文爲總督趙昀玉出境攻樂昌至平石南遇寇敗死寇犯宜章王葆生軍潰富川寇犯零陵陷東安執知縣賴史直五月宜章寇掠臨武嘉禾增黨襲郴州陷據之王葆生等軍保永興衡陽土寇起文格遣軍合湘鄉團丁捕討寇黨破散六月通城寇入岳州邊殺臨湘知縣姚榮卿湘陰長樂團丁出新牆遇之寇退通城郴寇分陷桂陽州州民結團自衛湖南民團平江湘陰桂陽州列縣無與爲比魁聯旣罷以知府張永寶領其軍永寶辭復劾免之悉以軍隸江忠濟七月攻寇蒲圻之羊樓敗退岳州以劉長佑募千人助王珍攻東安東安寇陷已三月王珍初以八百人

至寇空城出走珍屯城北江忠淑屯其東軍中無故自驚寇更還攻圍珍營戰不利俱東退四十里屯井頭墟寇復入城踞守長佑至與珍合進八月辛卯朔寇分走新甯全州長佑援新甯珍追餘寇復東北走祁陽于道破散癸巳榔寇分掠甯安仁邊癸卯陷永興甲辰陷茶陵永興寇分黨旁掠官軍悉屯茶陵省城戒嚴九月羅澤南自江西還軍援武昌江忠濟出軍會之收通城茶陵寇走江西永新分掠酃縣王葆生等收茶陵王珍攻桂陽州陳士杰率團丁助之收州城移軍攻郴十月澧陽寇犯永明周雲耀入城城守十一月癸亥城陷雲耀自到死甲子桂陽餘寇犯甯遠趙永年拒之下澧墟力戰死之永年雲耀皆起行伍領營兵號有智畧至是俱死營將中無復知名者始專用練勇矣乙酉榔寇西走永明王珍劉長佑等分軍追破之珍收永明寇陷江華長佑還師衡州十二月壬辰貴州苗寇陷晃州圍沅州遂陷麻陽官軍躡之俱退走

六年正月戊辰江華寇棄城走王珍要擊破之茶陵寇陷吉安江西列城盡爲寇踞曾國藩居南昌軍報阻絕 詔湖南出軍援應以劉長佑蕭啓江出醴陵瀏陽己亥克萍鄉四月江忠濟攻寇通城遇伏軍潰忠濟敗死湖北巡撫胡林翼遣軍援江西道崇陽聞敗進屯蒲圻要寇破之軍進至瑞州寇復入掠平江湘陰前隊及長沙北界掠醴陵攸縣茶陵走江西遣王珍屯岳州丙子援江西軍克萬載九月辰沅軍出境援銅仁十月丁酉王珍軍出境收通城乙亥援江西軍克分宜十一月壬午朔克袁州癸卯胡林翼帥

湘軍克武昌漢陽王珍軍還屯岳州十二月己未援江西軍克新喻遣趙煥聯等自茶陵收江西永甯余  
星元等自鄱收江西永新蓮花兩劉拔元等自桂東收江西崇義上猶

七年正月廣西寇起興安靈川二月陷柳州遣永州防軍二千二百人隸蔣益澧別募千五百人援廣西  
曾國藩以父喪還湘鄉增遣王珍軍助劉長佑攻臨江四月援貴州軍收錦屏五月劉拔元等軍收龍泉  
六月王珍軍收樂安援貴州軍收永從七月湖北湘軍將劉騰鴻攻瑞州中敵死復瑞州蔣益澧克興安  
八月壬子王珍卒於樂安十一月乙酉援廣西軍將黃輔鼎彭玉山攻平樂中敵死蔣益澧克平樂十二  
月乙卯劉長佑薨啓江克臨江是年援軍四出境內無警乘章以軍餉不給始清釐漕糧浮折減納價駁  
官吏中飽裁監司例取省費億計計漕折最重者湘潭恆廿五千而納一石今乃三千八百而納一石若  
市價米石二千則以一千充軍餉以八百供縣用民減賦而國用增其後湖北江西皆仿而行焉知縣費  
漕既方在告乘章躬造其館起之下檄令知湘鄉不由漕司文格大驚愠然無可奈何賴史直失城當議  
罪而更奏薦後晉補岳州知府於是文法拘格悉破矣又案揚州例推商貨貨釐設釐金局自爲收支以  
裕麟總之藩司列銜盡行莫能問其數局庫之儲倍於舊庫乘章亦自以廉儉率下文格亦無所求取故  
威行於府縣貪靡之風幾革

八年正月丙午援江西軍克新淦劉長佑以疾歸三月庚辰援江西軍收宜黃崇仁四月壬子湖北湘軍

將李績實克九江乙丑援江西軍克撫州己巳克建昌蕭啓江以疾歸五月戊子援廣西軍克柳州時江西寇悉走浙江寇帥石大開能合衆六年與章昌輝謀殺楊秀清未發秀清遣之出江西昌輝敗獨還江甯殺秀清及其黨二萬大開聞變還昌輝並欲殺大開大開走因殺其母妻洪秀全又殺昌輝而召大開大開不敢還遂爲流寇貪連大衆不能剽疾避官軍而行黨衆恒數十萬故不能久屯踞援軍旣進江西無寇乘章念兵合不易當遂入浙以滅寇爲期長佑啓江先後歸恐遂不樂軍事因奏請起復曾國藩奏下而 詔至促國藩援浙兩湖供餉乘章議以劉藩軍屬之及王珍舊部張運蘭軍俱留在江西吳國佐者左宗棠所拔用方屯省城外爲中營六月丙辰遣從國藩發長沙八月胡林翼以母喪還益陽戊午援江西軍將趙煥聯等與曾國荃克吉安石寇復自福建犯江西陷瀘溪金谿安仁崇仁宜黃劉長佑至撫州拒防九月破之新城寇還走福建長佑軍以疾疫還十月壬戌李績實敗死三河援貴州軍解黎平圍進攻古州 詔起復胡林翼仍爲湖北巡撫曾國藩改援安徽石寇復出江西蕭啓江至軍遣拒之贛州吳國佐罷還以曾國荃吉安軍及張運蘭軍從國藩屯宿松

九年正月石寇自南安陷桂陽縣蕭啓江躡之二月寇陷宜章興甯郴州桂陽州所過人馬連行六日夜湖南震恐寇將規衡州自桂陽州取間道出花園堡陳士杰軍數百扼七孔橋殊不知其大至卒相遇遂憑橋發敵寇亦不知有軍於此愕而止未退而魏喻義將一軍本屯驛道當寇衝僅孤屯將移善地自山

後建旗吹角而出寇見大驚遂返奔趣新田甯遠圍永州別陷嘉禾臨武悉徵軍將劉長佑江忠義田興  
 恕余星元楊恆升李輔朝張榮組吳國佐李金陽段瑩器何紹彩王勛黃三清劉吉三赴急而令劉培元  
 彭定太崔大光費榮快集潰卒蕭啓江遠湖南劉坤一趙煥聯周寬世等領舊部王明山蕭翰慶陳金鼈  
 鄒漢章自湖北來領水師黃禧熙新領軍屯省城亦出助攻長佑至永州寇解圍走祁陽掠道州攻東安  
 圍七日城陷知縣李右文死之犯新甯四月乙日長佑自東安要寇新甯軍潰木山輜重盡喪收衆保新  
 甯寇犯寶慶分圍武岡江忠義援武岡先寇五日至寇圍攻五日解去田興恕劉吉三自沅州援寶慶辛  
 亥寇至止屯黃塘道州寇復趨新甯長佑合劉坤一江忠濬李明惠軍拒之石大開自攻祁陽防軍將王  
 勛余星元等不能禦增遣周寬世朱品文陳湜往祁陽趙煥聯魏喻義陳士杰防衡陽驛道屯熊領寇前  
 隊至領煥聯等退走寇不復進煥聯等還據領於是寇聚圍寶慶官軍亦皆聚屯寶慶復增遣劉嶽昭楊  
 安臣助軍英德寇勢北趨遣蕭啓江大軍及李輔朝陳士杰魏喻義等防郴五月陽山寇犯臨武圍藍山  
 攻甯遠陷永明賀縣寇敗江華營兵陷城縱掠而還胡林翼遣李績宜將五千餘人渡湖自安化援寶慶  
 寇大合圍并圍田興恕趙煥聯諸軍興恕等倚城東煥聯倚城西夾資爲屯寇築壘塞其間兩軍不相聞  
 劉長佑從武岡西南來不敢循驛道更繞而北余星元等屯洪橋在興恕東有衆七千畱二千人守洪橋  
 進屯柳橋以援興恕寇攻洪橋屯破之衆軍恒懼長佑從麻溪渡資亦西屯李績宜自藍田來移書問進

兵路黃濟熙席寶田報書言當直南援洪橋趙煥聯知續宜欲西自圍中與書言當自北攻續宜乃西渡浪溪當是時圍內外水陸軍四萬悉統於續宜然湖南名宿將皆在非續宜所能統寇連營百餘里號三十萬日食米數千石圍及兩月野無所掠城中倚外軍悉出穀春資興恕等軍深壕相持寇聞新軍至欲急破之以潰諸軍反舍東而攻西六月丁卯續宜至長佑軍中寇方先攻長佑營續宜悉軍助守寇敗走續宜軍乘之破寇壘七以通煥聯屯官軍大歡其夜寇吹角滿山野集衆西渡明日前隊出攻官軍其後隊引而南走田興恕開壁出戰亦渡資合大軍城中呼譟相慶寇既引去諸軍各相讓莫有言追截者七月餘寇復陷東安續宜長佑分道赴援大開已踞廣西興安續宜還湖北長佑軍疲亦罷田興恕趣靖州防黔邊黃濟熙攻賀縣寇於江華唯蕭啓江追寇出境增調張運蘭軍防郴永八月連州寇入宜章胡國安拒走之黃濟熙襲江華寇於領東破走之以寇圍桂林復遣劉長佑募新軍與蕭啓江繼進乙丑啓江至桂林長佑至全州石寇自義甯欲合柳州土寇土寇閉城拒之遂走慶遠趨南舟啓江還湖南長佑還雷廣西授按察使九月張運蘭出境攻寇連州黃濟熙陳士杰等拒寇藍山皆平之援貴州軍將兆琛周洪印等收鎮遠十二月石寇黨奔潰四出以黃濟熙劉嶽昭屯防永桂張運蘭屯道州

十年正月田興恕授貴州提督將二萬軍出銅仁以江忠義募二千人屯綏靖蕭啓江自常德赴援四川四月永州總兵樊燮以驕倨爲巡撫所劾罷因構于總督指目左宗棠布政使文格亦忌宗棠陰助燮總

督疏聞召宗棠對簿武昌乘章再疏爭之奉 嚴旨命考官錢寶青卽訊事連獲文琛玉葆生等文琛因以抗直爲宗棠所抑至是保明宗棠胡林翼復力解之得不逮坐文琛等微罪奪官宗棠游軍中購林翼及曾國藩請以偏將自效國藩等慰遣之令還湖南石寇走貴州蕭啓江卒於成都雲南寇犯四川啓江部將何勝必破之非研江甯大營潰退蘇州陷授曾國藩兩江總督乃徵張運蘭軍赴祁門固徽甯保江西五月己未劉嶽昭陳品南等出境克賀縣石寇復走武緣以四川寇亟 詔駱秉章往督軍而文格署巡撫時裕麟授廣東運使已一年奏留治餉至是授湖北按察使留湖南按察使程誥署布政使左宗棠將六千人從曾國藩赴江南前吉安知府黃冕議供支曾軍軍餉與裕麟合請國藩加推商貨釐語在籌餉篇八月石寇還出義甯靈川恭城戊辰犯永明 詔授程誥爲巡撫九月己酉受印以劉嶽昭黃清熙兩軍從秉章行未發石寇陷綏甯殺知縣吳熊陷城步殺知縣安和攻武岡以江忠義爲大將拒之城守三日寇走新甯奏留援蜀軍助攻守十月丙子寇陷東安殺知縣趙榮祺掠道州永明江華而東自藍山趨桂陽宜章屯將胡國安戰死寇遂仍犯南安

十一年二月庚申駱秉章軍行於道奏程誥浮侈罷之仍以文格署巡撫石寇後隊復自藍山走桂陽縣三月貴州寇入靖州五月 詔文格還本官以毛鴻賓爲巡撫九月石寇部黨復犯綏甯其前在貴州者復自來鳳入龍山四川軍將易佩紳募兵長沙道永順馳擊之敗績劉嶽昭軍前留湖北攻隨州聞善遣



援來鳳 詔以江忠義爲貴州巡撫毛鴻賓以西南防急奏留領軍其詞言貴州巡撫需員云云湖南巡撫始自尊矣秋胡林翼薨病革時密奏劾裕麟鴻賓聞之陽奏遣裕麟赴湖北因解其任裕麟久專利權兼攝兩司開敏無過狀官吏民士用舍在其指顧一旦罷去鴻賓意益得慶遠知府陸增祥憚之官從鴻賓來用黔捐例改道員以代裕麟文格以喪歸召岳常澧道惲世臨署布政使超用李逢春解長沙縣印卽知本府又專以趙煥聯居省城領防軍總營務兵餉吏治皆有私寄異於駱秉章時云十月甲戌石寇黨陷會同十一月鴻賓奏劾周鳳山募軍冗濫因頗短湘勇不可盡用欲他省命將權悉歸湖南奏入

報聞石寇攻黔陽陷瀘溪劾江忠義委軍歸葬罷其貴州巡撫 詔改提督石寇至永明與來風寇合走四川

同治元年正月席寶田等軍攻來風寇破之復其城劉嶽昭屯施南聞捷先上功於湖北以合擊論功布政使惲世臨始稽鉤軍需收支計足陌錢百萬常贏萬四千千扣水錢百萬常贏萬六千千悉拘製造工匠欲坐局員侵牟先奏奪王加敏官覈訊無所得貴州苗教寇起援軍出銅仁 詔授田興恕欽差大臣專治貴州軍興恕督餉湖南鴻賓怒奏停其協餉未幾興恕罷是時湖南無寇唯月報廣西貴州邊防以爲戰功西洋通商法郎西請天主教堂故地衡州湘潭皆令官清丈還之聽自修建於是士民引 聖諭駭異端焚毀教堂兼攻從教人法郎西公使愬之 詔官修復衡永道黃文琛上官舉已定彼教主自建

第167-212

官修失體而湘潭已興工巡撫恐生事專買債修者乃罷文琛以知府張士寬攝兵備主其事以釐稅收數不符奏劾辰沅道陸傳應傳應至復漫謝之通判椿齡怨鴻賓劾罷己官因撫事懇總督且及其大喪取妾事文格時還湖南本官道武昌爲解於總督湖南軍需局以三千金償椿齡寢其事十二月奏以長沙知府丁寶楨率湘將至山東討捻寇寶楨時擢陝西按察使 詔改山東

二年三月以席寶田江忠義軍出江西援安徽文格移廣東惲世臨爲布政使五月毛鴻賓遷兩廣總督世臨代爲巡撫鴻賓以文格挾前事因劾罷之率湘軍將張運蘭楊安臣劉德謙以行世臨既得位當奏署布政使越次用糧儲道李明墀按察使倉景恬不能堪請病去八月石寇部黨李復猷犯永綏時大開已於四川破散被禽斬餘黨依復猷欲還廣東出酉陽窺辰沅大集諸軍防之湖南名將已盡世臨不習軍張文報而已復猷遂入會同殺知縣鄧爾昌陷綏甯分走道州陳士杰拒戰寇潰散走江華出廣西別部掠通道敗靖州防軍十月廣東軍禽斬復猷於連州湖南以捷聞世臨本依鴻賓以起至是鴻賓大怒世臨又追前事奏徵陸傳應自貴州至長沙會計釐稅收數鉤考其事不能竟也稍修小怨以飲博事羅致道府十餘人又好以訪聞案事皆示意令自引退石贊清爲布政使守例奉行吏治不能廉物議謹譁矣然世臨謹事巨室陽示同好惡士大夫喜事者翕然稱之

三年五月江浙逸寇犯江西大增防軍踰二萬分屯諸府自釐貨鹽茶稅與公私饒裕冗軍益多皆坐營

無戰事比於頓兵而滑惰諂巧之將亦由此進咸豐以前諱言寇入自毛鴻賓以後每奏事必言東西同  
警羣寇迭至以希大舉焉六月江甯克洪寇平防軍仍屯戍備寇四年二月憚世臨罷以李瀚章爲巡撫  
世臨爲政多倖門高下任意又刻覈自以習例案明銓格於補官屢詰難吏部而時議追咎毛鴻賓專擅  
威福皆自世臨發之欲竝去此兩人然其牽引多重發難乃假例事付吏議鴻賓世臨皆自以爲無恐及  
奏上竟降調世臨出不意湘軍將以其治軍疏又力主推稅籌東征乃率釐銀五萬以資其歸瀚章本起  
湖南州縣久從會軍無所不諳練特喜靜鎮抑英銳頗收權歸之官舉錯又異矣三月洪寇餘黨汪海洋  
等屯踞福建廣東邊議四省合擊復增軍遣陳士杰自桂陽出仁化王永章自宜章出樂昌張義貴屯郴  
州四月鮑超軍自江西援陝超假歸四川遣總兵馮標等將前軍出漢陽待餉湖北餉不時發又不令其  
軍至省城久屯金口軍士怨望馮標等短於撫馭超軍號霆營多收降寇不樂西征乃譟而叛直掠而南  
欲合福建餘寇霆營剽悍有名諸軍畏之過於大寇遂自袁吉入攸攸安仁而南湖南屯軍至衆當突而  
過先敗趙煥聯所部軍劉德謙要之不及委所掠東走德謙軍收趙部軍械無算叛軍至桂陽縣乃遇陳  
士杰拒戰大破之餘千餘人逸去八月復遣羅耆彭炳武等助郴防悉汝并援貴州軍爲二十營以周洪  
印領之十二月汪海洋及叛軍皆平東南休息乃議援黔

五年以李元度爲大將出沅州攻銅仁石阡寇以洪印等出靖州攻天柱清江苗

六年夏李瀚章遷總督劉崑爲巡撫奏罷洪印及貴州布政使兆琛軍以席寶田募新軍討苗始大用兵矣 朝議令四川湖南俱出軍兼供其餉以平黔爲期湖南鹽茶貨釐稅自海口通江浙定結於前十之六所加東師餉稅復停因議捐輸李榕爲布政使倡育當先令巨室助資以率齊民實不能行而士民怨悞據他事令言官劾榕所委用者而張自牧久領黔糧局故指攻自牧劉崑奏辨悉直之其冬增遣黃潤昌率軍出晃州克鎮遠

八年春潤昌自施秉謀取費平中伏死軍覆言者以陰事復劾李榕總督李鴻章雪其事而微言榕不恤名罷之王文韶爲布政使

九年秋湖潭姦民以縣丞於朱專捕人賂賂夜集百餘人劫之縣丞跳走傷死以變聞因謬言哥老會哥老會者本起四川游民相結爲兄弟約緩急必相助軍興而鮑超營中多四川人相效爲之湘軍亦多有初不爲姦利及寇平軍罷散歸無業者假以報復劫掠因又招誘所在有之各不相屬又人猥雜并不能助緩急而官吏諱劫盜憚緝捕儒生喜防未然往往推之哥老以張大其勢奏報頻頻上聞 廷議以爲固有之雖詔防察終以爲不能絕寇起既久督撫亦不復議疏防罪一聞哥會輒上變發兵於是巡撫以湘潭至近大發省城屯軍及旁近軍令募軍至六千以柳萬春于高勝爲將往來湖醴間莫測寇勢稍取民間衣物所至民亦恫喝之用兵數月卒無所得虛張首虜而還

十年春龍陽姦民復讎殺在籍同知陳景滄父子益陽姦民亦劫呼獄荆州聞之以爲寇大起總督郭柏  
庵以聞 朝廷未得湖南奏詰問巡撫而亂民已散去有哥老會者不已因 命總督李瀚章渡湖剿之  
罷劉崑以王文韶代之奏設保甲局而還

十一年春席寶田盡平貴州苗軍事告畢四境無所防而水陸軍如故省城城守縣火擊樓若備寇至哥  
老會時有聞者軍往輒散文韶亦頗知諸軍無事坐食然不能罷貨稅捐輸益厭不復效湖南南蓋貧賤  
矣

會軍篇第二

軍興而養兵之利害盡著諸帥臣則稍稍召募而江忠源以楚勇顯然兵如勇益甚所屯則私鬥戰敗固不救反陷之咸豐二年冬湖北大營患潮勇橫恣罷遣之歸乃益道掠公奸良民婦衢市所至焚殺愚民以爲官兵不如寇則姦人倡僞議謀通賊及結盟拜會相挺起矣會國藩既奉命幫辦巡撫團練是時湘鄉先立練局請主其事辭母憂不出且自言行軍用兵不素習已而武昌陷湖南大震始至長沙與巡撫張亮基治守禦且上奏曰團練之難難於捐貲湖南行伍空虛以練兵爲要務自軍興以來二年有餘糜餉不爲不多調集大兵不爲不衆而往往見賊逃潰未聞有鏖戰者所用兵器皆大礮鳥槍遠處轟擊未聞有短兵交鋒者其故何哉由兵未練習無膽無藝故也今欲改弦更張於省城立一大團擇鄉民壯健樸實者招募來省練一人收一人之益練一月有一月之效又曰湖南會匪自粵逆入楚大半附之而去然猶有申子紅黑邊錢香會成羣嘯聚如東南衡永郴桂西南寶慶靖州萬山叢薄爲卵育之區有司亦深知其不可遏特不欲其禍自我而發相與掩飾彌縫苟且一日之安積數十年應殺不殺之人而任其橫行今鄉里無賴之民囂然而不靖彼見夫命盜首犯常消搖於法外也見夫粵匪倡獗而莫制也遂以爲法律不足憑官長不足畏若非嚴刑峻法無以折其不逞之志臣欲純用重典以鋤強暴卽良民有安生之日臣身雖得殘忍嚴酷之名所不敢辭今之急務在使通省無不破之案而盡除大小各會匪則

滌瑕蕩穢可期也有曾經搶掠拜會結盟者請卽用巡撫令旗恭請 玉命立行正法內姦既清外寇雖至無能爲已於是立三等之法重者斬次杖斃小鞭責釋之而已不以煩府縣獄又手書告勸鄉人士耆老雖幼賤身自下之必與鈞禮有所布告皆通啓自名每牒府縣招致賢俊牧令雖怙舊習然親見大人尊官與鄉民諸生爲等夷亦稍稍悟悔官民否隔頗詢地方利病山野材智之士感其誠雖或不往見人皆以曾公可與言事湖南欣欣鄉治矣國藩以十二月壬辰治軍事

三年正月丙午朔丁未寇棄武昌下犯安徽江甯湖南不受兵乃益招募教練兼令營兵防城者月六日合操撫標中軍參將塔齊布日閱所部軍訓練有法諸州縣亦時稟承國藩言所興除有上言胥隸貪恣輒捕治斬之其行館卽訊者經三月殺五十餘人文法吏大譁張亮基移督湖廣未幾移撫山東署湖南巡撫潘鐸引疾去駱秉章復來以國藩所行異於羅繞典及諸團練大臣心誹之然見其所奏輒得 褒答受 主知未有以難也二月常甯土寇起以劉長佑將楚勇五百人湘勇三百人往未至其縣團丁討定之陽山寇窺宜章大庾寇入桂東殺汛官以張榮組將七百人往衡山土寇起三月劉長佑破平之永興安仁茶陵時有寇發輒聞而兵隨至姦軌破散五月洪寇分黨圍南昌江忠源往援因乞師湖南以羅澤南將湘勇千二百六月辛卯起行道醴陵忠源弟忠淑將楚勇千壬辰起行道瀏陽署鹽道夏廷樾將營兵六百人湘勇七百丁酉起行道醴陵援軍之行也國藩念營將積敝不可用純用書生爲營官率皆

生員文童以忠誠相期獎然未經行陳故以楚勇百戰者借楚勇尙劉說營備疏略乃命千總張登科領湘勇二十人爲前哨戒忠淑登科曰哨探必百里至瑞州待湘軍而行忠淑扭其家軍稱勁旅心笑曾公怯驅而前中途譌言寇至譁而潰走姦民譟驚之棄軍械餉銀退保黃岡十餘日乃進七月壬申湘軍至南昌則戰城下書生爭奮搏寇寇陽退鈔其後軍敗營官附生謝邦翰童生羅鎮南易良幹羅信東戰死澤南收衆入城於是國藩聞之以爲湘勇果可用雖敢敢深入官兵不如也江忠源初至九江奏請增兵國藩與書曰今日之極可傷恨者在兵敗不相救而已蓋調發之初徵兵一千而抽選數營或數十營卒與卒已不相習統領之將又非平日本管之官遂乖然不能以相入至於兵與勇遇尤相嫌恨桂東之役三廳兵尋殺湘勇於市江西之行鎮軍兵殺湘勇於三江口傷重者十餘人以今日營伍之習氣與調遣之成法雖聖者不能使之一心足下前奏調雲貴湖廣兵六千募勇三千合爲一萬自成一軍夫六千之兵必有一二鎮將統之其勢不能相下而將弁中又多卑庸無足與語者鄙意欲練鄉勇萬人概求吾黨質直曉軍事之君子將之以忠義之氣而輔之以訓練之勤相激相勸而後可以言戰也忠源未及用而江西楚勇以索賞復潰健銳者皆棄去江軍遂弱九月敗於田家鎮是時湘營制營三百六十八中營羅澤南將之左營王珍將之右營鄒壽璋將之塔齊布將兵勇成二營周鳳山儲玖躬各將二營曾國葆將一營國藩仍欲充廣至六千人合忠源所將成一萬爲義師而已居湖南有寇乃佐巡撫治兵故多與



軍民政事長沙協副將清德自以爲將官不統於文吏雖巡撫例不問營幕而塔齊布諂會國藩據營制提督鮑起豹者昏庸自喜聞清德言則揚言盛夏操兵虐軍士且提督見駐省城我不傳操敢再妄爲者軍棍從事塔齊布沮懼不敢出司道羣官皆竊喜以謂可懲多事矣提標兵固經侮練勇倚提督益驕適湘勇試火槍傷營兵長夫因發怒吹角執旗列隊攻湘勇城上軍營踰堞出城中驚譁國藩爲報試槍者以謝乃已俄而辰勇與永順兵私鬥辰勇者塔齊布所教練也提標兵益傲怒復吹角列隊討辰勇於是國藩念內鬥無已時且不治軍即吏民益輕 朝使無以治姦執移牒提督名捕主者提督亦怒設曰今如命縛詣轅門標兵洶洶滿街國藩欲斬所縛者以徇慮變稍疎未有所決營兵既日夜游聚城中文武官閉門不肖誰何乃猖狂公圍國藩公館門公館者巡撫射圃也巡撫以爲不與己公事國藩度營兵不敢決入方治事刀矛競入刺欽差隨丁幾傷國藩乃叩巡撫垣門巡撫陽譴反謝遣所縛者縱諸亂兵不問司道以下公言會公過操切以有此變國藩客皆憤怒以爲當上聞國藩歎曰時事方亟臣子旣不能弭大亂何敢以己事瀆君父吾甯避之耳即日移屯衡州已而湖北事亟總督吳文鎔故國藩坐主專倚援湖南奏調湘軍有 詔令會國藩赴援駱秉章供支其軍巡撫亦以寇棘放手書謝國藩且召之同守省城王珍時將湘勇聞援鄂自請增募合三千人先往十月武昌寇去江忠源援安徽巡撫兵少不能進侍郎宋晉請發湘軍援安徽時新募壯勇分募土寇未嘗休息合會軍餉乏絀器械服履陋又方議水

軍遣戰筏守湘初無慮勳遠而鄂院羽檄日至月三四奉 詔促出師乃饋遣王珍珍既得請餉省城不復啓國藩後又罷行國藩議合併湘勇爲十營汰珍軍珍大怨望國藩初本倚珍爲大將旣以軍新集技器粗脆遠出遇寇憂必敗而珍頗易言兵度其才氣終不能爲下乃聽珍別將十二月江忠源死廬州四年正月總督吳文鎔敗死貴州國藩知時事愈危勢不得出十全於是改營制以五百人爲一營其非湘鄉人各領鄉軍者隨所統爲小營凡陸軍五千餘人爲十三營水師五千人爲十營戰船二百四十坐船二百三十器用工匠米炭襍具及員弁丁夫水陸軍七千人建旗東下畱羅澤南屯衡州鎮土寇 文宗以國藩一人兼統水陸軍心愛之特詔貴州提督佈克慎自貴州還赴其水營詔總督台湧會其師時寇已圍武昌台湧方居德安而寇黨分犯通城崇陽人湘陰趣甯鄉巡撫先遣王珍會曾軍俱下寇沿洞庭者皆退走陸路游奕自如二月庚辰遣儲玖躬拒寇甯鄉雨雪步進欲與寇爭城壬午未至縣十許里縣故無城垣寇已據治所官走免衆議止待後軍玖躬奮曰自軍與寇破城百數皆待其休息或飽掠棄去耳今舍營兵起義勇奈何聞警咨起卽部分其五百人分三道向甯鄉寇方散掠遂乘攻之市中寇各求門出走玖躬止營郊外休士會食而躬率十餘人行衢巷撫難民寇先出者不知官軍至方還縣見街中橫尸大驚復出東門乃反遇玖躬相擠塞門玖躬遽前搏寇寇前後刺之玖躬及十八人盡死寇不知主將死奔相告此來者以數百人敗數千衆今止營待後軍不可當也卽夜引去合浦圻寇衆俱去湖南

境內解嚴省城湘潭初聞寇破甯鄉大懼及聞寇去知由攷躬一戰道路交頌儲石友云甯鄉人見其戰者尤感念卽日爲立祠蓋自此湘軍重赴援人人稍知榮戰死矣國藩前軍至岳州王珍先屯岳州城見寇退議進兵崇通寇大上三月寇先由蒲圻犯岳州乙巳敗王珍於羊樓丙午塔齊布復通城其日王珍退守岳州鄒壽璋屯城中謂珍曰城空無食不可守也珍不聽戊申寇至壽璋率所部退保南津會水師而別將還保城城空軍士一日不得食王珍絕城走衆亂國藩遣礮船迎師免者千餘人潰死大半俱走保長沙寇衆乘之遂據靖港距省城六十里再犯甯鄉敗湘勇三營營官伍宏鑑戰死塔齊布自崇陽還奉檄援甯鄉會寒雨行三日未至甲子寇陷湘潭是日國藩下檄塔齊布改援湘潭使者以爲軍在甯鄉行半日遇之乃在中途距湘潭反近塔齊布亦未知湘潭已破喜於憑城保大縣以自固四月己巳朔軍長驅趨湘潭將入城乃知寇先在勢不得退寇聞有官軍至亦卽發兵拒戰迨相遇塔齊布不得退則馳陷陳軍士皆出薄戰寇自起與官軍未嘗短兵接相顧愕欲退其後隊望四山多負仗者以爲官軍大至則先走因相蹂官軍譟呼觀者皆譟呼遂大破之追至城乃還立營其日長沙惴惴居賊中人自以爲必敗國藩集謀攻守皆曰入城坐困宜親督戰或議先靖港奪寇屯或曰靖港敗還城下死地矣宜悉兵攻湘潭不利保衡州卽省城陷可再振也水師十營官皆至推彭玉譽決所鄉定鄉湘潭五營先發約明日國藩帥五營繼之夜半長沙鄉圍來請師曰靖港寇屯中數百人不虞我可驅而走也圍丁特欲藉旗鼓

以威賊已作浮橋濟師機不可失聞者皆踴躍國藩亦憂湘渾久踞思牽之故令攻靖港庚午平旦至水  
急風利礮船徑逼寇屯寇礮發船退不得上流而行寇出小隊斫纜者水師遂大亂陸軍至者合圍丁攻  
寇寇出圍丁遽反奔官軍亦退爭浮橋橋以門扉牀版人多橋壞死者百餘人國藩親仗劍督退者立令  
旗岸上曰過旗者斬士皆繞從旗旁過遂大奔國藩憤自投水中章壽麟負之還船日午還至城下而湘  
渾大捷報至先所遣水師距湘渾十里聞陸軍戰勝鳴角礮礮直上塔齊布軍三日三勝壬申寇散走水  
師悉燒所掠船寇大敗走靖港遂俱走還岳州湘渾既復國藩以軍不精練悉汰所部留五千餘人因留  
長沙造時增調糧澤南李孟華陳輝龍將水陸軍圖再舉上奏自劾而駱秉章及提督鮑起豹自上其功  
文宗詰責提督即日奪官 詔塔齊布以副將署湖南提督方事之急也布政使徐有壬適室走達旦  
明日與按察使會詳巡撫請罷退曾軍語倨妄甚巡撫請有壬且待之及克湘渾國藩猶待罪俄而得  
溫詔且起用塔齊布文武官大慙沮有壬詣國藩頓首謝城中防兵聞代大將皆驚服以爲 天子明見  
萬里塔齊布受提督印則徧賞提標兵得軍功六品牌者三千人使人人知新提督無修怨之心標兵大  
謹平寇功由此起五月甲寅岳州屯寇陷常德六月己巳寇陷湖北省城時方治水軍未能救也塔齊布  
屯湘陰新牆待水軍庚辰俱進攻岳州甲申水軍渡湖丙戌焚寇舟七月戊戌朔寇空岳州城東北屯城  
陵磯倚江水陸相犄角癸卯國藩舟發長沙壬子至岳州癸丑水師三營敗績請在水軍籍乙卯塔齊布

挑戰斬寇帥曾天養戊午寇攻維澤南營出戰大破之澤南初合軍未嘗出攻寇寇以爲怯塔齊布數  
漸挑澤南澤南愈益閉壘至是開壁大戰遂以勇畧著聞名亞塔齊布及今並稱焉閏月戊辰朔城陵磯  
寇遂走荊州將軍官文等遣軍將會水師於螺山塔齊布羅澤南東攻崇陽己丑陸軍破寇屯於羊樓洞  
八月己亥復崇陽己酉國藩進屯金口辛亥澤南等進屯紙坊癸丑會於金口澤南請沿江東岸攻花園  
寇屯至大破之塔齊布伏兵洪山要寇路水師順流燒寇舟於鹽關漢關鮎魚套丁巳皆破之戊午燒寇  
舟於漢口盡破之己未寇棄武昌漢陽遂走署總督楊需方屯德安一日而聞捷六日捷上聞九月辛未  
國藩奏至京師 文宗大說詔國藩署湖北巡撫戊寅又 詔國藩督軍解署任以前已奪官 加賞兵  
部侍郎銜且以下長江克金陵爲衰寇當是時湘軍銳甚而武漢空虛楊需度不可居又貪因人功自請  
合兵分三道已當北岸攻蘄廣濟塔齊布等率湘鄂陸軍趣南岸攻大冶羅澤南率湘軍攻興國所至寇  
破散國藩督水軍舍蘄不攻順流直進期會於田家鎮 詔戒以孤軍深入南北軍強弱不相當寇將併  
於江北又 詔江西巡撫以贛州寇必據九江湖口相蟻聚當先設防楊需險啓遠不能奉行國藩急於  
破寇帥軍自進田鎮者張亮基江忠源敗地也鎮當江北諸山峻崎江南大山曰半壁三面斗絕山下富  
池口江水南趨繞山折而東故舟行依固鎮以避濤三年官軍失半壁山而敗至是寇臨山作五屯引湖  
溝之北自田鎮至蘄四十里沿岸築城鐵索繞江自半壁山爲之固鎮以逼舟師兼設十萬十月己亥塔

齊布東攻富池口羅澤南西攻半壁山方作浮橋通兩軍寇出千餘阻禦我不得橋寇以舟渡數千人列南岸山左舟中寇數千人登陸列南岸山右山上五屯盡出衆可二萬我軍懼有逃者三人李績實馳還斬以徇澤南戒衆分四隊令曰待令而後戰先動者斬寇三進三退澤南鼓之突將斬寇大旗將二人衆奔乘之寇反走隄於山自顛死者無算北岸來寇奔舟舟亂相推排覆溺十餘舟我軍登舟寇輒自投江操舟者股栗不知有維楫於是擲火盡燔之遂奪半壁山絕崖斷鐵纜六寇旣失山因作大筏傍岸以固鐵纜江中橫大筏三盡鉤小船節節相牢連斷其一節明日復合用彭玉麟計分四隊椎燒其大瑣寇遂崩潰語在水軍篇出鎮旣破新城寇亦退走廣濟塔齊布等渡江辛酉寇逆戰破之復東攻黃梅寇連敗大懼悉驍悍謀死拒分屯小池口大河埔孔壠驛及黃梅城北皆破之每屯分四五營十一月丙寅朔攻大河埔及城北屯皆破之復黃梅癸未寇自孔壠來逆戰破走之於濯港己丑進攻孔壠燒其屯水師乘勝薄九江軍城下與寇聲相聞寇併力踞湖口城與九江相犄角我軍屢勝負昌礮丸犯鋒刃以相誇塔齊布以大將頻獨身陷陳受石傷水軍恆度寇壘間礮丸墮倉中可掃莫有退志塔齊布旣屯九江南門日仰攻士死傷相繼羅澤南攻湖口苦戰不能克夜夜自戒備至不能寐聞者爲之寒心 文宗尤以爲憂屢 詔楊需陳啓邁飭臬司都統副將領軍者及安徽諸軍併歸調遣湖北江西兵旣不足用安徽軍亦無由會合湘軍已深入方日謀所以勝十二月丙午水軍三營越湖口攻姑塘寇出小舟燒其坐營

遂陷鄱湖不能還湖口寇反渡江復据小池口周鳳山往爭敗績己未寇出小舟燒國藩坐船水師遂潰五年正月丙寅朔己巳楊需軍退漢口於是安徽九江沿邊寇盡上分三道東陷黃梅廣濟追楊需至漢口中道自小池口沿江略蕪復分黨從富池渡江西陷興國通城崇陽咸甯通山且掠江西武甯率遺數百人或千人所至脅衆至漢口者後楊需二日至黃州者後需四日故需不敢入省城走保德安湖北巡撫陶恩培故湖南按察使曾開衡州城拒程裔采又請奪曾國藩軍者也至是侍總督在外不謹守備城中兵才二千人徵兵半途聞警皆潰去相驚以寇至湖北江西方千里旬日騷然矣始寇之起所行無留難其踞省府脅取民財穀而已行道掠人夫不用則遣還未嘗增衆及屢敗乃結土寇屯城鎮頗收拔俾孽者而石大開陳玉成用事寇乃盛於此時矣湘軍萬餘人水陸分爲四李孟羣等水師回援武昌塔齊布留攻九江羅澤南入江西國藩收蕭捷三等水師三營屯南康澤南奔命往來復弋陽克廣信收景德攻贛甯雖戰勝攻取非東南所以安危之大故不具載塔齊布以五千人留屯議者以爲頓兵無所用武而廷議多言不可解圍光祿卿王茂蔭奏尤切詔亦命留攻相持半年九江湖口兩城寇憚伏終不敢犯大營七月乙酉塔齊布薨於軍周鳳山代將十一月寇陷臨江瑞州移師去未幾而敗語在江西篇塔齊布之爲將襍用兵勇皆得其死力雖號姦猾者隸其部下勇驍恆先人每出戰部曲從者度非驍勁敵十人已上輒鞭之使還嘗獨拒追寇全軍還營而已一騎陷寇地投宿民舍老嫗梯送上食爲匿焉

稽稽中明日按轡徐還軍中服其神勇老師堅城卒以憤死鳳山以資級領衆自是所部弱矣湖北三陷死三巡撫故胡林翼傾身以結士倡勇敢務權略而鄂軍興

終



--	--	--	--	--	--	--	--	--	--	--

1  
 2  
 3  
 4  
 5  
 6  
 7  
 8  
 9  
 10  
 11  
 12  
 13  
 14  
 15  
 16  
 17  
 18  
 19  
 20  
 21  
 22  
 23  
 24  
 25  
 26  
 27  
 28  
 29  
 30  
 31  
 32  
 33  
 34  
 35  
 36  
 37  
 38  
 39  
 40  
 41  
 42  
 43  
 44  
 45  
 46  
 47  
 48  
 49  
 50  
 51  
 52  
 53  
 54  
 55  
 56  
 57  
 58  
 59  
 60  
 61  
 62  
 63  
 64  
 65  
 66  
 67  
 68  
 69  
 70  
 71  
 72  
 73  
 74  
 75  
 76  
 77  
 78  
 79  
 80  
 81  
 82  
 83  
 84  
 85  
 86  
 87  
 88  
 89  
 90  
 91  
 92  
 93  
 94  
 95  
 96  
 97  
 98  
 99  
 100

11

湖北篇第三

寇興四年而湖北軍五潰楊需之敗也實未見寇亂民一呼而萬衆瓦解省城初才二千兵及城陷時城內外防守軍萬二千見黃旗則爭縋城走外兵亦走水師固不任城守事省城潰自保而已寇至城下用縋城縋引而上城中唯巡撫陶恩培署按察使武昌知府多山及僕從五六人恩培先赴水死多山然城上大礮擊來寇礮不發拜祝之再然火煙出而無聲發憤自到死布政使胡林翼按察使李孟羣皆將兵赴援屯城外副將王國才方馳入城城閉亦用縋城縋以上至藩署羣盜方會飲重門閉列火以爲燎國才乃悟業已入因率親兵入暴斫之羣寇驚走且呼街巷間有出者輒爲官軍所斫俄頃而定城中居民固未復業至是早盡逃國才惘惘不知所爲則登城招水陸軍不見一人明日出城合林翼屯語激昂林翼心作焉俄而寇大至知其事者交訟國才奇功遂傳言國才於道獲寇謀得口號呼門而入爲讒嫉者所蔽惟及見國才者知其實焉咸豐五年三月乙丑 詔胡林翼署湖北巡撫林翼前知鎮遠黎平治盜嚴三年冬以御史王發桂薦奉 詔赴湖北未至總督吳文鎔敗死畱湖南將黔勇三百人碌碌未有以自見會國藩征寇奏以自隨湖南巡撫駱秉章方倚幕客左宗棠以決事宗棠故善林翼奏畱防岳州捕誅崇通姦民斬刈過當已而會軍克田鎮合兵圍九江林翼以湖北按察使領千人從攻湖口比於湘軍爲最弱及寇上陷漢陽率千八百人還援守便宜不入省城于時布政使夏廷樾爲總督所劾免 詔補

林翼布政使及巡撫殉城死而林翼遂署巡撫當是時江漢上下兩岸寇充斥巡撫號令不出三十里屯金口倚水師自保增募二千六百人合王國才等軍號六千而國才屯沌口皆恃荆湘餉給軍軍無見糧寇亦易之不攻也楊需者以結交得朝貴懼假防北犯名屯德安號萬人糜餉自如四月楊需退走德安西安將軍扎拉芬來援戰死平林市西 詔奪需官以荊州將軍官文爲總督五月壬戌朔授都統西凌阿欽差大臣攻德安官文泝漢至襄陽復乘礮船下漢居潛江天門間號北岸軍西凌阿久從僧格林沁軍無統御才力不能援武漢惟水師屢克蔡店漢口及漢陽寇屯軍去旋陷林翼念相持無已時八月壬辰自將四千人渡江思合水師取漢陽不能進屯麥山戊戌寇至林翼督軍出土卒要餉出怨言強之戰未交綏謀而大奔林翼憤甚索馬欲赴敵死困人見巡撫意色惡反旋馬四五轉向空野乃鞭之馬馳不能止臨江乃遇鮑超船諸營官聞巡撫在集潰卒調王國才合屯大軍山辛丑荊州運餉銀三萬至乃嚴汰疲羸奏調羅澤南軍令更增二千人還攻武漢於時水軍大將彭玉麟赴江西李孟羣改陸軍置副將楊載福爲水軍總統屯嘉魚蒲圻間益選精銳倡勇敢其所用皆以披槍礮石爲樂巡撫禮下走卒偵事早還開營門自迎之羅澤南之在江西也日轉戰其巡撫恭倨不恆急則倚之緩則厭之曾國藩亦自以客寄莫能爲之主塔齊布薨江西事益疲澤南建議曰武漢者東南之樞紐也形勢百倍於蕩陽今兩城久爲賊踞而崇通羣盜出沒江西湖南緣邊騷擾欲制九江之命必由武漢而下欲解武昌之圍必由

崇通而入乃率所部及塔齊布都將彭三元等道義甯取通城義甯崇通間寇雖號數萬衆皆烏合脅附見湘軍輒敗走九月乙丑復通城甲戌復崇陽林翼聞援軍深入躬往迎導衆譴兵少不宜先進林翼曰以難事接客兵非也且廉恥安在勝當戰敗亦當戰己卯遣六營三千人鄉蒲圻而援寇自武昌鄉義甯衆數萬適遇官軍軍敗寇復進敗湖南防軍於羊樓澤南分兵爭羊樓而躬屯崇陽崇陽敗寇恃援復還屯壞頭欲襲澤南軍澤南遣彭三元李杏春往攻之癸未援寇自咸甯大至三元等軍少營陷乙酉德安寇棄城南趨 詔奪西凌阿官官文兼代之官文先聞參山敗自沔陽還鍾祥至是移屯德安 詔詰責官文遷延澤南失利令籌援兵會林翼等三面攻寇丙戌澤南合軍拒寇於羊樓大破之十月癸巳蒲圻寇至又破之癸卯林翼自嘉魚來勞師合澤南七營軍共十三營西攻蒲圻寇聚三萬衆分五屯四柵作浮橋據白羊水以通咸甯林翼用蒲圻舉人賀需若計出間道由公安取據城西北鐘山寇出不意盡失其險辛亥澤南精兵攻城東林翼軍攻城西北且循水防遏以牽寇援寇踞城壘堅不出士卒仰攻多傷澤南令軍士積芻薪將燒其柵寇反以火器禦之火發寇驚奔破其五壘其夜官軍馮山鳴鼓角以驚城寇城寇遽走蒲圻復十一月庚申朔林翼澤南合兵東攻咸甯庚午咸甯復辛未水師克金口甲戌林翼等會水師於金口其日王國才進屯沌口乙酉澤南五營進屯洪山林翼將四營屯省城南五里墩城寇從高冠山望澤南築壘不出戰城外寇大壘八小壘二環四門見林翼軍至出拒戰澤南襲之破大壘一

小壘二李孟羣軍亦薄攻漢陽水師往來江漢南北每戰必捷而官文前軍攻漢陽者與南岸軍相聲援都興阿將馬隊護水師水師夜燒寇船未遠都興阿露立建旦羣帥和輯戰士始奮矣

六年春正月江西寇患愈亟陷七府城議者交章請調羅軍浙江湖南巡撫皆以爲言 文宗以武漢功可勦持不許言者益衆 詔官文等通籌利害澤南念曾國藩艱危義與同死生而垂成功不可棄日夜憂憤督戰益急自正月至二月大勝數十小戰百數寇嬰城待援士卒多傷官軍每戰輒薄城下寇陰穴城爲突門三月己未寇開城迎九江援黨澤南率師要之寇奔城追之突門開直衝澤南軍軍不能退澤南躬拒之三退三進軍幾潰火槍鐵子中澤南左頰血霑衣猶踞坐指揮乃得收軍還乙丑創發卒於軍軍中哀泣江西湖南聞之皆歎息失氣 詔以巡撫例贈卹而李續賓領其衆統賓初建議分屯麻營絕寇糧壘成自守之與洪山屯相犄角旣代澤南仍屯洪山以游兵巡窺營塘角間寇守益固而江西請師日數至義甯寇復犯崇通九江寇合與國大冶土寇自武昌縣進至高店謀襲巡撫大營林翼以江西待援分軍四千一百人以劉騰鴻劉連捷等將之曾國華總其事國華國藩弟也四月丁酉援軍遇寇蒲圻乙卯戰於羊樓丙寅再戰皆破之劉騰鴻功最騰鴻自此名顯五月 詔責官文林翼遷延老師林翼上奏言臣頓兵城下五月有餘日驅血肉之軀與礮石爲敵傷亡水陸軍三千餘人羅澤南及都司周得魁等將弁百餘人李續賓乘馬中礮墮地者數矣夫兵易募而將難求四月以魏勇禁約仰攻分兵圍蒲以

取義甯四戰皆捷分水師以濟下游直達九江臣自率五千人扼武昌南路李績賓領六千三百人扼城東路分剿北路水師六營下駐沙口水陸之賊援絕路窮下游九江與國陸賊萬餘分道來援冀可夾擊臣卽豫撥三千餘人戰於百里之外且臣歷觀前史李左車之告韓信尙以頓兵城下情見勢絀爲戒戰易攻難自昔已然矣臣之才力何足言兵惟材有限而志無窮萬一變生他路禍出意外臣亦不敢退怯苟且自取羞辱 詔報曰歷述艱辛於事何益國體具在亦應寓慎重於其中蓋自是 文宗知林翼之爲帥果有異於廬揚江甯諸將而林翼亦益感激發舒始有志於天下非僅規營湖北而已五月唐訓方等敗九江援寇於葛店六月寇自樊口增召戰船復犯葛店以蔣益澧總六營往逆戰破之追奔至樊口合水師燒其船入武昌縣城遂渡江攻黃州十日不能克益澧聞援寇踵至議回軍丁銳義爭之曰夫兵勢宜遠料敵有方援賊之能已可見矣我屯黃州則百里義民有所歸心賊之上犯有所牽制後路大營相爲聲援且能戰不在近能守不在遠今若旋師賊必踵我踵我必戰戰此可乎諸將皆以縣軍爲憂銳義乃獨上書陳兵勢巡撫壯其議終以衆論檄軍還 詔果以撤軍爲非云益澧與績賓皆澤南弟子績賓名望日重嘗論事澤南前字益澧曰香泉欲何從益澧慍亦字績賓曰迪安乃欲相統耶及績賓代將益澧屯魯港寇大攻之請援中軍績賓報曰力不能相救守走唯公意益澧大沮卽升瞭樓撤其梯唯置旗鼓下令軍中曰賊勢盛吾死此矣諸軍欲走者自去衆驚愕相顧馮壘死守寇攻一日引去益澧於是

告歸不待報而行七月官文遣舒輿阿舒保等將馬隊四百人渡江拔寇既上於青山魯港間增十三壘相持十六日水陸合擊破之馬隊追奔至葛店寇懼於馬乃大奔自是水陸馬步相輔軍勢日盛十月襄陽土寇起鎮道發兵討捕敗績以唐訓方舒保等往隨州土寇起以鮑超文明往軍至寇遯湖北湘軍鋒銳甚乃益募陸軍五千水師十營增長圍困武昌十一月丙子寇開城遯走其日漢陽寇亦東走丁丑李續賓等分三道追寇武昌縣水師馬隊追寇黃州江夏鄉民亦爭起要寇戊寅復武昌己卯復黃州庚辰復興國水師復蘄州民兵復蕪水十二月乙酉復廣濟壬辰李續賓率湘軍及巡撫軍九千五百人陳師九江城下都與阿楊戰福合鮑超陸軍六千人屯北岸小池口自塔齊布羅澤南去後正二年而圍復合胡林翼知平寇之要不在攻戰既克省城則奏蠲江夏等四十六州縣田糧以蘇民困復牙帖開鹽釐以裕軍儲又上奏曰自古用武之地荆襄爲南北關鍵而武漢其咽喉也武漢有警則鄰疆震驚南服均阻控制無術昔周室征淮師出江漢晉武平吳久謀荆襄據扼長江惟鄂爲要四年之中武昌三陷漢陽四陷夫善門者必扼其吭善兵者必審其勢今於武漢設立重鎮則水陸東征之師恃武漢爲根本大營有據險之勢軍士無反顧之虞軍火米糧委輸不絕傷夷疾病休養得所是則平吳之策必先在保鄂明矣湖北之失在漢陽無備下游小挫賊遂長驅且東征之師孤軍下剿善戰者必傷久役者必疲傷病之人留於軍中不但誤戰亦且誤餉若以武漢之防兵更番迭代彌縫其闕則士氣常新軍行必利請於省城

設陸師八千人水師二千人日夜訓練本境亂民隨時征討則我常處其安而不慮其危矣湖北敕令多不得人其已被擾者卅餘州縣元氣傷殘而良莠不分其未被擾者卅餘州縣官離民而民且離官夫吏治之不修兵禍之所由起也士氣之不振民心之所由變也凡下與上交接之事諉之幕友官與民交接之事諉之門丁夫州縣之所謂小事卽百姓之大事也今日之所謂小賊卽異日之大賊也五年大熱州縣乃或報災經臣駁斥在案六年大饑州縣轉不報災經臣駁斥在案以豐爲歉是病國計以歉爲豐是害民生臣恐湖北之民揭竿而起者不必粵寇之再至而將盜弄於潢池也地方吏治撫臣專責今欲嚴禁陋習與羣吏更始請 皇上敕下部臣暫勿拘臣以文法資格行之數年或可改觀今或疑武漢兩城公私凋敝城周廿里設守爲難臣以爲酌量葺樓以啓山林衛文作都訓農通商是在行之以儉而訓之以勤耳苟此而不能守去之他而何益或又以爲武漢收復軍行貴速督撫將兵攻取爲急則前者收復已二次矣况今江西七府俱淪於賊四年之冬僅失九江旁軼橫出可憂方大都與阿楊戴福李績實均已東下臣宜留鎮省城與督臣通籌全局整飭吏治 文宗嘉納焉方南北岸之分軍也督撫未相見將吏各有所統頗構同異官文以將軍受任拘於滿漢論者復爲林翼陳楊需崇綸故事林翼歎曰師克在和此何時哉旣渡江見總督下令僚屬曰督撫相見前事冰釋敢再言北岸將吏長短者以造言論罪官文聞之大譴林翼又以鹽釐月三千金充督府公費兩人約爲兄弟故軍政吏治皆林翼主崇官文畫行



有言巡撫權重者一無所聽而巡撫亦謹事總督推美受過湖北富疆基於此

七年春正月襄陽土寇陷房竹山保康興山遂陷宜昌妻奪統兵鎮道及四縣文武官增遣巴揚阿合唐訓方軍討捕二月會國藩以父喪歸委軍事於福興文俊等 詔遣按察使李孟羣援廬州安徽羣寇窺羅田斬州黃梅廣濟斬水謀絕九江官軍孟羣將二千五百人道羅田擊英六霍山寇敗之遂克英山王國才屯黃梅進攻宿松移鮑超防黃梅四月李景湖等敗於羅田景湖戰死餘衆退保新小池口寇衆出攻官軍屯多隆阿大破之燒寇壘二十一五月襄陽寇平李續賓作長壕三十里駐九江城東南寇爭壕擊走之增募親軍千四百人閏五月羅田寇深入犯廣濟十里鋪南及武穴鮑超多隆阿等於十里鋪作大壘羣寇於斬東北望天畝作屯各相持伺隙斬東北官軍將領邢高魁等凡十營堅勇不及超等林翼自出督師未至寇出斬水官軍敗退屯巴河林翼至黃州汰衰廢選精銳圖再舉六月李孟羣之師潰於霍山廣濟寇出太白湖背攻官軍王國才移營失火被燒死李續賓渡江合攻湖寇屯破之多隆阿鮑超等攻寇於黃梅西破其壘四十八七月庚寅舒保等攻寇黃岡東敗之丁酉再戰於上巴河何紹彩李續宜唐訓方等分三隊寇先攻左軍紹彩力戰續宜草山卷旗鈔寇中紹彩軍不利將退顧見林翼立馬陳後軍士皆驚喜踴躍赴戰訓方等亦鼓譟乘寇大破之平壘四十四進軍斬水遂追寇及廣濟西寇走宿松太湖八月癸亥遂克小池口林翼進至九江九月己卯朔遣武昌丙戌李續賓北渡江揚言攻宿松其

夜更南渡伏兵湖口北山是時外江內湖水師阻于一江楊載福彭玉麟密期會攻梅家洲寇方依岸發礮拒水師聞山後鼓角旌旗蔽山下則大潰續賓夜半射火城中寇大亂空城走洲上寇亦走要擊盡斬之丙申進攻彭澤庚子寇遞走復其城水師克小孤寇屯於是林翼以統帥難其人懼軍出境而爲福濟和春勝保所牽絀奏起復曾國藩 詔林翼出境林翼奏以清釐漕糧爲湖北大政請留整理語在籌餉篇

八年三月六安寇陷麻城舒保等將防兵屯商城聞麻城防兵敗退還增調鮑超何忠駿唐訓方等四月壬子李續賓地道攻九江城克之城寇被圍久以數千人嬰城種麥以爲食其守愈暇頻傷攻城軍林翼駐武昌增募新軍更迭代歸將士千里如家庭援寇別道內犯其屯防皆良將能自立不牽綴圍軍圍軍反時往旁近助攻凡圍九江十五月寇壞散出城者水師扼之俘斬無遺論功李續賓第一續賓遂以能軍名天下戊午寇從光山犯陷黃安麻城官軍分應之丁卯續賓自將援黃安五月丙子黃安復戊寅夜麻城寇遞走壬戌斬防將唐訓方丁銳義等破走太湖寇於界牌 詔以安徽寇事亟將合擒寇袁甲三勝保均號大帥兵力不足命續賓助勝保唐訓方助甲三俄而閩浙寇並起議者至請移和春往督師以續賓前授浙江布政使欲令赴本任倚以平寇七月廬州陷李孟羣敗潰乃定議以續賓全軍援廬州都興阿攻安慶起復曾國藩率江西湘軍援閩八月林翼以母喪歸都興阿李續賓合攻太湖丁巳克之進

攻潛山癸酉克之乃分軍都興阿圍安慶續賓攻桐城九月己卯克之戊子進攻舒城寇遯走續賓進兵三十二日深入四五百里寇城壘望風潰破軍無留行而都興阿率鮑超等軍圍安慶不能進羣寇又新破江北大將德興阿陷六合殺翼長溫紹原渡江陷溧水張國樞奔命勝保屯定遠日夕待援 朝廷憂皇專恃續賓軍或議曰今久行軍疲屢勝則驕克城留屯不足以爲聲援不留軍則後路空虛且阻塞必敗之道也宜還桐城合都軍攻安慶則水陸馬步相輔名將精卒咸萃於百里之內功必可成續賓以受恩深名重恥退且念攻城非旬日期欲出奇壁廬州陷寇環逐不用其計而發書湖北請益師續賓弟續宜將四千餘人屯黃岡唐訓方將三千人道英山援淮北未行林翼已持喪還葬官文得書笑曰李九所鄉無前今軍威已振何攻之不克豈少我哉徧示司道皆以續賓用兵如神無所用援續賓雖請援亦不肯留軍示怯悞則進三河三河距廬州五十里寇築大城環以九壘十月甲辰續賓悉兵十三營先攻九壘大戰皆破平之俘斬七千官軍傷亡過千人衆懼乃增調後軍未至寇帥陳玉成連江浦六合廬江衆又乞援捻寇招穎壽光州羣盜合十餘萬人日夜奔赴聲勢向向續賓遣輕兵迎擊於樊渡不利寇益進軍半濱辛亥合圍圍官軍三十重連營數十里將士徃勝聞敗先自亂續賓自搏戰不能進還營閉壘門七營已先陷寇來如牆續賓歎曰今敗矣令軍中日見月照地而走軍皆束載而待月出續賓終恥於潰圍謀復固守軍已勦遠大奔續賓馳督戰軍不復成列遂陷陳死會國華何忠駿從之皆死國華從瑞

州軍罷將赴部選官聞緝竄能留學戰未半載而及於難續竄既死餘衆皆堅守丁銳義初傳義中營營潰銳義突陳入績賓大營集餘衆誓同死寇環攻三日夜水火俱盡營破銳義死軍士死者數百人自餘營官皆走免五千人盡潰潰者衝寇出與寇相擠行數里寇殊不覺連大衆易亂而難整如此云潰軍至桐城桐城防軍俱奔寇乘之前留防四城軍皆潰不旬日四城復陷都興阿等撤圍退屯宿松起復胡林翼仍巡撫湖北十一月鮑超多隆阿拒寇宿松東北大破之軍始振十二月壬寅朔林翼受印武昌己酉出駐黃州壬子奏卹三河桐城死事道員孫守信等及副將李存漢以下三百二十人劾營官敗軍者總兵以下八人其失律戡罪者懲責以差以糧臺餉軍遲深自責請戶部主事閻敬銘來主之戊申鮑超拒寇太湖北二郎河寇自此沮

九年二月都興阿請疾以多隆阿當前敵將馬步軍五千立蔣凝學爲大將合鮑超唐訓方軍萬五千李續宜屯黃州軍六千依林翼大營寇帥陳玉成還江浦捻寇散掠河南留太湖寇數萬相持不進是月李孟羣師潰廬州西孟羣陷寇中自盡死孟羣初起有名略旣獨將頗貪多兵不問餉所出雖將萬人勢益孤弱軍中喜用方術士有族女號仙姑辟五兵後戰死湖北人頗神之及陷寇悲歌誓死尤爲江淮所哀思三月寇帥石大開自江西犯湖南南界衆三十餘萬五月大發水陸軍援湖南凡萬二千人齎糧千里不煩湘餉六月援油大將李續宜破寇寶慶解其城圍寇遂南走援軍還八月多隆阿破寇石牌石牌當

安慶西南寇作大城與太湖相倚官軍攻城潛山安慶寇分道來援馬隊要擊敗之冬十月大舉攻寇太湖增余際昌等九營助戰守存潛山之天堂奏移會國藩屯宿松林翼移駐祈南視師太湖十二月移駐英山安徽寇知官軍名將銳意東下則大懼安慶寇帥自出城乞援陳玉成合捻寇數十餘萬勢張甚都興阿養疾荊州多隆阿新貴重諸將不樂出其下李續宜稱母疾留湘鄉會國藩弟國荃新克景德至黃州留之領軍不可亦南歸鮑超復求去而多隆阿稱疾唐訓方等陳說軍事各殊異林翼憂之廢寢食內計諸將獨多隆阿沈毅權宜出於一欲下檄合圍攻軍悉受其節制會國藩懼軍事遂決裂力言其不可或又言天堂軍孤懸宜移屯林翼國藩一日一書相謀議久之不決與書多隆阿多隆阿輒不報林翼曰兵事喜一而惡二三屈我以申人今日是也天堂拊潛太背天險不可棄今地利已得破賊必矣徑上奏以所統軍悉統於多隆阿李續宜未至亦名赫之以風示鮑超諸軍大驚會國藩得其咨文憂疑屢日多隆阿既爲統帥遂撤太湖圍檄鮑超屯小池當前敵移將凝學軍爲超後援已屯新倉更在南國藩林翼危之業已聽多隆阿乃遂增兵寇循潛山西太湖東傍山三十里連營百數丙辰遂攻鮑超營丁巳多隆阿率凝學攻寇營以救超大戰傷亡七百餘人破寇壘十三已未寇分番攻超神將蘇文彪段福壁守營礮丸中牀几至傍壁食以避礮丸六日夜國藩盡發宿松屯兵九千人以圍太湖撤太湖圍軍唐訓方三千人援小池林翼益調麻城防兵以千人益新倉以二千五百人合圍太湖國藩林翼又合兵二千人防

羅谿埤官軍後甲子多隆阿自督軍護鮑超運道乙丑晦多隆阿以己軍入鮑超左軍屯令蘇廷彪軍出休諸軍裹創扶傷勇氣百倍

十年春正月辛未多隆阿命唐訓方移屯鮑超兩軍間以己右軍屯鮑超左軍營旁而令蘇廷彪還屯列隊拒寇且日急作壘右軍壘立成訓方軍築壘甫四尺寇已至訓方苦戰多隆阿堅壁不救半日訓方軍敗退屯新倉林翼先遣金國琛將五千五百人合余際昌軍爲九千人出天堂謀夾擊所謂山內之軍也自除夕入山險冒冰雪行十日乙亥至高橫領望官軍寇屯皆在目中寇來攻敗去丁丑多隆阿益千人屯小池己卯復益五百人國藩益三千五百人屯新倉兩三日山內軍鳴角發礮山外軍亦鳴角發礮應之寇乘霧移屯近太湖辛卯多隆阿將三千人鮑超三千人唐訓方三千五百人蔣凝學四千人朱品隆三千五百人列陳攻寇小勝壬辰平旦分三道東攻小池西攻羅山中攻東堰東堰者寇屯也而陳玉成精兵據羅山既合戰多隆阿併西中軍自將攻山間寇亦大出衆當之馬軍突而前寇少卻小池寇分四道鈔官軍鮑超唐訓方合擊先敗之遂合軍燒寇營東南風大急燎及山腰寇棄屯走三十里軍械委積燒屯館柵壘數百俘寇三百人斬賊以萬數其夜太湖寇遽走甲午潛山寇遽走於是論功休士林翼曰潛山知縣葉兆蘭結民兵立五營爲官軍轉運使天堂屯軍得自固功第一免論失守罪并超擢兩階奏獎安徽宿松等四縣民團二月分蒞翰慶等六千人援浙江未至杭州陷閏三月江南大軍潰退四月蘇

州陷

詔曾國藩署兩江總督分鮑超等兵萬人屯祁門起都興阿將江北軍分兵千人李續宜曾國荃既至軍乃復進國荃領萬人圍安慶多隆阿領萬人攻桐城續宜領萬人屯青草塢游擊應援七月戊申多隆阿攻桐城西北不克寇倚桐城牽安慶又知官軍精銳在桐城設守甚固城西北求雨領勢臨城寇作石壘環以二丈石壕與甌壘水堡相輔已酉多隆阿躬率三千人出領後陽列騎兵攻城夜半領後軍聞聲寇馮壘自以官軍不能近雖據領上無益未之備也多隆阿令三千人合築礮臺三比礮臺成賊寇城壘在目寇驚以爲神功辛亥列隊移礮置三臺於是石壘及城寇俱伏匿知困矣十月甲戌寇援桐城號十萬多隆阿先屯掛車待之寇帥陳玉成增壘不戰多隆阿曰賊始至而閉壁此欲老我師也然以援城爲名而不能戰寇衆心不能知其機而形勢已餒矣宜悉衆合擊之破其一屯餘衆自走癸未建旗鼓率十八營分三隊薄攻之寇出戰敗還屯多隆阿喜曰賊將走矣飛書告李續宜約夾擊時寇勢猶盛癸未之戰斬八十人耳續宜軍屯新安渡寇又不出丙戌突攻續宜多隆阿親往援之寇復自退丁亥多隆阿謂續宜曰賊易與昨戰可知也請與共殲之戊子分軍自掛車掠寇屯而北續宜自新安渡掠屯而南寇不能守則出戰兩軍奮擊之俘千三百人拔出難民萬四千平壘館百四十追奔二十餘里玉成走廬江李續宜回援未至乙丑寇陷斬水丙寅陷黃州分圍麻城掠黃安孝感黃陂武昌大震李續宜舒保等渡江

拒之寇上掠雲夢德安隨三月寇分踞漢南悉精銳趣新廣濟還宿松辛丑寇至太湖多隆阿遣軍營之戰不利衆曰急發大軍拒之多隆阿曰賊新勝氣銳其來不攻我而亟戰以怒之敗矣令督還保大營寇亦疾趨入安慶丙午多隆阿移軍集賢關壬子諜言援寇復至挂車還屯高河甲寅寇自挂車列隊耀兵而退多隆阿曰此示假道不欲戰也然彼畏我甚宜示弱以誘之設伏兩山隘戒之曰賊敗必過東東起大呼西起應之過西東亦如之勿遮道勿畱行令突騎數百躡賊曰聞呼聲而進追不得過十里乙卯親率羸軍誘寇寇進則走寇分二隊以大衆攻大營以少半追敗者至新安渡伏發斷寇後退者還擊之寇潰而東東山伏鼓而呼西山應之東西呼聲動天地追騎馳至寇大敗爭走攻大營者亦收衆退皆走虜江胡林翼以李續宜軍弱奏增調駱秉章援蜀軍自安陸屯隨續宜屯滸口進攻德安四月陳玉成竊青草場空虛以爲桐城軍不能遠戰復分三道來侵多隆阿分五隊拒破之詔多隆阿以副都統幫辦官文軍務曾國藩自徽州移屯東流五月江西寇犯崇通西南邊屯軍潰遂陷興國林翼時疾病歐血強起還省城李續宜亦移屯城外於是江南咸甯蒲圻崇陽通城大冶武昌皆陷湖南軍北援寇還江西六月丙戌晦寇自斬出太湖七月庚寅東犯潛山連屯五十里以逼桐城多隆阿曰安慶寇危急今不急救而致死於我此所謂聲東擊西者也我能勝之則安慶自破何爲而使賊必戰卽稱疾三日不出寇來攻出擊者輒敗還丁酉寇乃引衆攻大營多隆阿自起擊之寇頻與多隆阿戰讞其旗及戰鋒銳甚後者悔其



輕進稍稍引退衆乃大奔猶屯高河相持安慶之圍也林翼計曰用兵之道全軍爲上得地次之今日戰功破賊爲大復城鎮爲下古之圍者必四面無敵又兵法十則圍之若我兵困於一隅賊必以老弱者居守而旁軼橫擾乘我於不及之地此危道也然不圍城則無以致賊而求戰故分三軍一軍圍兩軍戰寇知不可敗則間道上犯李績宜信用失人偵候不明反張虛詞以惑績宜南北馳驅不見一寇寇旣得德安則以爲圍攻二軍搖乃南還哨馬繞太湖城以撼大營林翼居城中不動或曰湖北巡撫何爲而入鄰縣林翼曰帥府所在卽官守也此潛山太湖二城百戰得之吾居守一二年猶不患寇寇亦竟不至林翼旣還鎮陳玉成復自英山繞宿松攻太湖屯軍登城設守三日而寇退丁酉舒保等克德安八月丁巳朔曾國荃克安慶語在曾軍後篇胡林翼病益甚奏以李績宜自代戊戌 詔報可辛巳 詔曰安慶陷九載楚軍合圍胡林翼畫策督剿攻克堅城厥功甚偉加太子太保銜給騎都尉世職其日林翼薨多隆阿聞安慶克策桐城寇必走留軍收城自要寇宿松先一日至寇方從潛山西趨遇官軍驚走黃梅馬步追奔四百餘里廣濟斬黃次第盡復聞林翼之薨回屯挂車湖北平

## 江西篇第四

水軍興而寇不得志於江漢則北出潛太南掠院南以窺江西寇徒多南人樂南侵故江西尤受其禍會國藩自九江移屯南康思整軍出江謀進取非爲江西戰守也然寇已由都昌攻饒州別由東流建德窺樂平屯景德鎮東犯祁門休甯咸豐五年二月國藩奏言以湖北安徽江西三省論之攻寇之道水路一而陸路四自漢黃新瀨江至望江爲外一路自斬水達宿松爲內一路自九江上興國崇通武甯爲西一路自湖口下至徽甯爲東一路四路當四軍而臣祇一軍分則立弱欲不分則事勢迫之今東路已告急矣塔齊布留五千人圍九江羅澤南以三千人攻饒州臣獨與內湖水軍相依寇衆我寡所憂方大三月寇陷弋陽羅澤南攻克之寇還破興安踞廣信澤南至一戰大捷三日城復寇走玉山江西軍因收饒州五月崇通寇犯義甯知州葉濟英城守江西軍往援敗沒糧儲道鄧仁堃議江西民多畏寇不肖治團守好人反因寇爲利潛相導引所至輒陷唯義甯倡義扞寇官民同心功節彌厲且棄牧嘗振湘軍達援省城爲西屏蔽宜悉力赴援以風示列城今省軍無可遣唯羅軍可用巡撫以澤南客軍當還攻九江又與曾不相能不肖言用客軍固請乃許然中止者數濟英守十九日城陷死之士民殉者千數省城震動乃遣澤南七月軍至梁口遇寇敗之寇悉衆踞杭口澤南取間道據繁頭連營城西北諸山寇分兩翼仰攻敗走明日登山望城中謀攻取城寇懼官軍得形便遽出爭山官軍馳下擊之寇大敗遂棄城走丙子義

甯復戊寅塔齊布薨於九江澤南還南康八月攻湖口不能破上書請率所部西援武昌國藩念攻堅老  
我師日塔齊布在時九江俯不下今獨一澤南宜置之用武之地因聽其計更遣塔齊布舊將彭三元等  
從行合五千人彭三元者敏戰名一軍塔齊布薨軍中皆以三元爲代將而周鳳山起行伍治軍號爲有  
條理三元徒勇故鳳山得統大衆竟債軍事三元從羅軍亦敗死崇陽語在湖北篇澤南旣去水師無陸  
軍相輔以幙客李元度募平江人三千屯湖口十月澤南軍復浦圻鼓而北行寇乘虛復入蕪甯敗江西  
官軍遂陷新昌瑞州廣東土寇出湖南入安福陷臨江合瑞州寇陷袁州江西湖南阻絕軍勢不能振江  
西水陸軍徒名具耳十一月周鳳山解九江圍援臨江寇分黨圍吉安知府周玉衡以先禦土寇功擢按  
察使未上留治城守與署知府陳宗元同登陴屢敗寇鄧仁堃言於巡撫曰蕪甯可墜也請先援吉安議  
者以寇蔓延宜先防省城扼章榭鎮國藩恐縣軍深入不利而巡撫貪倚湘軍則亦推以曾公意不欲不  
敢言調遣仁堃用司道公文驟移鳳山揚言移軍往援吉安聊以固城守心而與壽鳳山令自請遂不果  
行竟屯章榭焉

六年正月吉安守經七十日寇勢愈盛甲申城破周玉衡及文武寮吏死者四十一人自寇破諸名城唯  
湖北省官皆死其位吉安一府城堅守久於武昌府縣學汛屬官委員殉城尤烈士民從義者比於蕪甯  
聞者莫不痛惜頗咎周鳳山湘軍奪氣矣二月章榭軍潰寇以數十人追鳳山大奔不能止走南昌寇進

陷進賢東鄉安仁破撫州於是論者言周鳳山非將才援吉安亦敗或曰鳳山早入吉安馮城守得周五  
衝左右之可皆不敗及敗湘軍無大將乃令李元度自湖口移屯撫州別遣鄧仁堃子輔綸及前平江令  
林源恩募新軍皆用平江人號元度所將爲楚軍輔綸等所將爲江軍是時仁堃方專省局欲倚以致餉  
而林源恩習平江防戰會有功雅善李元度故委權此三人未幾建昌南康相繼陷國藩移駐省城以駁  
船爲行臺彭玉麟將內湖水軍屯吳城三月羅澤南卒於武昌湖南授軍將劉長佑收萍鄉蕭啓江復萬  
載胡林翼分軍四千遣劉騰鴻將之以國藩弟國華主其軍道義甯收贛昌上高五月畢金科將千人防  
饒州黃虎臣將三千五百人攻建昌六月饒州陷畢金科還南昌益帥攻克之黃虎臣攻建昌輕出遇寇  
戰死所部軍移屯撫州七月劉騰鴻軍至瑞州國藩遣親兵四千人往會師寇避援軍攻贛軍新軍敗騰  
鴻馳救寇退走是時江西列縣陷寇者四十餘城 朝命廣東閩浙合援而江西司道亦各私立軍赴急  
學政廉兆綸居河口得專饒信軍事頗嘗巡撫文俊禛用將領營軍名號綵多而雜善布政使善齡以耆  
齡忌鄧仁堃因言臬司子不宜將 詔下其章於甘國藩文俊因罷鄧輔綸悉以軍屬林源恩合李元度  
軍持寇撫州廣東和平土寇犯定安安遠信豐長甯上猶崇義雩都省城不能救軍報數月不相聞八月  
甯都土寇襲陷建昌遂陷鉛山貴溪闔廣信知府沈葆楨從學政督餉河口聞警還城居民蚤散走葆楨  
嬰空城與省軍阻絕飛書玉山告急於浙將浙將饒廷選故葆楨與林則徐部軍有兵二千人以則徐舊

思惟建康之在遠軍無部伍唯將畢定邦顧高翔頗敢戰其行軍不齊糧止不爲屯故於赴急易軍至  
廣信之明日賊奔至以城有糧五日而去江西恃賊信通鐵貨爲餉原聞廣信能守則以爲奇功湘軍  
久無功則益銳九月國書親詣瑞州李元度以撫州不克餉益乏乃分軍略旁縣欲募糧饋且分寇勢  
戊午收宜黃安收崇仁是日城寇出攻江軍營官耿光宣中礮死援寇偵官軍勢蹙日夜從津坊增衆  
善江軍屯因縱火燒民居延及營帳林源恩杖劍叱奔者不能止軍潰源恩死元度突圍免圍撫州軍俱  
潰移元度屯貴溪十月寇復陷宜黃崇仁分陷金谿福建援軍將張從龍圍建昌軍潰副將陳上國戰死  
時特詔起用費冕知吉安府冕請率軍往以國書弟國荃爲軍主湖南巡撫別用周鳳山領一軍軍餉  
悉自募合六千人又別遣援軍水陸二千一百人自長沙向吉安而贛州南安知府汪報聞周汝筠等率  
自募土丁禦寇計畝徵稅號曰田勇亦頗有廣東援軍田勇多至數萬皆不能取當是時江西分爲四院  
司羣官居南昌一城以軍事聽諸將巡撫唯主其奏報焉袁州吉安瑞州則皆湘軍而瑞州軍最強李元  
度屯黃溪防廣信以金科屯饒州金科兵最少戰最力曾國藩居水軍中江西諸軍偏伍彌縫不能有大  
損益然劉于濤以水軍起純用江西丁勇段起鍾世楨樊俊等以湘人獲用江湘軍亦頗有名劉長佑屯  
袁州除八月十一月甲申朔寇將李能通啓西門納官軍袁州復江西諸軍稍振矣丁卯曾國荃收復  
丙子湖北軍克武昌漢陽水軍乘勝至九江十二月國書至九江粵軍丙戌段起收建昌縣己丑湖北軍

進收瑞昌德安辛卯劉長佑進收新喻丙午湖南援軍將劉拔元胡兼善收永甯永新蓮花應崇義上猶七年正月丙午瑞州圍軍將曹承堯吳坤修別攻奉新克之曾國藩至瑞州勞軍因督攻城乙卯畢金科攻寇景德斌丁巳遇伏死之金科臨沅人本從王國才以勇見知於塔齊布將千人久屯饒州列將多忌其能讒妬之餉不時得金科益不與諸文吏相結納獨倚曾國藩而國藩不主諸軍餉歲暮益困先是西安將軍福興將江南大營軍千人至饒信督軍與湘將尤阻格金科軍乏食問計府縣或謬謂金科能克景德餉可得也金科輕軍遽往寇屯市後金科率十人問行突入寇屯寇驚起圍之殺七人三人者傷金科所當輒顛仆踐血出走寇死者數十憤且恥聚火器環燒之死金科之戰也負槍腰弓挾五十矢二卒前持丈二矛八尺刀怒馬突陳寇莫敢拒亦以輕敵故每獨勝輒無功陵侮諸將不肖與他軍合省城委以東防漫不爲之繼及其死饒防諸軍皆潰寇掠弋陽陷鉛山饒信駭然矣二月曾國藩父喪委軍徑還湘鄉聞者以其不俟 命懼嚴譴 文宗先得湖南奏則給假令歸治喪比國藩奏上 朝命已下於是天下知 天子使臣以禮莫不感奮焉國藩既去福興至瑞州視師諸將汎以客帥遇待之福興還南昌因上奏請徵兵頗言勇丁不可用三月撫建寇東窺福建陷光澤邵武張從龍等敗退 詔奪官治罪並罷文俊以耆齡代之胡林翼遣李續宜來瑞州代曾國華劉長佑攻臨江不利退屯新喻袁州三縣民以長佑師不擾爭率丁壯助軍軍復振四月湖南軍自桂東進攻龍泉劉拔元戰死胡兼善兼領其軍以袁

州敗益遣王珍將三千人助長佑長佑已大破寇進圍臨江珍移軍吉安破援寇於水東閏五月胡兼善獲逃寇林預信誘降龍泉僞官復其城周鳳山屯吉安謬上爲己功 詔下賂乘章乘章因劾鳳山事下省齡未幾鳳山軍覆事罷不問六月胡林翼以寇犯斬水檄李續宜還黃州起曾國荃復領吉安軍甯都寇援吉安王珍逆戰破之退奔至廣昌分軍收樂安丙寅吉安寇攻周鳳山屯軍士揚言餉匱不戰而走趙煥聯等軍從之皆潰退屯安福曾國荃收衆並退以乏軍奔黃冕官冕言鳳山軍餉不由己且餉多於諸軍二月福興檄鳳山還南昌調浙將李定太合攻進賢黃冕請疾歸國荃專吉安軍事劉騰鴻之圍瑞州也頻破援寇嘗以三百人敗萬衆作長壕以困城中圍攻一年所役作壕壘如數萬人之功城寇知死乃突圍力戰七月庚辰劉騰鴻攻城中礮傷明日更戰軍士知騰鴻志必克爭致死盡破壘壘礮丸雨下中騰鴻脅仆弟騰鶴扶之強視語曰城不下無斂我軍中皆泣冒礮登城斬殺強寇大半除道開門迎騰鴻尸入治喪聞見者莫不悲壯其志以爲騰鴻能用衆也騰鴻於諸將位最卑名最重求所爲戰畧無以異人至於攻城以力求必克非將帥之道然臨死一言而使士卒忘身殉己若報私忿以成其志雖塔齊布多隆阿莫能逮騰鴻死而所部稱精兵至今聞其名凡曾從騰鴻戰者皆服其勇在湖南諸將中名欲過李續賓矣乙酉江西軍將鍾世楨敗於進賢丁亥寇自撫州犯崇仁趨樂安王珍拒破之壬辰李定太收進賢撫州寇分犯徽州畢大鈺戰死婺源八月王珍卒於樂安以張運蘭王開化分領其軍珍之將者

以少事衆事已自喜故初起所至輒語獨左宗棠奇之恒留湖南擊土寇曾國藩歸乃遣援江西尋寇賊聚聞珍至輒走諸軍將與珍合屯者皆推其能然珍部下無名將張運蘭等兒爲探殺於湘軍爲別派差近李績宜異乎羅澤南劉騰漢云臨江援寇敗普承堯於峽江湖南援軍將楊虎臣屯新喻張運蘭等屯分宜未進援寇趨太平墟規圍軍城寇皆填壕伺夾擊劉長佑留軍守壕自拒援寇江忠義蕭啓江等突陳大破寇燒其屯四十七九月丙戌李績賓合水軍克湖口彭玉麟出江克小孤吳德寇合安仁金溪瀘溪土寇犯貴溪李元度拒戰不利還城固守十四日寇退趨東鄉李定太周鳳山禦之壘未成寇襲破鳳山屯殺虎營軍主帥遠燁遠燁名家子早入翰林祖父承瀛爲浙江巡撫還葬時殯供甚盛及寇亂黃梅姦人發其墓遠燁發憤思復讎走謁曾國藩國藩以憂歸遂游軍中時湘軍樸魯凡京朝官從軍者皆帕首屢刀習勞苦無敢鮮衣美食而遠燁雍容文儒與服都健雖強自刻厲趨踰言論燁如也見者傾慕皆歎曰衣冠中自有人且勸遠燁宜居幕府遠燁奮欲自將又以前上封事歷証軍機封疆大臣大臣切齒非立奇功不足自表異乃募千人自效倚鳳山老將與合屯及寇至鳳山先走新軍見前屯破則大潰遠燁一出而軍覆身化鳳山三偵軍三奪官江西終莫能罷其軍寇遂犯進賢復自崇仁出豐城鄱陽寇出彭澤謀率臨江九江軍兩城圍已合寇不能進十二月乙卯克臨江劉長佑以疾歸劉坤一代領其軍蕭啓江自率所部爲統將仍與坤一會攻撫州豐城寇南趨吉水張運蘭等拒之寇還峽江



八年二月臨江餘寇合撫州衆東趨廣豐福興自河口退駐廣信建昌寇分黨入邵武建甯湖林翼奏勅福興請以李元度防浙邊 詔遣李定太仍留李元度屯黃溪湖南增軍助圍吉安三月壬午蕭啓江劉坤一王開化合軍收崇仁甲午啓江進軍上頓渡戊戌建昌寇援撫州坤一迎戰破之四月壬子李鴻賓克九江甲寅南豐寇棄城走王開化分軍屯南豐寇復還合廣昌土寇來攻城王文瑞拒走之壬戌啓江合江軍水師將劉干瀆設間謀約內應丁卯復撫州丁卯建昌城寇出走王開化張運蘭合軍要之寇走新城己巳復建昌撫建寇多烏合土寇散處鄉野官軍進輒鈔擊然無精勁故諸軍大集輒遜悉由廣豐犯衢州進陷處州福興屯衢閩浙軍近三萬莫能拒守 詔遣運蘭等援浙五月起曾國藩督浙江軍六月召福興還京師留劉長佑軍屯防江西以張運蘭蕭啓江軍從援浙閩國藩之歸也中外交章言宜起復國藩奏謝因言督師權輕於督撫州縣慢不奉令餽餉不繼而軍將爲人侮辱安徽浙江巡撫乃故詰問所刻關防或先認頌欽差大臣乃移文正其名以相窘諱故久居江西無所補益及去江西而入府城次第皆復以湖南援師軍餉自巡撫一人出故也軍興欲遊敗莫若將一軍欲成事則必兼督撫湖南北效可睹矣然始擬義師由國藩軍將視爲轉移福興等徵調置不訾省得國藩一紙千里赴急胡林翼初從國藩及其得位行意欲倚國藩定兩江頻奏訴其屈 文宗重奪情未遽強起之也浙事亟乃 詔遣督軍而兩湖江西爭願供其軍餉時國藩久謝事無舊軍諸名將後出率皆起羅王部曲獨水軍將練彭

楊而楊載福已提督官品高於國藩由是負沈滯重望亦鬱鬱不自得更欲以和輯收衆必頗悔前者廣  
爲是時駱秉章委事左宗棠湖南諸將伺宗棠喜怒爲輕重胡林翼治湖北軍餉最稱富強者勸會慶事  
國藩又以其當往浙閩無偏處嫌視文俊陳啓邁時禮敬有加三省一家號爲大和七月胡林翼以母喪  
歸劉長佑移屯建昌八月國藩自湖北入九江至湖口徵軍萬二千其將名者張運蘭蕭啓江朱品隆吳  
國佐時浙江已解嚴寇屯崇安連營及建甯邵武分黨還攻廣豐玉山李元度守玉山分軍援廣豐寇走  
德興元度獨將一營從國藩而悉以平江軍隸沈葆楨邵武寇復出漣溪劉長佑戰不利遂陷金谿安仁  
張運蘭尾之收安仁吳國佐新出銳欲攻寇與運蘭期合戰先入被襲軍敗劉本傑陷寇死本傑久佐王  
珍軍負時名以不能騎爲追寇所殺運蘭失期故不敗寇亦略新城東走而劉長佑北攻金谿寇大破之  
寇悉走福建邊國藩移屯建昌吉安寇東犯宜黃將悉趨邵武會國荃等乃作浮橋水陸合圍寇結大筏  
衝橋壘斷輒續之寇懼頗有降者方寇之起以輕重剽駭爲利及石大開出始脅大衆所至踞守姦愚民  
多從之大開怯戰而寇黨新附不自固見圍則又悔懼思反正袁臨旣以誘攜克定吉安民亦潛通官軍  
寇將亦奉大開令期會福建乘輜水駕小舟繫大筏順流遞走餘衆潰散戊午夜收吉安江西列城皆復  
十月劉長佑軍疾疫移屯撫州疫甚還湖南散遣羸病因留募新軍張運蘭進軍邵武寇復還江西南據  
信豐北犯景德李續賓覆軍廬州官文急奏國藩自助十一月寇自信豐犯南粵國藩奏言今臣當援皖

而江西寇東南斜距千餘里勢不能合并分遣蕭啓江援贛南以張運蘭吳國佐攻景德吉安軍將朱品隆等爲親軍從屯建昌寇踞景德率大軍議者言宜急擊吳國佐者左宗棠所拔用以童生領軍奏敘主簿張運蘭積功至道員湘軍法營官不相統者無階級皆平等統將雖九品官其營哨官至一二品階聽命唯謹運蘭號爲大人國佐部曲亦號國佐爲大人以敵之國佐喜言兵運蘭拙訥然自命宿將積不相能又用金谿失期事相怨望而國潛欲其互相濟固命同往十二月庚申合攻景德王文瑞吳國佐當中路張運蘭分左右繼進文瑞等接戰寇退走運蘭復失期寇見無繼還鈔官軍國佐禦之寇遂直前攻文瑞復分鈔其右文瑞國佐戰且退死者百五十四人於是國佐上書求退文瑞亦不直運蘭己巳運蘭獨攻寇寇伏無聲久之白旗數十騎臨水欲渡保擊之皆還走竟不出戰日暮運蘭收衆寇吹角出大衆乘之運蘭反旆渡水文瑞揮衆繼進寇敗去保景德罷國佐軍還湖南運蘭自此專景德戰事其後朱品隆唐義訓李榕諸軍皆以持重不戰全軍爲上及李續宜諸部將成大吉毛有銘等專求自全湘軍鋒銳始頓矣劉騰鶴等自吉安移屯九江以應湖北

九年正月蕭啓江至贛州寇屯新城墟衆號數萬己丑啓江遣田勇三千誘之寇爭出赴利啓江揮軍推鋒直進大敗之明日寇出彊衆數千啓江分軍迭戰又敗之毀其屯辛卯寇設伏誘田勇田勇貪鹵獲倚湘軍無所畏集者四萬啓江曰衆而不整必敗棄之不可遇伏果敗蹂湘軍人相鬪廂湘軍敗胡中和等

力戰斷後死者二百六十四人癸巳啓江復獨挑戰寇不出辛丑官軍遂至城下南安故有二城夾水寇分屯相持軍至皆棄而走啓江約軍屯城外作壘自固令曰入城者斬二月壬寅朔寇果還南城癸卯攻之寇敗走啓江喜曰寇狡而弱吾直驅之耳遂入城城寇亦走乘勝攻信豐辛亥寇悉走趨郴桂閩浙餘寇皆趨郴桂所謂石大開三十萬衆復圍寶慶者也安徽寇自婺源走建德窺彭澤劉騰鶴拒戰辛酉敗之玉虹橋已已進攻建德寇礮中火藥軍驚潰騰鶴死之國藩移屯撫州增遣撫州屯將屈蟠戍湖口益募三千五百人坤朱品隆更以張岳齡凌蔭廷爲營官調玉山防軍助攻景德而檄蕭啓江自吉安還援湖南五月曾國荃至軍率朱品隆等軍五千八百人助張運蘭景德軍相持七月寇久益懈水陸二萬人莫肯先進國荃至乃令移屯敗援寇於浮梁南六月大雨水軍將任星元合劉于瀉乘水進燒寇屯寇走浮梁國荃等追之癸丑復浮梁寇走建德北去江西少定乃遣張運蘭還湖南援寶慶國藩帥諸軍出九江八月至貴州九月議合湖北軍攻安慶寇併力於湖北軍而石大開潰於寶慶狂走廣西益西去明年寇陷蘇杭國藩督兩江以江西爲根本其疆弱輕重與初敗九江時絕殊語在後篇

終



曾軍後篇第五

咸豐九年秋江西湖南寇漸平湖北巡撫胡林翼方治軍儲餉以平寇爲己任而寇帥石大開由貴州窺四川湖北餉倚川鹽四川又饒富獨未被兵議者皆以防蜀爲言且以曾國藩久治軍無疆寄爲未竟其用林翼頻說官文合奏請 詔國藩援蜀黨 朝命授以總督 詔唯令督軍無後命林翼又議客軍孤縣愈非計安徽寇合捻寇慶豐將爲楚患乃改議留國藩合謀皖分三道各萬人都與阿楊載福循江攻安慶國藩出太湖取桐城林翼自英山鄉舒六袁甲三時屯臨淮聞之以爲今楚軍大舉而安徽兵弱將驅寇北宜由光山北透蒙城具奏以聞 詔官文國藩林翼計萬全謀定而後勦國藩上議曰竊號之賊與流賊異今之張秀全踞金陵陳玉成踞安慶私立正朔僞稱侯王竊號之賊也石大開由浙而閩而江西湖南廣西貴州流賊類也黨衆蓄捻分合無定亦流賊也流賊當豫防以待其至堅守以挫其銳竊號者當蕩除枝葉攻所必救自洪楊內亂凶饑久衰徒以陳玉成往來江北勾結羣捻故皖北糜爛日廣江南賊糧不絕臣等以爲廓清蕩掃必先攻金陵攻金陵必先屯滁和取滁和必先圍安慶誠能圍安慶攻廬州略取旁縣使其備多力分何敢北顧哉且不特不敢北而已並不取東顧江浦六合蓋竊號之賊未有不竭死力以護其本根者也中原腹地莫要於皖固不敢謂石大開必無入蜀之虞而就大局論緩急臣自宜回軍援皖以速蘇民因十一月國藩移屯宿松是時蕭啓江援四川張運蘭還湖南獨朱品

隆唐義訓易開俊張岳齡等從而湖北大將都與阿夔疾荊州李績宜告歸湘鄉多隆阿鮑超新貴重皆樂爲林翼用憚國藩嚴國藩亦不樂二將皆推林翼節度悉湖北軍圍攻太湖十二月多隆阿又撤太湖圍屯小池拒援寇援寇號十萬潛山太湖寇踞城者號數萬軍事危險多隆阿意氣自如國藩憂之乃悉發已親軍圍太湖語在湖北篇

十年正月壬辰湖北軍大破寇遂克太湖潛山二月寇陷杭州三月杭州寇退李績宜至宿松定議分三道圖安慶乃遣朱品隆等進屯集賢關多隆阿進規桐城而續宜爲後援以助二軍閏三月會國荃來領安慶軍江南大營軍潰四月蘇州陷 詔加國藩兵部尙書銜署兩江總督胡林翼喜國藩得大用與書曰兵事當布遠勢忌近謀公言南岸分兵一由池州取蕪湖一由祁門出徽甯一專守廣信防江西此皆內軍也取餉江西而惟議釐捐以錢漕歸巡撫愚又以為隘矣以湖南北爲兵之本以江西爲籌餉之本待三省協防而後謀吳非一年不能夫吳越人之毀譽怨望雖不必問而吾等悲閔之懷與吳越人仰望之苦最難爲情也吳督之任以包摩把持恢廓宏遠爲用鹽漕得人何事不濟不患貧也蘇常失守以後督撫監司或死或未死或已補或未補進賢退不肖此其時矣今宜起兩軍一出杭州一出揚淮先調屯守之平江軍五千馳入杭州拯其急而取其財而令次青募五千人繼進拘守廣信無當也杭州失駐衛州杭州存進湖州此平吳之先著已霞仙季高當各募六千人爲皖南揚州之用或爲江西之用爲隨征

之用少泉可治淮上之師合水陸萬五六千人而以多都將馬隊幼丹宜奏爲西藩二李或甯藩或蘇藩則兵餉一家矣大局安危視公放膽否耳近者葉督兩廣而不知廣西爲何人所轄何督兩江而割皖南割皖北并割江北矣福爲皖撫而割南岸棄以予浙江又割淮北棄以予袁公其日蹙百里宜也徽甯猶完布置粗定當鼓行而前與懷桐之師會於當塗然後湖州軍出於蘇常揚州之馬飲於江浦林翼雖孱弱不覺其言之汗漫也急脈緩受大題小作則恐或不濟國藩得書壯之然其再出也行兵持重必無後顧而後動謹官守和衆心以懲補前失不能用其讖將進甯國猶惡其險乃移駐祁門乞鮑超全軍以行而自將朱品隆張運蘭合萬一千人五月戊申渡江六月癸酉至祁門檄李元度募軍三千左宗棠已奉詔襄辦則令領五千人鮑超方還夔而張運蘭在郴俱期八月會兵丙戌 詔國藩補兩江總督授爲欽差大臣時曾國荃雷圍安慶與多隆阿李續宜皆爲湖北軍袁甲三屯淮上自爲一軍巴棟阿爲鎮江軍李若珠爲揚州水軍王夢齡署漕督爲清淮軍薛煥署總督爲上海軍張玉良收潰軍退杭州猶稱江南大營軍周天受屯甯國張芾屯徽州爲二軍江長貴將杭州軍米興朝防廣德皆王有齡主之爲浙江軍皆各專奏不相咨稟寇踞蘇州則東犯松江西陷金壇南破嘉興杭軍退敗而高澹寇復南出廣德池州寇東掠旌德涇蘇杭人皆謂國藩宜援杭湖論者或以爲輕騎至淮揚則不制於寇而業已至祁門則又以爲宜急據甯國當前敵遣左宗棠等攻廣德指南陵合陳大富軍與楊載福水軍相連待安慶克而



合師國藩歎曰夫言之甚易行之甚難今進無所往勝無所益何爲而輕舉乎八月 召張芾還以國藩兼督皖南軍令周天受聽調遣戊辰甯國陷天受死壬申以李元度爲皖南道將三千人屯徽州張芾軍萬人分防諸隘實不任戰守軍餉久乏倉卒遣散以索餉謀居城中國藩先議守徽使朱品隆覘地形品隆言非精兵二萬不能守而元度前守貴溪有功自許能守之國藩又以元度新軍不能野戰故浙江請援不赴俾馮城以自固元度至三日土寇散軍結連甯國寇而旌德寇透績溪闖入黟山關元度急請援大營時鮑超假歸無統將張運蘭方攻旌德前後爲寇所絀乃以散軍四營往至則寇已大至四營潰還走休甯徽州城中軍皆大奔元度遂南走開化癸未徽州陷前皖南道福咸死之國藩急檄運蘭還而促鮑超赴軍自太平南還屯漁亭寇益西趨陷休甯將攻祁門大營軍中大震凡前言祁門可屯者皆更請國藩亟去國藩度寇必東南窺空虛乃咨左宗棠率新軍屯樂平寇果分陷淳安嚴州九月庚申鮑超張運蘭合攻休甯寇敗之十月己卯南陵寇破黟嶺防軍陷黟縣城庚辰運蘭分軍拒戰不利鮑超遣宋國永往攻寇寇棄城屯廬村辛巳增軍大戰破走之十月廣東西新冠俱出江西前後趨建昌河口陷德興婺源池州寇攻建德敗屯將普承堯十一月連陷彭澤都昌鄱陽浮梁以左軍屯景德唐義訓自祁門救旌德水軍守湖口鮑超還助左軍寇復敗徽防嚴內軍入夥分黨掠玉山休甯寇出攻漁亭環祁門無安土屯軍皆歛兵自守

十一年正月左鮑軍合拒寇於都建界敗之遂收建德左軍獨攻寇婺源前軍稍伏中戰不利乘夜引還  
鮑超渡江援安慶圍軍二月移建德屯將陳大富軍合左軍屯景德寇從鄱陽東侵左宗棠聞之金魚橋  
未戰寇步景德破之大富赴水死大富前孤屯南陵有重名自拔出頻移屯未嘗令當敵至景德十日而  
死院浙諸軍將如大富者已幾能戰然其戰守猶不及張運蘭等故寇恆避湘軍祁門介寇中寇去大營  
二十里輒引去豈盡虛聲哉習戰不習戰之異也國藩之駐軍祁門本倚江西糧臺景德鎮轉運水軍暇  
船護劑以爲萬全至是前計盡虛左軍退樂平國藩親屯軍合三萬人糧運三十日不至衆乃爭言取徽  
州可自立又言可取皖浙江先是休甯寇無故而宵避張運蘭久屯休甯城寇亦不復來故疑徽州寇屬  
易攻三月庚寅國藩自將祁門軍進至休甯徵防軍會師癸巳進攻徽州大雨軍械多散失甲午還休  
甯戊戌復進庚子寇夜出驚我軍軍入營潰辛丑遣軍各還所屯國藩留休甯誓死守時左軍破寇樂平  
寇益遠夥敵黨往尋戰癸卯寇悉衆攻樂平城左宗棠亦悉衆出城擊之無部分唯視來寇隊分軍短兵  
接寇大敗遂走廣信趨浙江去甲申國藩留軍屯祁門自將親軍五百人出駐東流於是婁雲廣唐義訓  
防漁亭張運蘭守休甯朱品隆在祁門左軍往來廣饒鮑超軍專赴急禦巨寇裁自救不復論進取而寇  
每縱橫馳突動行千里北則自英山出破新黃遂北踞德安南則攻建昌撫州略吉安瑞州西出義甯擾  
崇通東則趨衢州略龍游湯溪據金華掠遂昌至義烏破處州卒真知其所爲議者以爲謀解安慶圍城

又以寇無略特乘虛縱掠以爲戲要宜急破安慶攻金陵如國藩初議五月戊子鮑超至安慶攻亦聞寇屯力戰破之禽寇將劉瑜林礮城下以示城寇瑜林陷蘇常爲前鋒自恃其勇欲以孤壘逼官軍既伏誅會國荃軍勢自倍鮑超移攻宿松因援瑞州是日徽州寇襲陷黟縣梗源亭休甯軍壬辰朱品隆等合攻賊寇退走丁酉追寇領外庚子徽州寇棄城走得寇聚米供二月軍食左宗棠移屯婺源甫至汀州寇出德興迎戰敗之七月丙申多隆阿桐城圍軍大破援寇於挂车多隆阿與鮑超會湘軍大將寇與戰必悍黨多隆阿亦自恃威重不喜人節度不與人自助亦不輕助人故寇大上江西湖北一月陷二十餘城鮑超疲奔命則以李續宜軍游擊李續宜者名尤重於多隆阿鮑超及行軍忽南忽北殊不遇寇更奏調援蜀將劉嶽昭自助而湘江亦奏起李元度將軍援浙由平江出崇通寇乃東南走於是寇帥陳玉成合羣寇屯挂车謀覆多隆阿軍多隆阿擊走之寇退屯石牌絕其運道議者復請徵鮑軍多隆阿笑曰吾運道不易絕比吾軍糧未盡賊已走矣庚戌鮑超追瑞州寇至豐城壬子寇走撫州八月丁巳勦會國荃克安慶當石牌之被寇也寇分黨襲國荃屯後攻戰六晝夜屯堅不可入程學啓復攻城外寇破三石壘國荃弟貞餘作屯菱湖合水軍絕寇糧陳玉成屢敗不得進乃相率遁走安慶既復 文宗崩胡林翼亮 穆楨立以彭玉麟爲安徽巡撫移前撫李續宜撫湖北皆辭 詔選續宜安徽己未多隆阿克桐城庚申鮑超至撫州寇走貴溪辛酉超率檄救江北遠運軍是日水軍克蕪州丙寅鮑超至南昌聞貴慶復復還撫

州寇復得廣東新冠合大衆將西丙子鮑超軍至貴溪寇東走追奔六十里平寇壘七十進復鉛山多隆  
阿移桐城軍驅寇宿松黃梅廣濟斬李績宜收黃州劉嶽昭收隨嶽昭軍逐西九月曾國荃進攻無爲克  
之戊申克運漕鎮甲寅爭東關克之國藩移駐安慶多隆阿將二萬人收舒城廬江進攻廬州李績宜部  
將蔣凝學等將萬人屯六安霍山左軍屯婺源張運蘭等屯徽州李元度新軍出廣信寇悉赴浙江而皖  
北寇聚保廬州國藩軍分守安慶樅陽廬江無爲及運漕鎮東關不足乃令曾國荃益募軍六千謀進取  
而左宗棠議大舉援浙鮑超朱品隆等合軍進攻甯國凡五道並進軍勢沛然矣 天子新即位羣臣爭  
上書言事多推湘楚軍功以爲偏裨皆可督撫因益重國藩頗訾論江西浙江江蘇巡撫 詔國藩兼制  
浙江巡撫提督以下統江浙四省唯都興阿袁甲三不隸都中國藩皇恐三奏辭不聽始議援浙以江西  
湘軍將屈蟠王德榜段起及水軍孫昌國徽防將張運蘭悉統於左宗棠而以廣信漕糧奏令宗棠徵收  
餉軍又分河口景德婺源三局釐稅益之於是苗沛霖攻破壽州脅巡撫以要權遂踞霍邱懷遠以窺鳳  
穎十一月杭州陷寇分犯徽州張運蘭先以疾歸其弟運桂領軍城守朱品隆唐義訓還軍赴援品隆義  
訓常合屯不相能及俱出軍隙益甚品隆至城下寇來戰軍將不支義訓案兵不相救國藩聞之大怒遣  
讓義訓曰湘軍之所以無敵者彼此相顧也湘軍將雖有讎臨陳未嘗不相援故有晨參商而夕赴救者  
私怨情也公事義也爾獨不聞知平朱鎮危急三促出軍而不肯應是亂湘軍之制而湘軍由此敗壞也

不急改者將誰容汝吾行軍十年視將士如子弟至於執軍法以誅敗類必有餘矣又下檄品隆問狀義訓品隆慚懼相悔謝同上書謝請自今輯睦於是一月七捷徽州圍解國藩以軍勢已振 朝廷鄉用專而浙江全省地被寇江蘇士大夫朝夕請師乃奏薦左宗棠李鴻章蔣益澧李桓各授巡撫布政使又請命大臣督己軍餉 朝命副都御史晏端書專開稅局於廣州沈葆楨前屢 召不出至是超擢江西巡撫乃起視事而湖南巡撫毛鴻賓亦國藩舊交故吏及湖北嚴樹森貴州韓超皆胡林翼所薦用駱秉章督四川劉蓉以諸生徑用爲布政使李續宜劉長佑則本起湘軍於是西至四川東至海皆用湘軍將帥則皆倚國藩爲重略如胡林翼書所言包擊把持者東南爭鶩於功名矣

同治元年二月曾國荃新軍至安慶左宗棠軍入浙收開化三月上海具輪船至安慶來迎師以李鴻章率湘軍將及新募舒桐軍往應之鮑超克青陽國荃克巢縣含山和州鮑超克石埭太平寇衆反正者萬人攻涇縣克之曾貞幹克繁昌南陵張運蘭克旌德國荃合水軍進攻沿江諸寇屯丁卯多隆阿前軍將曾正綰等攻廬州城東南門石清吉等攻西門寇將陳玉成將援寇屯城東多隆阿攻其旁壘以致師玉成恃勇悍率衆三千來鈔官軍正綰迎擊交綏寇退據城北浮橋城寇先聞多隆阿至皆兇懼惟倚援寇自壯及戰開北門出大衆謀合擊東門軍方出城玉成退則驚以爲敗亦北走玉成遽斷浮橋遏城寇使阻水反拒城寇愈驚相蹂躪城散走石清吉等梯西南以登城內外寇爭走於是合蹙之斬賊數千計俘

八百四十七拔民男女七千餘人廬州復陳玉成走壽州將乞援苗沛霖沛霖聞玉成敗恐襲奪已棄又畏多隆阿之乘己也反欲取陳玉成自效玉成至屯軍肥水南苗沛霖陽稱疾遣其黨伏謁迎入城具牛酒犒三千人者玉成入導至館而閉城阻其從者玉成初不疑既登堂見几上陳縶縶乃悟怒罵曰苗生反復我死行及爾乃自速誅邪沛霖遂囚玉成及從者二十人獻於潁州勝保營而招誘餘寇寇或降或散去當是時多隆阿之名儼懾羣寇壽穎弭伏江南聞風相驚動國藩飛書約會兵多隆阿素以文官不可親且己不識漢文而亦惡儒吏即報國藩言軍事權宜專一以微示不與曾國荃同處國藩具言如先約一聽公指搗官文瑞多隆阿終不欲東而四川德安諸餘寇俱入陝西先已奏遣雷正綰赴援遂再奏令多隆阿自往陝撫及京朝官亦日言關中帝王都天下最要 朝命屬多隆阿 命下官文益自喜當上意決意遣之合軍江甯之謀不復聽矣國藩獨歎曰多公威名太盛寇知不敵則必入南山老林此所謂驥驥捕鼠者也與書官文言江南財賦比秦中何止十倍賊數衆多何止百倍曩者楚軍有大謀惟以書問往復不先恃奏取 朝旨以相壓故國藩不奏爭而上議於左右宜且止西行以圖江南官文案建議不宥止多隆阿留五千人屯廬州而身將萬五千人入陝西 詔授爲欽差大臣後類破寇竟死整屋焉壬申曾國荃克太平癸酉合水軍克金柱關甲戌收蕪湖五月甲申進屯雨花臺自向榮和春以兵七萬屯守八年卒潰退國荃軍合水軍不滿二萬國藩以爲孤懸無益未可進國荃議曰諸軍士自應募

起義人人以攻金陵爲志今不乘勢薄城下而還軍待寇則曠日持久非利也若舍金陵別攻甯國廣德或取穎壽則將士見謂置於閒地浪戰而怠怠雖鮑張亦益厭攻戰將去公而歸耳逼城而屯亦足以致寇軍勢雖危顧不可求萬全國藩許之會左宗棠亦言宜薄城圍攻之勢乃定乙酉上海軍樂寇新橋大破之李鴻章之赴上海也其大將曰程學啓學啓先陷寇中安慶圍合歸誠會貞幹約以內應爲效未及期夜率千餘衆叩貞幹壁門呼曰今事發與寇戰突圍至此追者即至矣吾所將皆精兵當入營助守不能釋兵公相信者開門納我不信急發礮擊我無兩敗也軍中大驚疑報貞幹貞幹屢屢出視下令開門納其衆追寇俄而至亦遂還去學啓由此願效死貞幹卒則從鴻章是時上海結英法二國軍復青浦嘉定攻松江號南路軍學啓劉銘傳潘鼎新郭松林將湘淮人攻南匯號北路軍寇悉衆攻敗外國軍再陷嘉定則併南路窺上海學啓將千五百人屯新橋寇夜圍之數十重礮擊寇尸平壕隄而登學啓乃開壁突擊寇駭卻鴻章自將來救前後合勢寇大奔外國軍見其戰自以爲不如自此上海湘淮軍始振六月甯國援寇分三屯與城寇各踞一門鮑超先攻城西城西者城寇屯也城寇倚援輕進超設伏鈔其後寇誤以爲援至則反鬪官軍合擊大敗之追至城下寇退死守乙丑援寇發南北屯衆攻官軍城寇出結陣與相應超分四軍擊之宋國永攻南屯陷陳深入燒二壘寇退而北屯寇棄壘遠奔城外寇盡奔城寇收衆入丙寅城寇復出東門犯官軍未戰引退鮑超自追之寇不入遠東走超又東追數十里寇乃返關超

引軍作圍陳包寇寇將軍馬突圍走餘下馬步從遂去得馬千匹俘寇裨將三百死者千計乃還軍攻城城寇皆長跪莫敢拒戰遂復甯國而甯國縣寇將獻城贖其死遂先驅克廣德既復三城或諫超曰甯國城未破而公自追賊至六十里城寇若攻公營進有疆寇退失所據此危道也超笑曰吾但知兵勢不知兵書蓋超之戰專剽銳其持重堅忍不如多隆阿而終未嘗敗沒其軍在湘軍爲無紀律然亦能相維繫乃竟以功名終云七月袁甲三請疾 詔李續宜代其事時續宜方以母喪歸語具臨淮篇微甯大疫兩花臺圍軍亦多疾病鮑超等不能軍國藩憂懼以爲軍行政取方利而天災咎重由己德薄任過恐致傾覆請出朝臣督軍以分己責 詔慰勉且以疾疫流行寇不能獨疆爲寬譬而疆將賢吏相繼物故軍中至無炊煙乙未程學啓克青浦李鴻章遣軍浮海克餘姚八月丙子克慈谿自上海軍出浙江江浙兵氣皆振閏月蘇常寇來攻會國荃軍多發西夷火器相燒擊復穴地襲屯壘連十晝夜不休九月浙江寇復來助攻國藩急徵援兵皆牽制不得赴國荃以三萬人居圍中城寇與援寇相環伺士卒傷死勞敝然罕搏戰率恃礮聲相震駭蓋寇將驕佚亦自重其死又烏合大眾不知選將比於初起時衰矣十月寇解去由九洲北渡敗李世忠防軍陷和含山巢其南走者合廣德寇西南掠績溪祁門徽甯安廬俱阻絕唯江上下恃水軍得相聯絡乃謀增陸軍徵貴州提督江忠義自廣西出江西視寇勢爲戰守以鮑超部將鄭陽和等隸李榕立爲新軍留李鴻章軍將張樹聲三千人助廬桐戰守召還李續宜遣軍將成大吉蕭



慶衍等攻巢和又益募五千人坤曾國荃圍屯自此統衆過十萬而左李各將數萬合湖北江西湘軍幾三十萬自餘援軍分布黔桂秦齊者又數萬連兵不得罷國藩日夜憂危以進攻江甯爲非計乃自行圍案視焉

二年正月國藩自安慶出巡諸軍屯是時曾國荃屯江甯城西南江北則楊岳斌將水軍屯烏江皆當前敵其南則羅逢元守太平屯金柱周萬俛吳坤修守蕪湖而彭玉麟將水軍屯濡須在江北溧水高淳寇時來窺太平蕪湖運漕東關寇反出濡須上與和含山巢寇相響應劉連捷毛有銘等屯石湖埠遏寇西南韋志俊守無爲城以通水軍其西廬江梁美材屯焉廬江北廬州石清吉守之舒城在廬州西南廬江西北蔣凝學守之舒城南桐城周寬世守之以南通安慶舒城西北六安凝學分軍守之北防苗沛霖南通霍山爲湖北邊防蕪湖南則鮑超守甯國屯高阻山而劉松山屯城中易開俊守涇在超軍西南吳廷華守南陵在超軍西稍北在涇西北朱品隆先守旌德以救青陽故移守青陽在南陵西南又西則池州以潁江近安慶無屯軍寇踞建平廣德甯國縣者西出陷旌德太平石埭南破績溪斷徽甯官軍徽州守將唐義訓恃左宗棠大軍爲聲援戊申朔寇圍涇壬子鮑超救涇入城屯軍癸丑出擊寇大破之追奔二十里甲寅超還屯二月國藩還安慶以曾國荃圍軍堅定水陸轉輸難退軍之議丁丑朔王可陞攻甯國寇燒其小淮縣屯鮑超分攻梅領廟埠屯皆破之寇犯休甯分掠旌德西侵彭澤鄱陽東繞池州圍青

陽和巢寇攻石湖官軍自己卯至癸未圍益急擒寇復南犯斬水卒卯寇攻太平屯將朱洪章洪章戰敗  
南北岸同告急均檄鮑超赴援超疑所往乃先石湖未至寇解去掠無爲舒桐廬江六安而還上海軍浮  
海攻福山寇屯破之遂解常熟圍三月進克太倉左軍將劉典江西軍將王沐攻寇夥復其城四月劉連  
捷蕭慶衍等合鮑超軍收巢含山和會國荃攻破江甯城南西寇壘九程學啓克崑山五月鮑超等進攻  
浦口寇棄屯遞走遂收江浦合水軍攻九泐洲四日破三隘奪州屯語在水軍篇蕭慶衍留屯江浦上海  
軍攻江陰劉銘傳破寇屯二十七郭松林破寇屯三十五滕嗣武破寇屯十三六月程學啓克吳江苗沛  
霖陷壽州奏劾軍將蔣凝學及逗留成大吉等降責有差國藩以餉乏辭總督 詔慰勉國藩李鴻章合  
奏請減蘇松太倉浮糧 詔酌中定額除故明積敝李鴻章分軍三道程學啓由崑山進攻蘇州李鶴章  
等由江陰進無錫淮揚水軍輔之太湖水軍將李朝斌由吳江進太湖潘鼎新等分屯松江上海常勝軍  
屯崑山爲前軍援徽池寇自二月出江西中踞建德鄱陽間左窺景德右出東流湖口江忠義未至席寶  
田先出撫州趨饒州劉典自徽州來總諸軍諸軍將段起王德榜王沐韓進春及寶田攻陶渡寇屯大破  
之丙子進春輕出遇伏敗退寇復張趨攻湖口國藩先遣李榕屯湖口及江忠義至壁堅山李榕新軍拒  
寇不利寇攻堅山忠義出擊之傷寇帥壬辰浙軍將王文瑞復黟縣庚子遣甯國防軍將何紹彩及水軍  
礮船援臨淮蔣凝學等防潁川霍邱七月丁未湖口寇退走都昌建德彭澤鄱陽寇俱東北走圍青陽銅

陵甯國涇皆被寇屯將拒戰各相持八月乙亥朔劉銘傳攻江陰寇內應官軍夜登城燒門樓餘寇突門走復其城丙戌李榕援青陽敗潰江甯圍軍攻城南東西寇屯頻破之乃遣超鮑還援而水軍將喻俊明及國藩護軍將喻吉三合江忠義席寶田軍先後至青陽刻期攻寇寇解圍走石埭超軍至南陵遂東攻建平庚寅程學啓攻蘇州破東南寇屯四無錫寇貨輪船自助周壽昌燒其輪船石埭太平寇頻犯甯國涇敗去乃詣朱品隆請獻二城及旌德以自贖九月壬子收三城散遣歸誠人四萬彭玉麟督水陸軍攻太平沿江諸寇屯進高澹高澹寇將請歸誠十月乙亥收高澹鮑超楊岳斌俱會師東壩寇震恐丙子易開俊自涇劉松山自甯國合軍收甯國縣東壩寇開屯迎官軍辛巳收東壩壬午連下建平溧水東壩既克皖南金陵蘇浙軍勢相連鮑超全軍屯守之王可陞守溧水李榕守建平歸誠人洪容海守高澹青陽石埭太平旌德涇及甯國府皆分軍屯守戊戌李鴻章復蘇州蘇州之合圍也程學啓軍所至輒破寇壘城寇諸將權不相下相猜貳因謀反正斬異議者閉門納軍然不交兵猶擁衆號十萬己亥出城者八寇將謁鴻章受二品冠服乃謁學啓學啓先已置人於坐數其罪悉引出斬之報鴻章鴻章大驚懼學啓入城諭衆衆皆聽命或頗散走而先與寇將誓約者曰副將鄭國魁恨負約涕泣不食臥三日鴻章亦頗咎學啓輕發且曰爲己甚君亦降人也學啓大怒還營將引軍去其營員奔告鴻章鴻章復過涇啓陽論他事笑語甚歡事乃解庚子安徽巡撫唐訓方收懷遠辛丑苗沛霖突蒙城圍被斫死十一月李鶴章等復

無錫進攻常州以應江甯圍軍程學啓出太湖圖嘉興以應浙軍潘鼎新等軍先入浙收平湖海鹽寇爭應官軍所至輒下遂收嘉善會國荃益募新軍增圍師圍城官軍遂至五萬人援寇還江甯城者皆不敢出左宗棠議以爲當分軍攻廣德國藩以寇勢猶盛而江忠義新亡懼軼蹂江西持不許李鴻章諸軍銳進深入宗棠復奏言嘉興常州可緩攻 朝廷俱下其議三帥卒各主已說守其便宜焉

三年正月戊申甯國寇西南掠績溪遣江北將毛有銘將六千人援徽州浙軍將王開琳先還赴急寇疾走舍徽州不攻北犯湖口南趨景德別黨由浙入玉山由閩入建昌均期會撫州徽州守將唐義訓不能禦毛有銘未至以戰事委江西語在江西後篇戊午會國荃攻鍾山寇屯克之時東壩屯重兵太平防輕移金柱屯軍助圍師及江浦廬江守將皆先率軍會城下新募軍亦俱集乃謀合圍寇之設守也環城多爲石壘尤重於北旣於鍾山作大城號曰天保又於山脊入城處作大城號地保官軍攻城西南不甚懼至進屯明陵則出衆力爭之向榮和春皆以此敗二年夏鮑超已作壘明陵前會當移軍自平壘而退國荃圍攻幾年破寇壘以百數終未及城北及破鍾山壘移軍屯守更增築壘屯軍五六千遏北道餘元武湖阻水爲圍城寇糧運絕矣丙寅郭松林等克宜興二月癸酉溧陽反正寇走江陰圍常熟攻無錫李鶴章還守無錫郭松林援常熟寇皆敗散程學啓急攻嘉興寇請降學啓瞰城中知其詐攻益力陳亡勇將何安泰學啓親搏戰薄城先登槍子傷額遂克之學啓養傷蘇州創已合一日獨坐深念有所恐誤發

創口血溢竟死自學啓之歸誠經百戰每戰料勝敗無所失或知當敗則戒諸將曰公等皆不善敗吾當自餌賊某時敗某時期某所來援賊可退矣諸將素懾服其能謹如約則如所言至其突陳陷圍見者以爲神兵夷將戈登尤敬之及其死以所建旗歸詫海國推爲名將焉江蘇之戰始上海終嘉興功成而學啓死其名位亞於多隆阿矣辛巳廣德州寇棄城走湖州自蘇杭江甯軍並進論者皆以廣德爲要害以官軍力不足不敢攻惴惴恆恐寇迸出及寇棄去乃知其無能爲始議鮑超進攻句容其時李世忠已獻還五河天長全椒來安六合滁州而鎮江軍將馮子材等亦頗出兵助攻句容丹陽江甯寇頻驅老弱女口出城以節食更於城中種麥刈草爲糧庚寅左宗棠克杭州三月壬寅鮑超克句容甲辰進攻金壇馮子材飛書請先攻丹陽乙卯解金壇圍伏兵茅山待寇寇果出中伏返走追奔五十里寇不入城城寇反出走丙辰克金壇乃還軍援江西是時浙江寇走徽州號二十萬徽防將毛有銘出戰輒敗寇深入江西前隊至宜黃崇仁南昌戒嚴四月庚午李鴻章克常州壬申馮子材復丹陽 特詔楊岳斌督軍江西尋授陝甘總督又 詔李鴻章移師合攻江甯捻寇自河南犯麻城議遣王可陞屯無爲李榕屯桐城未行寇復踞廣德趨徽州者日夜相繼楊岳斌鮑超皆西援乃以江蘇軍將劉銘傳屯句容鄭魁武屯東壩五月壬戌郭松林克長興於是江甯圍軍以城破可計日而李鴻章當來會師取借力鴻章鴻章亦讓功託言盛暑不利火器延不至 朝命促會師數急會國莖憂憤日約將士穴地隧城期必破而龍膺寇屯

所謂地保城者不得則形勢終不便乃日夜發礮攻之己巳奪其壘遂作礮臺其上穴其下又環城列隊十餘道並攻積溼蘆沙草高等城以疑寇使多備六月甲申地道成乙酉會國荃令圍軍百營皆嚴備別縣賞募敢死將士待城破先入於是李臣典等誓先登者九將日午地道火發城崩二十餘丈寇反然火藥下燒我軍朱洪章等乘城缺登張詩日等循城據北門彭毓楮據東門朱南桂羅逢元等皆梯而登寇散走或出城或還保子城夜半縱火燒城中因突圍出走黃潤昌等露立龍廣山袁大升等循城南遇逃寇要擊誅斬數百張定魁等追寇及之湖熟復俘斬數百人城寇多自焚或投池并洪秀全己前一月死其子洪福年十八九餘寇挾之走廣德洪福刻印姓名下列真王二文軍吏誤合二文爲瑣奏 詔言洪福瑣者以此江甯既復羣寇出掠者皆瓦解國藩奏上諸將功以所俘寇將李秀成言洪福已死於是浙江江西諸軍方欲張寇勢洪福又實不死李秀成者寇所倚渠首初議生致闕及後見俘寇皆跪拜秀成慮生變輒斬之羣言益譁爭指曰會國荃國荃自悲艱苦負時謗諸宿將如多隆阿楊岳斌彭玉麟鮑超等欲告去人輒疑與國荃不和且言江甯鐵貨盡入軍中左宗棠沈葆楨每上奏多譏譏江南軍會病疥因請疾歸鄉里散遣所部軍二萬五千人而克城功最受封爵者李臣典病卒蕭孚泗以喪歸大功雖成然軍氣憤鬱慘沮矣國藩本以憂懼治軍自幸平洪寇克江甯如初起兵時所望力言湘軍暮氣不可復用主用淮軍後以平捻寇然席寶田左宗棠仍募湘軍征苗回竟定塞外稜威天山烏覩所謂暮氣者邪

自國藩始擬用鄉農代額軍招之則來應之則去見湘軍者乃知軍利敵胡林翼左宗棠李鴻章皆由此起故各係其用兵之地而獨以國藩本指爲曾軍前後篇

水師篇第六

咸豐二年冬湖北巡撫常大澂奏言寇水陸攻武昌船廠充斥聞湖南大軍有廣西鐵船江南水師有廣  
 艇鐵船及中小號鐵船請調集江上下游乃可制遏賊勢斷其糧運 詔徐廣縉等飭行時武備弛徒存  
 水師名無船也徐廣縉奏有盧應翔以鐵船戰於長沙長沙人未之聞及 詔問乃知云陸建瀛防江有  
 大小三板八槳船向榮奏遣張國梁率湖南鐵船所謂湖南鐵船者以民船載鐵 詔徵登州水師船亦  
 募商舟及寇破武昌東下連舟數千皆商舟也祥厚奏言江甯留船十以分防蕪湖梁山已足矣其不知  
 水戰如此三年春九江陷向榮奏調外海戰船快蟹大巴百餘取海道至江南又調上海道吳健彰領挖  
 罟戰船温州總兵領頭舢等船備水戰而麟桂以練習船廠名及李德麟吳全美之徒稍有聞矣五月寇  
 既北渡淮河南圍南昌御史黃經上書言兵勢始請吳楚蜀疆臣各造船練士乘流攻寇乃指名及湖南  
 其時道路阻塞朝報不時至 詔飭賂秉章秉章以力所不及又凡言官論列例不行未甚省也曾國藩  
 聞湖北之戰船敗於田鎮謀守湘乃試連木筏載鐵橫湘水十月 詔國藩督練勇援武昌漢陽始命率  
 船廠赴下游而國藩亦先於衡州治水軍訪船制皆不知其狀筏成不可用羽檄徵軍日數至人人以逗  
 留爲疑乃歎曰今寇往來陽邏湖南北所費殆二十萬彼縱橫江湖非舟楫無與爭利害且成師以出當  
 爲東征不歸之計九江以上千里如洗奈何以倉卒召募之衆執盡脆之器徒步三千里以當虎狼百萬



之疆寇乎水師守備成名標者頗能言船廠事國藩亦自以意用商船改造爲長唇寬舷試發礮果不震而資費無所出乃奏截留大營餉銀八萬與水軍四千船二百其大自五百石及千餘石礮自二百斤至三千斤又推五日就渡船意爲短橈長槳如蛟足以人力勝風水奏徵右江道張敬修率戰船不果來而同知褚汝航奉檄代敬修造長龍戰船於湘潭先成名標於衡州造者曰快蟹三版閩越船制略備矣然非有法直以意消息屢改乃成其軍亦募操舟人爲之增設礮手其統將國藩自主之其裨將亦號營哨官純用儒生農氓或陸營弁丁其經營尺寸輕重之度數皆自慮度之而總督吳文鎔頗與同心時相商定焉四年二月船成凡大小二百四十輜重礮船百二十輜重民船百水軍五千分十營設糧臺舟中器物食用工匠畢備合陸軍五千發衡州浮湘東下軍容甚壯當是時吳文鎔以促戰先出敗死湖北水軍盡散而寇入洞庭步上犯甯鄉及遇水軍下寇遽退湘陰岳州皆復三月寇復上岳州防軍潰賴礮船以免丙午大風壞船深損大半戊申以陸軍敗還長沙整軍寇遂上犯屯靖港及湘潭城腹我軍當是時寇若從湘潭上游乘春水攻省城及從靖港乘北風來攻皆不過行二十刻勢危急我軍聞吹角及火光皆自驚寇竟不來四月己巳崩塔齊布援湘潭戰勝報未至軍中議曰陸軍敗皆潰死矣官及軍士心未散率水軍進攻水陸交爭冀一當於是議所鄉用水師營官彭玉麟定計全軍上攻湘潭四營夜發約明日國藩帥四營繼之比至湘潭十里止偵者還言塔齊布已大勝乃約水陸循城進攻盡收所掠商船百

貨圓委彭玉麟計軍士貪虜獲必懈乃悉縱火燒船貨火延岸上光燭數十里寇先本在舟中者倉卒不得走雖亦發礮相拒不能水戰傷溺者千計城寇失計棄城走燒寇船之日國藩帥四營下攻寇靖港敗還城中大震得湘潭水陸捷書乃大定五月寇陷常德水軍船方總巡哨小船莫能救然寇益不敢入湘六月山東登州總兵陳輝龍自廣州來會師廣東游擊沙鎮邦從廣西道員李孟羣自桂林來亦將水軍水軍益盛庚辰發長沙甲午渡湖前隊營官褚汝航夏鑾彭玉麟楊載福鄉導官何南青將二千人遇寇湖中遂屯萬石湖丙申分五隊蘇勝將先鋒船趨南津夏鑾繼之彭玉麟伏船君山楊載福伏船雷公湖何南青建旗吹角列陳於後寇掠商舟載礮陳南津持不進三版小船趨港中寇爭出三版陽卻誘之寇舟連檣上玉麟等鈔之商舟旋轉不利戰退則相撞礮燒沈百餘舟奪舟三十四礮十三其夜南津及城寇潛遯七月己亥屯南津庚子寇復上巨扁乘北風以壓三版三版斜進擲火燒寇火煙蔽江寇斫其舟工舟工愈亂遂敗去退奔七十五里奪寇大舟七十六自是寇不復上壬寅攻之雷鼓臺寇依崖自保進攻多傷會募軍懼楊載福曰今退我船不滿百寇十倍我敗矣非冒死出奇不得免躬乘三版衝寇屯直下彭玉麟中礮傷竟燒寇後舟寇爭還救乃大亂載福自此以勇略名與玉麟皆為水軍名將而陸軍有塔齊布羅澤南塔羅彭楊軍中無與為比壬子陳輝龍將後隊至南津聞彭楊等戰勝則以為寇不足破癸丑自將攻城陵磯湘軍頗疑南風下水難退輝龍曰吾習水戰三十年諸君無以為憂平旦發礮遂行

廣東軍旌旗鮮明刀矛如霜雪洋裝銅礮震山浦諸軍皆自失以爲不及褚汝航夏鑾請同行楊載福亦乘小船往觀戰沙鎮邦先進寇舟拒戰敗退輝龍乘挖罟大船至中流舟膠寇伏舟齊出鎮邦船已逼寇屯不得還諸小船來救輝龍水急風利反吹俱下寇依岸過我軍欲登陸則逼寇發礮恐傷前船寇爭來奪船汝航鑾鎮邦赴水死輝龍陷寇軍覆船礮盡喪寇乘挖罟還城陵磯挖罟者閩廣水師大艦也國藩初造船無之輝龍至乃造二挖罟其一以獻國藩其一自乘之既敗水軍損失大半然自此益知水戰利害閩七月戊辰朔李孟羣再攻城陵磯小利而陸軍大捷己巳楊載福等知寇將遜出要其舟寇皆乘小舟下走而鑿所得挖罟船沈之江中辛未悉平寇兩岸礮臺接螺山倒口六谿口入黃蓋湖還收嘉魚復蒲圻遂會湖北軍甲午進屯金口八月己亥王明山下窺鹽關寇水陸圍之三版六拒寇舟數十突圍出傷兩人耳甲辰楊載福巡沌口丙午湖北陸軍攻漢陽關未戰軍潰李孟羣棧岸擊寇陸軍得不敗己酉國藩來視師遂登小軍山望武昌漢陽寇屯寇來襲敗去丁巳燒鹽關寇船二百沿江寇壘九戊午楊載福等衝寇屯攻塘角遂至青山寇礮擊之三版人皆露立權船徐進有俯首避鉛丸者衆目笑之以爲太恥水軍之初立也謀避礮百方皆弗良至是諸言避礮者盡絀寇從城上望見相顧失色絕而逃者日殺百數不能止明日武昌寇棄城走漢口漢陽寇皆乘夜具舟遜武漢之復不勞力由劫水軍使寇震怖無策故千里無留行焉下江屯寇聞之兇懼以水軍不可與爭鋒則據江險悉衆屯田鎮九月丙子前軍攻

新州寇馮城不敢出陸軍後屯溥源十月丙申朔會陸軍於田鎮寇壘連四十里夾江爲五屯據半壁山鐵索纜江連舟承其下上作大筏列礮橫中流守以礮艦其下游寇舟五六千率掠過商民船以供運載自江甯陷後通江諸城鎮無甯日以此也己亥羅澤南等攻山大破之絕崖下斫江瑣明日瑣復續國藩令曰水軍牽於斬城斬寇舟城相掎角形勢不便宜分船衝下游得至半壁山合陸軍而屯破賊必矣癸卯彭玉麟楊載福順流移屯斬寇戰艦不能追唯發礮與岸上礮迭擊哨官蕭世祥中礮死軍士多傷竟下下十五里止乙巳斬舟寇乘西風走保田鎮丁未進屯見峰炬癸卯屯十六里田鎮九里玉麟載福間行入塔齊布軍謀合攻還分船爲四隊戒曰各有司誤者斬待令而後動備鎗韃椎斧炭薪於頭隊船劉國斌孫昌凱領之昌凱故鐵工習冶鍛令專斷鐵瑣戊申水陸軍大出玉麟戒昌凱曰毋發礮毋仰視直趨鐵纜下彼筏上礮一發船乘流已下矣吾親爲公拒寇舟遂將二隊出戰楊載福將三隊待瑣開雷四隊守屯以防寇鈔寇恃礮以爲船不能近纜及國斌等直下玉麟繼進寇舟未及移環擊之燒二舟國斌椎鎗下鉗鉗落筏空昌凱鼓鞴冶瑣瑣斷纜開筏上寇潰走溺水被斫死者無算楊載福候纜開衝下下游舟中寇愕不知何軍乃從篷上望之或有覺走者舟連數十里走輒絙而止載福直進至武穴乃回船擲火燒而上玉麟燒而下於是東風起載福乘風玉麟乘流天明合軍俱還寇舟燼岸上寇已夜走斬寇亦由陸遂走廣濟甲寅前軍至九江田鎮已破湘軍水師名天下文宗采其戰法手詔宣示江南北諸

水軍江南北水軍師艇船不諳戰績徵紅軍拖督船皆待風乃行所至淹留而江西亦造戰船頗用湖南船制以無將領輒收退湖南在籍官丁善慶陳本欽唐際盛李燦等始捐貲設船局而黃冕專製礮以應征軍言船礮者莫能及湖南焉然大鋒銳深入要利卒以至敗寇距九江城於湖口梅家洲作堅屯二與城相鼎峙北屯小池拒陸軍辛酉李孟羣等攻城城北洲壘木設礮旁維大舟小艇環衛之孟羣先攻其大舟戰不利蘇勝鄭沐中礮死李金梁船沈溺於江寇既見官軍水戰法亦并力於水戰多造小艇依大舟以出方冬風壯江水涌起戰船苦震簸寇又循岸射火燒船軍日夜危苦思番休而陸軍以克城在旦暮方日日言戰十一月戊寅塔齊布破孔龍寇屯己卯小池寇遯北岸既得遂圍九江寇悉衆保湖口彭玉麟等扼江與相持丁亥寇載火夜燒江外船李孟羣列隊待之火舟至鉤放溜中不得近十二月辛丑彭玉麟等攻湖口寇筏破之士死傷相積寇亦殊死鬥其筏上作木樓馮樓發礮樓傾或飛投江中泗而走其堅悍若此丙午蕭捷三等以寇屯湖口梅洲堅實慮其掠鄱湖內犯通資糧率輕船圍姑塘諸勇銳爭從之既入乃不見一寇會暮止屯寇瞰大船勢孤出小舟二十攻坐營都司史久立戰死寇小舟循官軍大船間拋火焚快蟹九長龍七諸軍三版大半入姑塘無鬥志乃夜還九江大營時楊載福養病武穴聞敗還爭湖口不利寇復北渡踞小池己未湖口陸軍亦退保九江其夜小池九江寇負小舟數十直犯國藩拖罟大船國藩懼而免水軍遂大亂入姑塘者方益進至南康聞坐營潰退還望湖口寇已作兩

浮橋通岸往來捷三等乃遂取食吳城因襲都昌寇舟破之然無統將且輜重阻絕漂泊章都間有船百二十人三千爲客兵而外江內湖水師分實始於此外江自己未夜潰俄而寇從廣濟追楊需至漢口五年正月丙寅李孟羣以船五十還救武漢戊辰大風損船四十餘船不能軍乃令彭玉麟等沂江名援武昌而修船新隄國藩自是入陸軍未幾移屯南康就蕭捷三等取船江西立內湖水營而江西糧道鄧仁堃主製造二月寇陷武昌自是寇專力陸道故城陷不能救三月湖南益發新船百餘至金口彭玉麟募軍實之合舊水軍爲三千人與湖北巡撫胡林翼陸軍相輔四月王國才進攻漢陽將築屯寇前後鈔之玉麟望陸軍已被圍舍船登岸反鈔寇多斬獲寇乃散走六月楊載福自岳州增募船軍合先屯爲十營內湖蕭捷三等增軍屯南康爲八營楊載福旣至金口則議攻寇武昌以李孟羣所部弱雷孟羣將陸軍守金口而林翼及玉麟先入漢攻蔡店玉麟以小船入沌掠赤野湖東而北絕漢至沮口順流東還北破宗關石壘南攻漢陽寇舟岸發礮不得近遂北攻漢口寇舟乃出沂流上欲鈔我夾擊之奪其舟九出漢口攻寇浮橋燒寇舟三百凡三日寇不出楊載福自外江來會師同出江屯沙口沙口者武昌下游三十里至沌口六十里還沌口當從武昌漢陽城下過載福之出也寇無備而玉麟從漢口渡江距兩城遠故寇礮不甚相及旣空屯沙口不能助攻戰乃議還衆議由漢入沌雖迂遠其避礮宜易載福愜之曰丈夫行何所避浮江下沂江上乃爲快耳玉麟恥後之張帆先行寇先已密備覘我還路機舟傍中流及城上

縣礮并發諸軍但冒進不知誰生死礮丸飛鳴船倉羣子以斗計擊沈四船中礮死者三百人礮擊玉麟  
桅折不能進望見載福自呼之載福船瞬息已去成發翔三版過玉麟躍入得免知其事者皆不直載福  
而玉麟曰風急水溜呼固宜不聞載福先已不樂玉麟林翼親拜兩人和解之內湖水師既成而寇亦於  
九江造戰船悉仿官軍制四月自姑塘上犯敗官軍五月復戰敗之奪挖罟以歸挖罟者即陳輝龍所造  
九江所失者也六月進攻湖口不利七月合陸軍攻湖口寇馮岸發礮蕭捷三中礮死八月乘流攻湖口  
南風急船駛陷寇壘下喪船二十一奏奪五營營官秦國祿等官而急召玉麟於是陸軍大將羅澤南援  
武昌而玉麟還領內湖軍李孟羣改統陸軍而楊載福領外江軍載福議以孟羣舊部多不可用汰羸怯  
十之五十一月外江軍合陸軍逼圍武昌時玉麟當之南昌江路絕則道湖南趣陸行阻袁瑞寇四五百  
里行旅相戒惟通寇者乃得達玉麟敝衣徒步往從者數人行二三日皆懼不進欲上取贛則吉安亦陷  
非從廣東閩浙不可至南昌玉麟謝去從者僞爲游學乞食經寇關半數十寇無覺者至南昌城門訶禁  
之問其實報院司皆大驚怪軍中聞其至氣自倍自十二月至六年二月外江軍數苦戰寇舟亦日益四  
月移屯沙口楊載福念寇舟來則依岸而其上下皆乘風船礮制法同官軍與我共長江恒避戰終不可  
勝宜深入焚燒之則募軍士尤勇者駕千石大船實消膏蘆菘施火綫約曰待近賊而發發則登三版以  
自救且急歸應募者三百人其夜載福設酒具五俎之食饗三百人躬自行酒勉之曰成功歸者人犒百

金有官者趨兩階白丁拔六品實職無負我既出人相語曰觀此往必死也有悔者或潛去或又自誓曰壯士死一言耳樓帆遂行逼寇舟南岸皆屯火發皆自躍登三版或遇傷火及墮水者死哨官一爲勇丁四十餘皆鼓櫂還載福親迎勞績賞自是寇舟能戰者二百餘皆燼火藥衝寇空中墮江水及岸相積而前軍游擊乃直至黃州寇不復上旬日巡哨船掠巴河斬州揚兵九江城下寇震駭援絕武昌漢陽坐困矣十一月林翼復大治戰船增軍至七千人合二十四營立船局沌口以時修船其月武昌漢陽同日復乃移船局漢口載福遂同復武昌縣及黃蘄燒武穴龍坪小池諸寇舟奪大小戰船五十八十二月水陸軍圍九江內湖軍往來吉袁臨瑞建昌南康饒廣間日有戰事以陸軍屢敗不得志然所在扼寇寇亦不能長驅江西亦自立水軍以劉千濟領之常屯樟樹爲省城西防七年二月國藩遭父喪奏言臣軍事以水師爲大楊載福所統十營彭玉麟所統八營合大小戰船五百艘二千請以署湖北提督楊載福爲總統惠潮嘉道彭玉麟爲協理 詔從所請五月湖口寇舟上犯外江軍出擊之乘風追過百里及還寇尾之別從扁擔夾出小舟要之軍敗哨官易景照等死者二十一人勇丁死者百四十八人喪船十八蓋水戰風水俱順則行急礙無津俱逆則膠滯不得進數以此敗非善戰者莫能操其機則順水取逆風逆水取順風將勇者勝焉閏五月寇從陸道上窺斬黃分船守蘭溪巴河樊口陽邏沙口而大營屯官牌夾以攻小池八月小池拔九月始復攻湖口先是玉麟軍在江西歲餘無所得餉借頒火藥亦斬之時內湖軍



屢攻石鐘梅洲寇屯不下聞外江軍至剋期遣謀告九江圍軍合攻丁亥平旦玉麟率全軍分三隊出湖  
載福臨江口發礮應之寇併力拒湖內軍城洲兩岸礮丸如雨玉麟令三版先出大船繼之寇度船所經  
直石鐘山下有石崖高下與三版相當即輦巨礮崖口一發中前船都司羅勝發斃玉麟令回船後者進  
有死者復回船後者迭進傷死相繼莫敢退或諫曰今驅士卒與飛火爭命非兵法也玉麟曰自水陸用  
兵于此五年精銳忠勇之士獎命于此千數矣湖北江西以此被屠戮者數十萬每一念之煎心且久困  
若不破此險無生理今日固死日也義不令士卒獨死亦不令怯者獨生矣鼓而進之寇崖下礮發火多  
銅焦礮者震死船銜尾直下出江與外江合軍歡聲動江水於是沿江寇舟失勢所在擲火燒之舟盡燬  
而官軍船爲鐵網牽絙篙楫不利岸上寇復聚火槍擊水軍適會李續賓伏陸軍潛上湖口城背山揚旗  
鳴角下岸寇驚愕大潰三軍合屯其夜城寇破走洲上寇亦遞獲軍火子藥數十萬礮船八十餘悉解江  
西辛卯乘勝奪據小孤山乙未載福攻彭澤庚子克之前軍至望江望江寇遜壬寅復東流癸卯過安慶  
舍城不攻攻縱陽壘破之甲辰破大通壘丙午復銅陵下至峽口見官船旌旗偵者言此紅軍船定海總  
兵李德麟所將也丁未載福往見李德麟紅單船人皆聚觀以爲此軍將從賊中來疑不可信李德麟因  
言方攻泥汊縣實萬六千金攻七月堅不下明日載福合李成謀攻之糧而進通屯擲火屯中寇久懈殊  
不慮有軍至皆長跪乞命獲礮百舟五米六厘及所俘寇盡以與紅單船回船而還是月初和春方奏言

泥汊戰勝狀至是湘軍攻克而江南大營不復言泥汊蓋諱之云十月戊寅朔載福還師丙戌至湖口內湖軍先增二營爲十營分八營屯章贛留二營湖口丙申江西寇自鄱陽賊湖口擾九江爲陸軍所敗還走池州前所復望江東流銅陵三城復陷八年四月壬子水陸軍攻克九江外江內湖軍要逃寇盡殲之詔楊載福專征外江軍移屯蕪陽鎮分防三營屯黃州彭玉麟駐胡口五月乙未起國藩督陸師援浙載福復克東流進屯黃石磯六月撫定建德寇復其城八月戊辰國藩載福奏祀陳亡將士三千餘人於石鐘山內湖軍合陸師克吉安江西始平九月辛巳合陸軍攻安慶十月辛亥三河軍潰寇大上我軍分屯自九江至武昌十二黃石屯軍如故九年寇別都犯湖南圍寶慶湖南北大震分遣蕭翰慶王明山等四營入資水曾紹霖等二營防沅水左光培一營防澧水五月師行七月還江防九月寇將韋志俊以池州反正玉麟躬率內湖軍移駐黃石與楊載福合屯十月李成謀往撫池州寇衆叛攻韋志俊力戰擊走之收其衆萬人十一月徽甯寇來攻由陸登城池州陷拔餘衆還張谿十年三月浙江請援遣蕭翰慶改將陸師三千合領歸誠人三千援杭州道甯國副都御史張芾奏止韋志俊軍杭州已陷新任巡撫王有齡以寇退復奏止翰慶等仍隨張芾收旌德石埭太平廣德已而浙事亟飛檄召翰慶而韋志俊遂率所部依水軍四月外江營官陳金鰲合江南水軍攻烏磯寇屯破之五月蕭翰慶遇寇湖州道戰死之餘衆入城助守江南大營潰蘇州陷以國藩著兩江總督國藩自宿松移駐祁門議立三路水師一淮揚一甯

國一太湖林翼則議立衛杭水軍而無甯國然皆不果行其後乃立淮陽太湖軍遂復江蘇列縣云章志  
俊從水軍復攻池州不克還攻樅楊收之六月獻福奏遣江南水軍將李德麟吳全美還守鎮江分軍屯  
大通於時徽甯繼陷陸軍自顧不暇安慶雖合國而寇窺新黃國藩受命節制皖南軍而總兵周天受死  
甯國甯國餘民保南陵總兵陳大富血書求援不能救乃令水軍赴其急謀拔出城中軍民棄城不守獻  
福念孤軍深入必俱危九月秋雨江漲躬率四營揚言攻蕪湖時寇方於南陵作壘斷北港以困城中蕪  
湖久無備偵水軍出度南陵不通舟即夜俱下赴蕪湖獻福宿魯港半夜令曰視吾船所鄉而進先者斬  
旦令兩營屯港口已登三版令柁師曰往救南陵諸軍皆驚疑以統將先則繼進港左右寇小屯三四處  
還出不意走保城下大壘壘寇大半赴蕪湖我擲火則皆出走獻福叩城門呼大富曰今奉令拔城中居  
民可急裝入船令戰船軍皆步循隄退出民老弱先壯者後戰船軍後獻福殿半日悉發逃寇走報蕪湖  
蕪湖衆還已暮矣寇呼譟來追獻福獨持矛立隄上衆不敢逼比出港而蕪湖寇將舟至方與留防軍楊  
占鼇等相持見大隊船浮港下亦退走軍民萬餘人分載諸船還黃石大營給棚帳畱二十五日十一月  
寇陷東流建德彭澤圍湖口分陷鄱陽都昌獻福玉麟躬出戰守玉麟入湖口登陣雨立數日夜寇去遂  
分復五縣遷南陵軍民於東流浙江議立水軍奏調營官劉培元培元先歸湖南領水軍在衡永防寇不  
果往自是東南七省皆自有水師戰船多用湘軍將及製造皆仿湘軍焉十一年春寇復犯新黃遂及德

夔頗窺彭澤大通開瀨江地以防密輒退走玉麟又自率軍至武漢因巡江防會陸軍克孝感三月國書移駐東流安慶圍已三年會國荃將萬人潛前後壕引江水浮戰船互相倚寇帥陳玉成尤患之乃於菱湖北作屯以通集賢關且作浮橋通城載福率師攻擾之陸軍將曾貞幹築壘湖口以遏寇寇來爭戰且築寇亦更築阻遏水軍船從兩壘間出土多傷四月王明山等入石門湖合陸軍攻赤岡下游屯軍李朝斌等頻攻魯港以牽寇援陳東友等入練潭與桐城陸軍相應五月蔡國祥破菱湖寇屯李成謀攻無爲青陽寇皆馮城不出七月玉麟會陸軍克孝感天門應城黃州德安載福假歸八月丁巳朔安慶復寇先越湖遯走故水師先登辛酉趙三元克池州上游斬黃次第平林翼堯 詔玉麟爲安徽巡撫九月丁巳王明山克銅陵無爲黃翼升新立淮揚軍輔李鴻章陸軍援蘇常道絕未得進仍合諸軍防江十一月丁未攻運漕鎮癸丑攻東園皆破之以陸軍少留屯不進玉麟奏言臣起自諸生居戰艦十年與水勇花工馳逐風浪封疆大吏進退百僚深懼弗克勝任 詔敦促赴官再辭改水師提督明日又 詔曰彭玉麟有節制之任武職不足資統率著候補兵部侍郎載福避 御名改名岳斌以母病再請假 詔促令到防同治元年三月李成謀等合陸軍攻巢戰於銅城關雍家鎮皆捷遂復巢城陸軍乘勝攻含山和克之蔡東祥別攻濡須克之李成謀成發翔蔡東祥等三軍遂合陸軍攻西梁山燒其鐵瑣寇不戰而走渡江攻魯港克之陸軍復南陵玉麟進駐銅陵四月壬申玉麟將外江內湖淮揚三軍十八營盛兵攻金柱關

陸兵因襲太平復其城夜攻金柱克之癸酉分遣王明山攻烏江李成謀成發翔取蕪湖黃鳳升襲東梁山皆克之玉麟請上游水軍集濡須五月癸未玉麟督彭楚漢王吉喻俊明成發翔王明山從濠洲會陸軍攻江甯城西頭關破之寇倚洲作二壘玉麟分遣八營逼壘寇礮落船中乃遣軍持火登岸伏葦下入夜火起宿葦枯根延燒新壘燎一洲寇走出因襲燒其壘奪礮數百斬寇無算玉麟自乘三版至下關諸軍方收隊見小船紅旗直上訝之時昧旦初辨色王明山未起哨官廖德茂迎候言明山連夜戰初還坐船玉麟頷之已而陸軍將來問克壘破關狀見玉麟在則怖懼不知所言廖德茂往報明山明山聞捷喜又謾罵曰諸蠢奴欲急滅長毛歸餓死耶德茂言統帥夜已至下關乃驚起往謁玉麟紅旗小船已去久矣故凡戰載福玉麟在或前或後水陸將士皆惴惴莫不盡其力初陸軍之進雨花臺也寇鈔後斷運道梗軍報不通軍中譁擾至是頭關破以水軍護糧由江路進陸軍心始定自和春潰後至此官軍始再至城下卒以合圍其先無水師故也癸巳黃翼升領淮揚軍越寇屯赴上海因奏翼升署江南提督長江五千餘里外江內湖軍分戍孫昌國等長屯江西猶隸於玉麟七月李鴻章奏言紅單船不足用淮揚軍皆長龍三板分船四十防三江口其餘入松江泖澱諸湖然於海面風沙性不諳蓋始有意於輪船矣八月淮揚軍拒吳淞寇敗之平七壘又攻澱湖北岸石壘破之奪舟二十繼甯寇負舟越東壩謀爭金柱舟蟻集固城南瀾湖玉麟躬入湖拒之寇逃出花津岳斌往拒之九月乙卯戰關下郭明鑿中礮死戊辰七

營合陸軍攻花山彭楚漢等先據上駟渡絕浮橋玉麟令會泗美會船助陸軍俱進金柱守將羅逢元自後乘寇大戰破之寇敗趨橋遇楚漢列船則大潰辛未破花津寇屯戊寅成發翔等戰石臼湖奪寇舟四十旋克灣沚下游寇乃乘間自浦口北渡陷含山巢和是時廬州新復多隆阿不欲隸會軍因詔書援陝則北去故廬桐空虛玉麟屯濡須而寇復踞運漕鎮在其上游岳斌防蕪湖日奪東壩寇來舟十月淮揚軍出青浦破寇舟於白鶴江更立太湖軍十營李朝斌爲統將寶翼升攻寇福山大破之初寇將駱國忠以常熟反正寇起大衆圍常熟官軍往援隔太倉不得進故合陸軍從福山入與寇相持十二月玉麟克運漕鎮旋收含山巢和二年二月淮揚軍進攻福山七十餘日擊破來寇解常熟城圍三月分遣歐陽利見王東華合陸軍克太倉崑山吳江五月玉麟岳斌合陸軍大陳兵攻九洑洲過江浦寇望風奔潰收其城遂破浦口屯屯寇奔洲洲寇閉不納多投江及餓死者九洑洲爲江甯對岸重鎮寇築堅城以遏長江集戰艦環巨礮數十護之自寇據城向榮和春師至洲寇必全力走江北及甯國以誤我及會國荃欲合圍而都興阿馮子才日言九洑危險朝議憂疑含山之再陷也降人李世忠負敢戰名以三萬衆扼九洑不勝故洲上寇壘愈高堅旁列數十屯列舟緣洲亦自以爲牢固於是玉麟陳船上流分二隊南從蔡淮向下關北透永安洲向草驍夾更列軍爲南北移應而岳斌自督戰以枯荻灌油燒屯舟因燒菊壘八襲燕子磯破之胡俊友中礮死洲寇不出明日岳斌遣陸軍伏葦葦中掘洲埂分船夾洲上下更列軍鄉

城中關拒援寇乃散遣三版遶洲伺隙則登寇分三隊發火槍傷死者數百人至夜玉麟令曰洲破乃還師不者傳餐而戰喻俊明成發翔王吉任星元更番夜攻或有乘暗得登洲者衆譟而登皆冒敵爭上踐尸而進人忘其死九洲洲竟破萬餘寇無一脫死者獲馬三百餘匹悉送陸軍中捷未上江北爭飛書相慶 詔問狀且訝其速克焉七月安徽巡撫唐訓方有事苗練以臨淮無水軍遣丁泗濱將船八十護糧運奏調淮揚軍 詔令岳斌自往國藩以長江事重大留岳斌李鴻章言蘇松之戰水師功爲多亦不能遣淮揚軍八月福建寇入江西窺湖口彭澤旋敗走遂掠池州圍青陽喻俊明往援又急檄江忠義陸軍出江西來援玉麟來視師圍解甯太寇連屯高瀆涑水謀襲蕪湖陸軍并攻新河莊玉麟躬攻水陽岳斌來會師克滄溪鎮逼高瀆降寇守將遂收固城鎮克東壩降建平溧水寇將解散萬計三年春 詔頻問國藩以楊岳斌彭玉麟宜分上下游或內外江以鎮撫湖北江西四月奏遣玉麟駐九江以上控湖北浙江巡撫左宗棠以岳斌爲未盡其用且密陳其才堪督撫癸巳 詔岳斌督師江西兼防皖南未幾授陝甘總督岳斌之貴先玉麟及玉麟改提督 詔統率文武岳斌自恨非文官常見於詞色還江一奏事被 詔令由國藩轉上當時論者皆以岳斌功高勝玉麟遠甚歎息於文武積習諸文人又自恥持常談亦交訟岳斌稱其才德至是被顯命督師專征衆皆欣欣焉五月黃翼升還統外江軍內湖軍將孫昌國克貴溪岳斌至南昌陸軍大將鮑超已破江西寇無所爲則奏劾江西統將席寶田以違節度奪三階六月

乙酉江甯平戊戌 詔諭國儲功以勅立舟師爲首八月進長江圖岳斌督陸軍赴陝西黃翼升爲水師  
提督 詔玉麟駐安慶國藩奏今議立長江水師當周歷區畫五年正月甲子國藩玉麟奏言觀江五省  
戰事大定前募水勇請改爲經制水兵我朝綠營兵丁五十餘萬乾隆四十六年議增缺額大學士阿桂  
上疏力爭之臣聞鑄於咸豐元年亦疏請裁兵五萬自洪楊倡亂捻回繼變皆倚勇丁以集事國家養兵  
歲費二千萬今直省勇丁合計三十萬以外而經制之兵仍未能減非長策也大江水師船至一千餘艘  
礮位二三千利器不宜浪拋勁旅不宜裁撤奉薪口糧修補船礮經費於長江酌留釐稅量入爲出計提  
督一員總兵五員營官副參游二十四哨官都守千把外委七百七十四兵數萬二千兵餉雜費月五萬  
有奇自荆岳二州至崇明五千餘里立六標分汛計船七百七十四營二十四副將營戰船四十三參將  
營三十三游擊營二十三自提督至外委各給坐船長龍設大礮六三版大小礮各二設火藥局於安徽  
湖北二省城設子彈局湖南省城設船局漢陽吳城草驍夾因奏事宜三十營制二十四六月軍機大臣  
會奏依行編章程六卷入方略垂示後世頒之天下水師既立而國藩移督直隸玉麟告歸黃翼升爲提  
督七年長江盜劫多有軍士不習器械時議疑本奏裁兵而更增兵兵歲不用則罷情與舊時水師營等  
兵不可久長江水師亦宜罷其年國藩薨 詔徵玉麟召見補兵部左侍郎詢長江事宜復具疏三辭侍  
郎 詔每歲一巡長江於是黃翼升請病去而李成謀爲提督玉麟所至則江湖肅然改觀作長江水師



剔弊百條上之著於令岳斌先已罷陝督亦被徵 命巡江恆多引疾事專於玉麟歲有劾罰然舊都宿將皆衰老新補兵稀復知戰言輪船礮利者亦多矣

浙江篇第七

自寇踞江南大營極爲浙輕重傾浙財賦供餉歲銀幾百萬湘軍乏於實則羨覲之幣浙江於無事於湘軍湘帥浙撫每不相能咸豐十年羅遵殿自湖北來撫浙寇犯安吉長興始徵湘軍將董壽慶等來至省城陷駐防將軍瑞昌保子城江南軍赴救者自外乘之寇棄城走頃之大營潰散蘇常被搜浙將張玉良自以新有功於浙收潰軍屯杭嘉興巡撫王有齡綜覈善理財由丞判爲何桂清所舉不十年至大位故習江南諸將初至杭州則奏止湘軍事亟更奏調李元度劉培元等胡林翼與書元度戒以擇所事培元亦不至而甯防將周天受敗死督皖南軍張芾罷督浙所供支倚以屏蔽獨嚴者也有齡知當受兵則通使祁門請援曾國藩語不及軍餉國藩以軍未集辭十一年杭州被圍 穆宗新立銳意定天下詔國藩兼制浙江超用左宗棠督軍杭州時浙江屯援軍猶過四萬有齡復奏用李元度募八千人入浙免論徽州罪且擢爲按察使至龍游阻遏不得進杭州城獨張玉良屯外未敢取窺稍逼之玉良中飛礮死諸軍不任戰反剽竊而坐索餉 詔左宗棠代有齡 命下城陷有齡死之李元度謀退屯前安吉令陳鍾英上書言今議者欲還軍常山或走衢州衢州自有防軍而江西不供餉無事保常山也閩爲浙餉源江山一城爲入閩咽喉固不如屯江山顧餉道與衢城相應賊必不敢略江山而攻衢亦不敢零衢城攻江山即常山不守自全策之上者也元度從之時宗棠未入浙境未能節度也浙江全省地唯湖州衢

州城爲國有而湖州孤居羣寇中旦夕不自保州人趙景賢以功節見重 勅廷情其死即授福建糧道  
促令赴官冀其脫免故論者以湖州已不可保唯固備防會國藩與宗棠議以保徽州因饒廣爲根本奏  
以三府屬縣丁糧銀米供軍設婺源景德河口三稅局埤之三府防軍悉隸宗棠通吳越爲一寨以保江  
西宗棠佐湖南軍事十年勇將健卒多歸心其名者黃少春崔大光張聲恒又雅善王珍諸王多從之以  
初領軍亦益謹事國藩常補太常卿有陳謝猶不敢自上奏凡有軍謀咨而後行自比於列將及授巡撫  
竟因以起

同治元年正月癸卯宗棠領見軍九千人自婺源攻開化破寇馬金自駐之遣王開來屯開化城是時王  
開化已前病死將士皆偏裨戰守差自保將益濫者嘗爲羅澤南偏將不見重於曾胡歸將偏師入廣西  
連有功以軍疲弱缺額降官俄復爲大將浙江事亟國藩復奏薦之即授浙江布政使令將所部增募新  
軍未至唯劉典王文瑞號有戰略頗令率諸將當一路諸軍援浙者總督慶瑞遣將防龍泉松陽政和別  
將秦如虎屯溫州江蘇軍渡海收定海甯波仙居民騷起義復台州列縣甯波寇走紹興台州寇走處州  
溫州寇入金華與嚴州寇合窺衢州守將李定太江山屯將李元度不能相救宗棠恐 朝旨促入衢則  
自陷因上奏曰行軍之法必避長圍防後路先爲自全之計臣軍入衢則後路疎虞又成糧盡援絕之勢  
今由婺攻開化分軍扼華埠收遠安使饒廣相瓦以安然後可以制賊而不爲賊制然欲使徽郡取道嚴

州食米轉運殊多勞費又衢州李定太一軍八千餘人江山李元度一軍八千餘人人數皆與臣軍相等而常迫切呼援惴惴不能自保臣軍力固不能及亦不願其浪戰求勝致損軍威此兵事餉事之難未可驟期恢復之效者也二月遂昌松陽黃巖羣寇掠雲和景甯樂清青田寇陷瑞安温州南北被寇總督進駐浦城壬戌王開來劉典劉璈李耀南攻遂安破寇城下其夜寇棄城走以王文瑞守遂安寇再來攻卻之金巖寇圍衢州急宗棠自往救至常山江山復請師未定所鄉三月丁亥寇破峽口福建軍宗棠度勢注江山乃西援與李元度合攻寇花園不克衢州寇亦西宗棠還常山温州羣寇還處州悉屯松陽遂昌江山寇亦東南攻遂昌援軍福建將林文察破之石練四月甯紹台道張景渠自定海招海盜商船西渡克鎮海進甯波合英法軍攻城民團至者過十萬遂克甯波列縣進餘姚徽州寇親遂安走昌化遂昌寇復東還樂清瑞安攻温州福建軍將張啓煊戰敗慶端益增兵寇再圍温州攻瑞安縉雲青田樂清三城空虛民團因收集入保并攻松陽五月寇復還景甯雲和福建軍屯龍泉拒之湯溪寇南援松陽瑞安寇犯平陽民團因收泰順雲和甲辰張啓煊蹙寇平陽殲之遂合白瑛秦如虎進攻處州宗棠軍進衢州寇復攻遂安分軍破走之魏喻義劉培元各募新軍至衢州乃分部防守六月衢州屯將廖士彥進遂昌助林文察攻松陽民團因收宣平辛未克松陽七月己亥復處州宗棠始進軍攻龍游蘭谿寇來援連屯數十相持蔣益澧至衢州以高連陞熊建益爲左右軍將李元度坐徽州前事免散其軍甯波軍復餘姚八

月以史致諤代張景渠爲甯紹台道寇復陷慈谿奉化總督慶端改將軍者齡代爲總督丁丑上海軍克慈谿英人華爾中礮死閏八月丙戌高連陞進軍收壽昌遂會熊建益攻湯溪戊辰甯波軍克奉化宗棠自攻龍游去城五里止屯魏喻義移屯清安與遂安王文瑞軍相倚九月徽州急文瑞移攻績溪清安軍孤危寇以龍游湯溪官軍盛輕喻義不來攻屯既久覺寇無能爲稍稍移軍十里二十里輒止月餘至銅關去嚴州六十里嚴州城隔水西山奇險俯臨江山中饒良田民居寇至結屯相保其魁曰林三頻拒戰寇讎之因自結於官軍謀報相望王女者江山船船總也江山船例以婦人應官役雖嫁生子猶自名爲女王女主嚴州水絲寇至亦役之其船往來無譏禁苦寇徵求又知其虛枵欲引官軍因至銅關求見喻義喻義令他將見之既久具知城中寇動靜亦頗因以通林三是月處州寇悉北趨東陽福建軍分屯不復進十月有 詔聽法國人領兵攻甯波用內地軍制十一月嚴州寇攻西山庚申王女遣報銅關軍言寇怒林三奪其米舟期明夜襲西山城空可破請具舟濟師林三亦請援官軍士爭奮願往乃報如約辛巳日晡迎官軍船至者數十喻義選千人自將以往午夜薄嚴州城城上柝聲斷續不設燎火殊無戰備軍士勇者梯西門以登殺柝者而代之遂斬門鑰納軍軍入而謹寇驚出搏戰餘守城者皆下短兵相斫然倉皇無鬪志頃之潰走其攻西山者以有備不能克將還城望城中火光有異疾趨城下聞報官軍已入闕然大奔壬午復嚴州捷書聞諸將皆驚愕焉方與寇相持求勝之極難乃無意收一大城以此頗得

寇虛實蓋其戰守亦無以大異官軍云甯波軍克上虞台州民團收新昌縣劉典解蘭谿圍援祁門未至  
王文瑞已復收祁門績溪典屯羅埠甯波軍進攻紹興寇自金華援湯溪自蘭谿援龍游建益劉培元  
等拒戰屢敗之

二年正月戊午湯溪寇有歸誠者誘寇將出城副將劉樹元伏壕中突起禽四人湯溪西門開復其城高  
連陞進攻金華己未寇遜收其城江西援軍將王德榜偪龍游城南作三壘寇出西門攻官軍敗之賊所  
掠走湯溪湯溪已反正遂皆北走蘭谿寇亦棄城走福建軍收武義永康於是東陽義烏浦江寇皆避蔣  
益澄自義烏劉典自浦江合攻諸暨民團起應官軍寇懼獻其城己巳復諸暨甯波軍攻紹興破城外寇  
屯城中民謀反正約官軍甲戌夜舉火爲內應火發軍至寇遜走乙亥復紹興乙亥龍游官軍水陸並進  
收桐廬杭州寇震懼悉力拒富陽宗棠懼江南寇鈔衝嚴乃分軍遣劉典西防徽蔣益澄進攻富陽二月  
戊寅甯波軍躡寇蕭山復之壬午富陽水軍燒寇舟因屯南岸蔣益澄渡江屯新橋庚子寇列陣拒戰蔣  
建益陷陣先入寇分黨攻中軍高連陞出追被鈔張志公王宗元等馳救之宗元中槍死志公被數創連  
陞乃得收衆還辛丑援徽軍將劉典合徽防將唐義訓拒寇徽州城東遣費少春奪巖寺寇屯追破之於  
潛口進屯漁亭寇以故西犯江西王德榜還軍浮梁三月甯國池寇合駭寇逼祁門阻浙徽軍費少春合  
王沐擊散之復駭遂攝寇浮梁四月杭嘉寇出餘杭臨安圍攻新城守將魏喻義不能拒宗棠發嚴州軍

合蔣益漄高遠陞軍援新城雷熊建益屯新橋寇乘軍少來攻建益擊走之乘勝追寇薄其壘中槍死益  
漄連陞俱還屯益徵甯波艇船助水軍燒錢塘寇舟因平杭州西門外寇屯富陽援寇退走五月劉典軍  
合江西大軍攻寇鄱陽陶溪破之寇北走彭澤湖口 詔以總督耑齡所將軍浮光移耑齡福州將軍令  
還閩授宗棠總督仍兼浙江巡撫軍中疾疫宗棠病瘵因殆富陽久圍不下增募外國軍助攻六月江忠  
義將新軍出江西攻湖口江南江西軍勢盛寇東北走圍青陽劉典還屯徽州江蘇軍自松江進攻嘉善  
嘉興寇皆北救相持張涇滙八月庚辰水陸大舉攻富陽奪城北雞籠山發砲攻城寇棄城走壬午高遠  
陞破新橋寇壘二十分兵屯富陽新橋始合軍攻杭州蔣益漄在城北屯留下高遠陞在城南屯六和塔  
康國器魏喻義等攻餘杭杭州寇築壘連四十里西通餘杭九月庚戌城寇來攻六和屯破走之壬子進  
屯天馬南屏諸山十月增四壘自天水橋以西爲餘杭聲援江南寇多歸誠連復高濟甯國建平溧水屯  
軍東壩江蘇軍克蘇州十一月丁未江蘇軍破寇張涇滙平湖寇迎官軍庚戌復其城癸丑乍浦反正乙  
卯復海鹽澉浦反正江蘇軍分攻嘉善嘉興宗棠進駐富陽移富陽屯軍助攻餘杭關援院軍將黃少春  
自分水出新城扼餘杭西南丁卯蔣益漄揚昌濟黃少春合兵萬三千攻餘杭城西北戰一日所殺傷相  
當其夜寇益作長壕增壘依城以抗官軍益漄還留下庚午江蘇軍復嘉善十二月癸酉高遠陞攻杭  
州城破寇壘十甲戌遂偪城西北圍其四門江蘇軍合四道攻嘉興黃少春等懼無功又恐寇遊蕩軍恐

西南走潰圍乃急攻餘杭與援寇戰林清堰敗而還湖州寇皆東援嘉興江憲軍將何安泰戰死程學啓等急攻城城屢破復完士卒多傷海甯寇將蔡元隆懼嘉杭軍逼而患杭寇之微其衆歸誠官軍蔣益漣請以慶安之知海甯往撫之丙申慶之至海甯蔡元隆送巡未即出元隆前踞太倉亦以詐降欺官軍陷我軍四百人至是從者皆懼安之入州堂徐遣告元隆曰頭目畢集乃來見元隆從兵衆往見之安之大言曰若等皆朝廷赤子今居大軍中且旦夕俱死故吾知若等歸誠非僞也如欲用太倉故智者可斷吾首元隆情得頓首曰方以太倉事自疑今以死從公即從渡江還除兵改服迎官軍己亥收海甯易元隆名曰元吉汰其衆留精卒四千以元吉將之隨大軍自效以劉樹元張景渠等屯守海甯

三年正月遣蔡元吉襲桐鄉甲辰元吉突至桐鄉城下梯而登守寇覺拒堞傷我軍百餘人乃屯城西南增遣李邦達合張景渠軍屯城東北戊申寇歸誠庚戌收桐鄉以歸誠人何培章將其衆三千屯烏鎮斷杭嘉道絕寇運蔡元吉屯桐鄉劉樹元進攻嘉興蘇浙軍始合矣嘉興寇將乞援湖州悉衆東援竊烏鎮且憾何培章築屯圍攻之培章請援杭州蔣益漣不能往遣書劉樹元激厲之戊辰樹元還軍烏鎮視地形渡水增二壘庚午寇大合衆攻新壘歸誠人兇懼反先潰樹元日暮突圍出前渡舟已失所往半夜潛行遂復入空壘堅壁相持培章元吉益資之糧寇不得進二月戊寅寇累雙橋攻桐鄉元吉出戰敗之丙戌追寇鱸頭元吉突陳被槍斷掌魔衆直進平寇壘十丁亥寇來攻復敗之己丑進烏鎮江蘇軍攻嘉興



城薄四門水軍入南湖程學啓礮壞城三面凡百丈糜軍乘之寇死拒學啓中槍子頗諸軍繼登擄火燒城中寇大亂斃斬數千計誅其兩帥克嘉興庚寅烏鎮寇奔湖州甲午蔣益濂攻杭州陳兵五門別遣軍攻城北長街城寇出援大戰自日中至暮多所殺傷各還屯其夜寇啓北門走乙未省城復餘杭寇亦東走與杭寇合奔德清宗棠發親軍遣楊昌濬將之攻武康高連陞攻德清蔡元吉攻石門三月壬寅宗棠移駐省城中虜獲之禁婦女財物各從其主有敢言取自賊中者罪之禁軍士無入民居招商開市奏停杭關稅立清賦局減杭嘉湖稅則三之一蔣益濂爲布政使亦輕財致士杭州善後事一時翕然稱之初盛時城內外居民男女口八十一萬及復城才七八萬宗棠長於治簿書故州縣盡心焉甲辰武康反正乙巳收德清石門反正寇奔孝豐西南走昌化諸軍進圍湖州江蘇軍二萬人攻長興廣德寇皆東援湖州寇逆拒官軍於石門德清復分拒江蘇軍於太湖五月江蘇軍水陸屯夾浦湖州寇東窺南潯水軍東援寇復西赴長興與廣德寇合勢分軍擊敗之師進寇復還拒又敗之門於西北門作浮橋渡軍癸亥合圍寇馮城擲火燒攻具士皆冒火礮塚上死者數百人將領畢登寇突西門走遂克長興湖州寇知必死則分黨綴江蘇別軍於南海而悉衆拒蔡元吉於荻港廣德援寇屯四安楊昌濬自武康西攻孝豐六月壬申軍薄城其夜寇遽癸酉收孝豐北攻安吉蔣益濂合諸軍進屯菱湖江蘇軍南進四安西攻晟會南潯屯軍亦西進織里乙酉會軍克江甯寇由廣德奔湖州作屯尹隆橋通道往來江蘇軍先攻橋屯多

傷戊子合軍攻晟舍不利自辛卯至乙未蔣益澧頻進戰寇增壘思溪與相持丙申英國將發砲攻寇屯不能克寇圍蔡元吉東埠屯益澧進軍作壘增調礮船輪舟又結浮橋渡思溪援東埠不能進英國將遇寇戰輒敗退七月蔣益澧議先攻荻港甲辰進軍丙午破寇三屯寇水軍將率其戰船歸誠水軍乃出太湖鈔寇背而蔡元吉乘隙潰圍出襲其軍四之三皆飢餓無人色其被圍二十餘日矣羨桑皮爲糧且六七日以大軍赴救力戰雖不能達感義忍死終無逃叛丁未江蘇軍及甯波將合攻晟舍克之寇初以全力圍東埠而蔡元吉突走晟舍又破己酉乃西趨江蘇軍進屯大錢口劉樹元進屯昇山癸丑甲寅湖州城寇來歸誠者相繼高連陞復攻袁匯寇奔城城寇開西門分走廣德孝豐乙卯收湖州丙辰楊昌濬克安吉追寇孝豐遇湖州來寇與孝豐守將合擊之寇合走甯國與廣德寇俱走昌化分黨出溇安餘悉西趨績溪黃少春等復自嚴州拒溇安寇寇亦北走徽州婺源屯軍東還抗開化寇散走或逸出掠江山常山皆遇官軍不復能喙息奔江西廣豐語在江西後籍浙江既定十月宗棠奏以蔣益澧護巡撫己之總督任而寇先自江西犯福建按察使張運蘭署提督林文察皆名將連敗死乃以全軍入閩追寇至廣東竟收成功焉

寇之自杭湖廣德西走浙軍將報言衆數千江西軍將言精悍者過十萬督撫各據以告左宗棠前以洪福未死譏切江南大軍及自浙逸出諸帥皆言洪福由浙縱之江西諸將既不悅於會國基左宗棠故戰

最力寇既連敗因走廣東同治三年九月張運蘭自江西瑞金入汀州廣昌諸寇復直南趨大埔折西北  
零武平欲攻運蘭軍以合贛寇運蘭屯軍下壩未戰大埔寇還北襲永定陷之自西北間鈔運蘭軍運蘭  
方食寇已入屯後起索馬遇寇營門擁至永定城與裨將總兵賀國琛以下二十人皆死龍巖南靖漳州  
俱陷閩中大震運蘭王珍營部也獨將十餘年爲會國藩所倚重倉卒敗虜江西軍亦奪氣宗棠急檄黃  
少春等四千五百人自衢州趣延平劉典將新軍八千人自建昌趣汀州高連陞將四千五百人自甯波  
汎海至福州期會泉州雖張遠勢距寇遼闊福建提督林文察攻漳州又敗死宗棠躬駐延平增調王德  
榜軍二千五百人自贛入汀繼劉典因奏以德榜署按察使十二月寇北圍漳平劉典自連城東援新軍  
經進大敗棄屯遠走保連城當是時寇屯漳州北踞龍巖南取雲霄西略上杭以北窺汀州衆號二十餘  
萬官軍遙與相持四年二月寇西還永定江蘇軍將郭松林來會師圍漳州鮑超前軍將葉雲慶自瑞金  
入武平四月寇棄漳州出大埔劉典等收南靖江蘇軍南收漳浦以西及雲霄詔安五月劉典進攻永定  
高連陞等進武平寇南破粵軍於鎮平八月西犯平遠遂走龍南宗棠以爲湖南邊無備寇且日西未可  
驟滅也而江浙軍勢盛宜無戰事因遂進駐大埔高連陞等逐寇六日夜中伏大敗寇反南趨連平東掠  
和平興甯十月陷嘉應連陞等還軍救之後不相及劉典屯丙村在寇道北偏宗棠親軍少弱勢危甚急  
召王德榜扼三河壩三河者大小靖溪及雁石溪所匯也按地圖爲潮州要衝德榜往察地形皆山道

潤度寇必不往且大埔帥屯孤縣寇直犯軍必不能支乃自請當中路陳兵步步設守而後進劉典屯既  
 偏遠聞德榜軍進懼以避寇爲罪則分軍疾出其前猝與寇遇寇行疾勢銳典軍未陳而敗掠德榜屯東  
 澗寇長驅追典軍德榜軍衆皆懼或曰兵法極利者穢此成禽也寇不西走輟桂而欺侮閩廣諸軍必注  
 海洋之謀宜選火槍視寇帥龍旂擊之餘皆馮壘自固可以不敗乃徐視其所爲及戰寇前隊直進火槍  
 環擊之寇不得前引而反走諸軍喜曰賊易與耳今敗矣乘之果大奔其夜歸誠人踰四萬言寇帥中礮  
 死矣軍皆大喜推鋒西進鮑超軍亦至嘉應寇出拒又大敗之於是閩浙江粵軍合圍嘉應諸將夜升山  
 岡望官軍火如龍蛇城寇勢在掌中皆度寇必乘夜潰圍扼城南黃沙嶺以待之十二月癸丑夜寇潰走  
 礮諸屯不得遜官軍登山呼曰棄械者免死羣寇跪道旁求免者六萬餘人俘寇將七百三十四皆斬之  
 拔良民男女萬餘人陳斬羣寇可計數者萬六千自寇起至破滅未嘗見斬刈如此之易諸將知必勝智  
 勇亦益發舒於是洪寇餘黨悉平五年正月甲申宗棠帥還諸軍皆凱還而廣東軍將猶不知兵適會寇  
 平亦全師而還

終



江西後裔第八

江浙陷寇聚於東及會左用師皖南多隆阿會國荃揚兵安慶寇無所騁則汎溢西出而領外羣寇隲受號召聚黨千數百人出掠旬日數萬亦皆由江西達皖浙故江西爲羣寇孔道自咸豐十年至同治三年江甯復之先寇凡三大至至輒蹂千里皆顛飽超軍無擊以免而士民被害深鉅矣軍興以來直省督撫能將將者存不知兵者亡存亡之由入其境可知也江西之無兵與蘇杭同然卒不亡且與湖北比功何哉四戰之地良將勁卒往來輻湊或赴援力戰或假道自達因而用之留而使之將不必自選軍不必素練客軍游擊亦足以奏功蓋代人受禍者亦因人以收績天道地利使然也江西巡撫自陳啓邁文俊耆齡惲光宸毓科皆守承平制委權司道 穆宗即位則超用沈葆楨葆楨習於湘人始自養軍重用湘將湘將名者不可致唯王德榜段起以偏帥積閱闕爲大將同治二年江甯事亟會國藩奏徵江忠義軍自江西出湖口轉戰青陽忠義病死葆楨悉留所部始有悍摯猛銳之軍與王段相輔矣左宗棠奏以劉典屯防江皖及蘇杭並復 朝廷銳意平寇尤憂江西頻 詔問會國藩以彭玉麟楊岳斌宜分一人鎮撫國藩以江西寇數來去遣帥輒破走之未重注意也宗棠獨重岳斌以爲不展其材乃特奏言湖常廣德寇趨江西江西安危係東南請專 詔岳斌當一面與 廷議相符三年四月 特命岳斌督江西軍且曰會國藩頻奏請大臣分任軍事今得其人矣是時浙寇逸出浙軍將報言殘衆數千人而席寶

田上言強寇過十萬國藩葉楨據以上聞且飛檄湖南廣東防大敵寇入江西者曰李世賢在海洋海洋  
踞貴溪金谿瀘溪南及新城界而廣昌寇北陷南豐與相應世賢屯崇仁北踞東鄉東併宜黃諸軍分部  
攻守江忠朝席寶田攻崇仁劉典王文瑞自樂安北進鮑超自豐城南下期會兵崇仁城下王沐自撫州  
攻金谿至許營遇伏敗績寇圍撫州王德榜王開琳等屯安仁東遇貴谿西圖東鄉周寬世屯進賢衛省  
城水軍將孫昌國屯弋陽劉于濤屯浮水自江西用兵以來設備之盛未嘗有也岳斌至則議增兵八千  
以餉乏未果行六月周寬世合王德榜等軍圍東鄉南豐寇援崇仁劉典席寶田合擊敗之寇勢西趨移  
王沐撫州軍屯豐城東界檄王文瑞退西屯永豐丙戌鮑超進軍遇南豐援寇於豐城東敗之庚寅東鄉  
圍軍進距城十里遂止屯七月鮑超議攻許營或曰寇已聚撫建善勢思退未有所決兵法窮寇勿蹙歸  
師勿遇不可輕戰也或曰汪李二寇當敗亡之際猶不相下有地而棄之又不能卷甲蹈利逃死巖險而  
貪連大衆久屯腹地此其愚不可奪吾軍遙與相持示之以怯一路潰解則諸軍瓦解諸公但知貪賊自  
重不知敗死之可憂耳公行兵利速戰請一鼓而破之王寅鳴角直進屯後羣寇方瞭望前鋒已逼壘門  
寇四散迎門斫擊之因燒其屯羣寇大奔既克許營遂進攻金谿捷聞曾國藩與壽沈葆楨曰鮑公以偏  
師破賊數萬出人意外然超不知文字其戰狀衆莫之知也己酉東鄉寇走金谿金谿寇走瀘溪崇仁寇  
走宜黃超進兵程之東鄉寇將率衆六萬詣軍門降賊超悉納之收洋槍精兵七千人以謀己軍復據

餘寇走新城王子宜黃寇走南豐超進屯建昌乙卯裨將唐仁慶遣兵收新城寇望風東走丁巳南豐寇走廣昌南圍南都知州郭毓龍城守寇走零都王文瑞軍乘之寇西南走信豐犯南安不得入悉黨歸瑞金超休兵南昌岳斌進駐南都悉徵水陸軍會師席寶田以浙防空虛疑不進曰今浙寇未盡殄而聚兵一隅如何哉岳斌本以寶田首嘗浙縱寇侵左宗棠心銜之至是因奏以違節制奪按察使降補知府奏甫上浙寇大至巡撫急召寶田而岳斌亦奉 詔補陝甘總督促赴鎮於是王開琳先還屯開化王德榜劉典還婺源江忠朝追寇在南贛八月寇出開化犯玉山擁洪福西行浙軍將黃少春先扼廣信劉典出屯貴溪寇走鉛山將循建邵邊合瑞金寇屯將張岳齡合王德榜軍邀之寇疾走瀘溪斜趣山谷間晝夜行諸軍將皆甘心洪福爭百里而趨利鮑超自出南豐席寶田出瀘溪王開琳及劉明珍魏嶮義等皆至江西追寇瑞金寇亦東北趨石城道謀迎洪福九月席寶田邀寇新城不及遂率輕兵裹糧行三日夜及之廣昌寇馮領殊死鬥官軍踊躍赴擊大破之寇三千人纔千餘脫南走軍疲欲休寶田曰洪福在此今縱之與瑞金來寇合不可得矣度寇一日未食必止餐令軍士傳餐夜進己酉平旦及石城見炊煙令繞旁山先設伏及陳寇見官軍遽走入伏中俘斬過半於是生得諸洪及洪福未昏妻而洪福走免寇悉潰散無可追迹乃止屯癸丑鮑超兵至瑞金瑞金寇南奔武平辛酉寶田軍所俘小兒牧馬者語其曹曰小天王過此矣即訊之洪福乃反從數小兒北走就食之諸俘者皆曰是也洪福之未獲羣帥爭以爲重至



是以聞 詔曰之弊漏網不直權送京師磔之南昌市而在海洋等入福建復連陷汀州列縣李世賢踞漳州 詔鮑超分軍遣婁雲慶與劉典王德榜軍俱入閩王文瑞先授贛南道澄本任王開琳兼將其軍屯贛州周寬世自信豐東進長甯張岳霖自龍泉屯會昌固南贛韓進春屯瑞金劉勝祥屯廣昌與席賚田石城軍俱防撫建寇往來福建廣東界頻破張運蘭林文察高連陞劉典及廣東李復泰軍左宗棠至浦城督師復徵江蘇軍助戰鮑超假還奉節前軍當援甘肅者憚西征且多新降寇樂攻剽至金口以餉乏爲名叛而南走四年四月庚寅叛軍掠袁州袁州城守不得入江西西界復震王開琳屯永定防在海洋者亦爲海洋衆所圍屯破沈葆楨旣以母疾假歸遵母喪署巡撫孫長綬亟奏起復葆楨葆楨辭劉坤一代爲巡撫坤一前將湘軍久在江西諸軍將無不相習聞其至皆喜五月叛卒走廣東合汪李羣寇江西諸軍並防南安曾國藩以坤一猶未上遣江南軍將劉連捷等屯臨瑞兼捍湖南邊叛軍趨信豐東南犯興甯與寇會龍川不相容復分犯平遠鎮平八月席寶田自平遠進攻寇逆戰寶田先令精兵繞攻其後乃列陳大戰在海洋之戰也務猛進其所將皆羣寇養子年二十以下居兵間十餘年情不知畏死故寶田堅陳不戰俄而我軍斫寇屯直出其壘門裨將榮維善望見海洋大旗急前搏之刃其背於是寇大敗走自拔來歸者七千餘人浙軍遂收鎮平寇西掠長甯定南龍南寶田周寬世移屯信豐婁雲慶王開琳進自定南左宗棠以爲寇終不復東犯則遣王德榜還汀州而躬率親兵八百人駐漳州丙午高連陞

之師敗於長甯己未席寶田大破寇於信豐寇復南走和平園連平鮑超復至江西招叛軍巢雲慶仍以  
軍屬超劉典自南康縣進南雄寇陷嘉應坤一授巡撫事將出行邊江西南界復定鮑超進軍會昌因奏  
請左宗棠入粵督師語在浙江篇十二月嘉應復羣寇悉平仍 詔超軍入閩寶田軍授黔諸軍將當赴  
官者多乞歸壯丁還農東南休息

終



臨淮篇第九

當安慶江甯之陷民士流亡棲集無所而皖豫楚邊地曠俗悍不甘於坐斃梟鷲姦滑者皆得扇誘徒衆挾以自彊則李兆受苗沛霖恣其傾危復倚官勢介於江淮肘腋之間亦若足以爲患言兵者深憂之故朝廷恆特命一重臣專治淮北軍官軍皆苦乏餉而李兆受擁軍以致巨富言團練者苦不相聯結而苗練以橫彊見重於寇因以抗官軍二人之見羈縻皆由勝保咸豐八年五月勝保袁甲三奏言年來南軍屢捷逆餒就衰而金陵未即克皖北未肅清者皆由李兆受糾黨二三萬橫截官軍以助賊勢句結北捻以樹賊援今臣軍適當下蔡寇捻之交李兆受請進兵舒城願爲內應宿州以南羣盜經苗沛霖勦撫有效臣袁甲三即可南下扼淮合力攻賊於是勝保躬至清流關兆受率其弟及頭目十餘人迎見更兆受名世忠 詔授勝保欽差大臣專督安徽軍袁甲三專討三省捻寇沛霖亦受節度平懷遠諸圩是時李續賓方克九江進兵舒桐廬州羣寇震懼九月世忠以天長歸賊留其衆號稱萬七千人列爲豫勝營不請餉令捆鹽自賣以給軍沛霖連營澮水十二月捻寇圍攻之旋解去九年正月捻寇薛之元以江浦反正與世忠共攻浦口寇城克之勝保劾罷甲三各以專防徐宿 詔總兵傅振邦代領甲三軍振邦因與沛霖共攻捻寇於鳳陽北多所禽斬四月張元龍以鳳陽府縣城歸賊因收臨淮關沛霖復從振邦攻下肥水南叛圩積功記名道員加運使銜其時自江至淮號爲王土世忠亦以保滁州守來安收全椒功

授參將六月勝保悉兵拒寇盱眙安徽巡撫翁同書居定遠危懼出走壽州捻寇遂陷定遠八月 詔起  
袁甲三以漕督屯防蔣壩勝保移營五河其時江浦六合天長盱眙復爲寇陷而捻寇復踞鳳陽臨淮勝  
保以母喪歸袁甲三代之十二月沛霖從官軍復臨淮十年正月世忠復進兵滁西以應定遠官軍收鳳  
陽沛霖以功補川北道然不冠服令其下稱之先生所平圩輒置長收其田入之半緣道設關隘籠斷公  
私渦淪潁之間苗練爲豪矣世忠則授江南提督自滁以西北屬五河皆其關鎮然勢弱沛霖視之蔑如  
也勝保改督河南軍而甲三屯懷遠患翁同書之懦奏以湘軍將李續宜用按察使補安徽巡撫復奏用  
習沛霖者賈臻張學醇爲藩臬以爲假湘軍威臻等游說可駕馭沛霖 文宗悉從之續宜不能來臻至  
遂署巡撫八月英吉利兵船犯大沽天津師潰 詔勝保總勤王師徵及苗練於是沛霖大喜設高臺聚  
大衆號哭言夷變事陰欲其下推戴衆相視默然而罷俄而和議成安徽寇復蹂淮北地苗李軍頻敗亦  
稍通寇相首尾十月沛霖遣徵壽州練總集下蔡頌旂後者斬壽州練局因搜城中苗練總七人殺之翁  
同書居城中爲孫家泰徐立壯所劫因奏沛霖跋扈狀會蒙城宿州亦告官誅苗黨沛霖忿聚衆誓先取  
壽州甲三兵弱不能問懼大亂之不可弭也頗咎同書因營立壯及家泰十一年正月沛霖攻壽州立壯  
等亦自聚衆禦之欽撫臣言苗事者前後百疏卒持兩端不敢言討日夜促湘軍赴援湘軍實無意及  
之因奏言勝保可制沛霖而勝保在山東陽引沛霖自重實亦不敢至也淮南北亂已十年是時洪寇盛

夷事亟 行在宵旰憂勤而同書等曰張苗勢議論交訐沛霖益恣同書知援絕糧且盡又惡徐立壯招寇自助因案誅之執孫家泰繫獄中沛霖遣練總從張學醇至正陽關因奪關絕糧道學醇走壽州將檻送家泰家泰自殺城中人兇懼復議死守守百日食絕斗米至十萬錢九月城中姦人開門迎沛霖沛霖入謁同書請同書妻已不叛狀 穆宗即位尤注意倚湘軍安慶既克 命彭玉麟爲巡撫玉麟固辭復授李續宜而沅霖以其間略地脅衆徒淫肆無遠志也同治元年正月湘軍將成大吉等出固始援潁州多隆阿進攻廬州二月會國荃前鋒至無爲巢水軍下潯須 朝議以金陵可乘 詔世忠會師世忠乃愬己軍乏請月給萬二千人餉且請增調戰船江甯寇攻世忠沿江三屯陷之遂陷江浦分黨攻六合世忠部將城守三月成大吉等軍進潁州寇解潁州圍南走沛霖見官軍勢盛請命於滕保以討捻自贖勝保以聞且奏止湘軍四月多隆阿大破陳玉成遂克廬州玉成前結沛霖通捻寇以合據潁壽因走壽州沛霖恐多隆阿兵遂進因誘禽玉成送勝保潁州軍中語具會軍後篤勝保旣如湘軍功且欲養沛霖固兵柄陰右之沛霖又收潁上城以爲功李續宜旣惡賈臻勝保復奏臻功語侵袁甲三續宜因以和衷爲詞置潁州度外甲三亦請疾去李續宜代爲欽差大臣雅不欲居臨淮而安徽事大定所部萬餘人當戍淮南北又先大言必討苗練慮發難以不勝爲笑假母喪固辭多隆阿亦奉 詔赴陝西江北空虛 詔從續宜請以唐訓方爲巡撫當是時中外達官相阻誓者皆以撫安徽爲靳甲三聞續宜去遂亦稱病篤

待唐訓方至而行閏八月沛霖空壽州及正陽關蔣凝學分軍屯守蕭慶衍屯霍邱成大吉毛有銘屯潁州營於三河尖又分軍屯固始王戰駟屯六安皆績宜都將也袁甲三部軍水陸馬步二萬餘人分屯五河靈璧鳳陽定遠懷遠蒙城以張得勝王才秀朱淮森徐顯朱慶等爲大將又頗襍用練丁率不任戰守仍倚李世忠爲助訓方雖起軍中舊部已散倉卒召募復遣防廬州安徽四戰地農商逃亡租稅無所出故至臨淮者輒貧弱爲沛霖世忠所輕世忠所據地潁江猶時與寇爭沛霖自依勝保益收潁南北丁糧陰結捻寇無外患勝保移陝西騰章詆楚師爲沛霖請隸於僧格林沁僧格林沁駐軍山東初亦惡沛霖沛霖偵知外藩王子驤貴寄耳目於左右又自負忠勇以湘軍爲邀功因間之果奏調苗沛霖倚以平捻沛霖復譚行陽言當赴陝助勝保道路藉藉以爲苗練反苗練實不能反而勝保遂以此得罪逮問沛霖乃自結於僧王矣十月穎壽圩丁並殺湘軍樵采者以挑釁沛霖因懇請撤楚師僧格林沁犒苗練軍萬金徵之從征會國藩知湘軍力未足自固因託以和巢含舒空虛撤壽州正陽屯軍退守霍邱舒城廷議大駭僧格林沁慙沮更奏辯然沛霖猶未敢起是月江甯寇北渡者十數萬掠江浦浦口西陷含山和巢言者疑李世忠與句通世忠自陳戰功且請餉會國藩與銀二萬五千米二千石二年正月世忠沛霖爭鹽戰於洪澤湖世忠遂盡餉西壩棧鹽塞高良澗以遏運舟湘淮軍衝澗以通運唐訓方恐生變因奏其狀世忠既結怨沛霖亦防官軍率所部北屯五河二月寇悉陷世忠沿江屯世忠留五河不能歸奏納

己官以贖勝保罪 爾奪官留軍又以江浦不守請罷奏以朱元興統其軍 謂仍留任令堅守濠州六合其時捻首張洛行已就俘新沛縣率衆至蒙城失所特因謁巡撫請散練歸農訓方示諭諸團牙沛縣因潛斷鴻水絕陸淮蒙城糧道訓方自宿曉還營僧格林沁已移山東猶以恐生變爲言請示羈縻沛縣揚言僧王殺已降不足爲盡力卽裴懷遠踞之攻壽州掠潁上陷鳳臺圍按察使馬新貽於蒙城練黨號百萬然皆烏合屯聚相持無他技壽州知州毛維翼者李續宜所委用將五百人自衛本起奔走小使無文武材沛縣故輕之四月蔣凝學援壽州輕敵深入致敗凝學慮阻止屯九里溝不敢進毛有銘繼之亦遂合屯潁州知府英翰遙爲聲援而已捻寇自六安合犯定遠歐陽勝美自廬州來援寇退南走周寬世移屯六安成大吉進潁州巢和含山寇南渡天長六合來安皆解嚴五月江南水陸軍克九洲湖蕭慶衍屯江浦臨淮餉匱絕訓方自食半菽與士卒均糧 詔袁甲三於陳州募米甲三遣募之亳州太和民團得千石以濟軍徵淮揚水軍自洪澤湖入淮李鴻章以太湖戰事亟奏留水軍僧格林沁攻淄川寇久不下 朝旨以討沛縣責之乃先遣馬隊至宿州六月戊寅下蔡盜夜開壽州城毛維翼死之將帥自會國藩以下罰降有差沛縣西窺霍邱七月水軍將丁泗濱王吉率三板船百入淮清江軍將黃開榜率百船繼至李世忠亦遣千人出鳳陽西南訓方檄馬新貽還臨淮移英翰守蒙城沛縣增壘夾淮以斷淮水戰船不得行運道復斷於是水陸軍皆焚船燒屯退保臨淮沛縣以爲官軍破亡可懸足而待八月江北大



將都興阿自揚州遣軍二千以王萬清等將之又遣富明阿將馬步二千爲統將以援臨淮僧格林沁遣  
陳國瑞將三千人援蒙城國瑞驍銳自喜至則頻戰破蒙城北五圩沛霖先爲外壕自固憑壘發礮多傷  
官軍九月乙卯國瑞乘雨越壕身督戰斬退者軍冒礮石死傷相積卒不能入城凡傷死八百餘人乃止  
不進富明阿將所部循淮北岸李世忠增遣萬人循南岸同進時蒙城守軍五千人援軍三倍之餘防戍  
軍近二萬諸民圩見官勢盛爭反正壽州鄉民田端書等燒沛霖糧臺圍其下蔡屯衆至二萬十月李世  
忠平壽州東二十六圩克夏砦乙未僧格林沁前軍至蒙城富明阿陳國瑞英翰軍始合富明阿言英翰  
前屯小間而蒙城外無軍屯以此劾巡撫唐訓方丙申訓方遣軍規懷遠先攻蚌埠諸圩皆斂衆以過軍  
蚌埠寇知勢孤遂歸誠請獻懷遠贖死庚子夜官軍薄懷遠城東門開遂收懷遠其夜官軍圍蒙城者方  
攻外壕沛霖自巡壕跳而顛從沛霖者斫殺之斬其頭送王萬清屯外萬清秘之以巡壕斫死上功或曰  
殺沛霖者陳玉成舊黨也萬清殺之以滅口云沛霖死餘衆聞之瓦解富明阿等遂入蒙城壬寅收下蔡  
悉捕諸苗及沛霖妻子十一月甲辰陳國瑞裨將宋慶挾苗景開至壽州壽州反正李世忠亦遣將入  
壽州爭門相殺殺朱元興杜宜魁乙巳蔣凝學收穎上丁未毛有銘收正陽關己酉凝學軍至不相聞各  
隔水發礮相擊其後有銘知之乃解僧格林沁奏以爲湘軍爭功及 詔訊得其實世忠亦自領衆還滁  
州諸客軍皆罷訓方循撫諸圩收其兵械奏移鳳臺治下蔡於雉河集增立渦陽縣城將大有所治未幾

用富明阿前奏降官去喬松年代爲巡撫淮甸無事無所用湘軍矣三年正月癸卯朔李世忠移文總督以所守六城諸官軍接防遣散水軍以船駛入官其豫勝營宜罷或謂令隨征唯命先是僧格林沁奏請以世忠軍攻寇江南事下付國藩國藩言提督李世忠爲衆惡所歸咎有二端一則心跡難測一則專利擾民臣於元年接統其軍猶慮其反覆回測倒行逆施厥後接獲寇中文書中言力攻二浦始知李世忠實無通賊之事及其身披甲冑馳檄討苗若自知不爲斯世所容借此以求表白者壽州下蔡其部將被執殺者三人李世忠詞氣遜順無往年倔強之態亦若自知禍將至委婉以求苟全者今既新有助順之功誠不宜追究既往之事至調勦以資其力臣愚竊以爲不可夫降將驕兵力有餘則必跋扈而不可制力不足則徒壞法紀而反爲我累故借助於人者行軍之大忌也淮上之往事惟以官軍見輕而權勢下移今李世忠之部曲實弱於臣軍奈何欲倚之乎且僧格林沁嘗謂苗練矣迄不應命反激其變非計之得也臣當遵 旨令李世忠遣散部衆交還城池退出釐丰停給餉鹽將其放還田里保全末路以宣朝廷之威德奏上而世忠已有此請三月世忠悉發已貲及餘鹽給其軍三萬餘人人各數萬錢多者數十萬又官欠餉鹽五十萬包及修潯陽新城助錢萬萬修滁州學助錢五千萬滁州屯田牛種資本銀七萬助總督軍餉銀二十五萬九千呈請回籍葬親有 詔褒許江北悉定六月江甯復羣拾皆北趨不復至淮南矣自苗沛霖之未平穎亳有盜輒以苗黨爲名及其死諸城指顧而定所謂一夫作亂者邪世

忠爲擒巨魁手殺何桂珍比於狼子及其後度勢善變終享富貴一門至一品者五人貨產號百萬會國藩桂珍執友也力足以報讎而不能罪反引公義保全之世忠其可謂知悔者江甯平後八年世忠游揚州遇陳國瑞追衙壽州爭門事誘執國瑞備舟中國瑞從子呼救兩湖商船以鄉情應之者萬數世忠大懼舍舟走免會國藩案其事以國瑞彊梁世忠陰很奏奪世忠官國瑞故總兵降爲都司江淮之間復流言世忠謀叛詔國藩訪察乃遣人至固始探世忠所居則堂上設義塾竹籬堊垣與鄉農襍居羣疑乃釋焉

援江西篇第十

直省分疆同於一統而其私財力也甚於列國利害不相及故也自張荊文慶委禍江南而寇難屢至或死或因智者鑒之則曾國藩治水陸軍以應江忠源胡林翼湖北以事九江安慶肫肫乎其忠乎燁燁乎其威也不求功名功名固成然自是以外無聞焉者何哉故曰非常者非常人之所爲也所貴乎豪傑者爲其能開拓心志轉移俗人之風尚也然而陳不占習勇而陷義曹參畫一而作歌前事之師成功一也湖南壤地褊小無爭衡上國之志咸同以來天下莫強焉朝夕應人之求而已日富強巡撫布政使雖自他省至者素有成見見湖南省例不如彼則亦治兵籌餉以待四方之急豈非藉乘章倡之耶乘章前撫湖南境內之不能防其後縱橫四出無功之不立鑿覆轍知改弦故也江西與湖南唇齒自會軍出時謀者已言當出軍湖廣乃能自立乘章委事左宗棠宗棠違其言以力不足故罷未一歲湖北江西并淪陷湖南力愈不足乃始汲汲治援軍尤傾國以事江西殆所謂收之桑榆者耶鄉使乘章不聽宗棠宗棠久持力不足之說則湖南之亡可待也湖南亡而曾胡湘軍亦終因飄散無以自固然則洪寇之滅湖南之盛援江西之力也而論者曰此非願所及會有天幸乘國運衰 廟算耳則江浙何以傾覆閩粵何以不振乘章之功焉可經哉咸豐三年江忠源守南昌羅澤南往援將兵勇幾四千雖無大功而湘軍習戰自此起五年臨江瑞袁吉安陷沒湖南東界盡鄰寇廣東土寇復出郴轅關欲合大衆劉長佑王蔭

等軍轉戰鄴郡。西巡撫顏奏調劉長佑十一月擄寇平長佑回軍屯醴陵十二月。昭秉章募二千人具器械餉糧助江西秉章奏言湖南自桂東北至平江千餘里壤地毗連江西臨江瑞袁民積弱魁賊輒靡多迎導納貢民賊合爲一官驛不通然袁州地居總要距臨瑞吉安道里適均郵旅通行之路也楚軍赴援當先規袁州然後東北可以援瑞臨東南可以援吉安劉長佑所部千五百人增五百則爲二千人二千人易辦然未足以戰守也臣今悉徵南北勁軍分隸劉長佑期會醴陵瀏陽兩道並出以厚其力則江西得援兵之效而於湖南窘蹙之局勢亦翩然舒展進退自如乃增調蕭啓江軍與長佑合五千人長佑進萍鄉啓江進萬載未發而袁州寇輕騎略萍鄉醴陵屯將毛英勃躬率所部二百人約田興恕軍四百人往爭城興恕後英勃赴急先往遇寇城下直奔之寇退遂入城助守寇屯蘆谿不進英勃計曰我兵少待其至而合圍勢必不利不如先攻之破其前鋒則寇不敢輕來待大軍至而進彼氣奪矣萍鄉民見援軍三百人敢前攻皆以爲神兵寇散居民村叢出禦之英勃博戰猛銳當者輒靡然見其軍少又輕進相與笑之乃設伏山坡英勃三百人分四隊以百二十人結陳居後左右各六十人鈔旁山自率六十人前將踰坡其弟英俊諫曰前數百里皆寇屯也吾深入勝無所往宜收兵且退英勃怒曰誤軍事者此等言也夫勝敗在一決以數十人敗萬衆者多矣若敗賊因收撫難民土地人衆皆吾有何爲而無所往今以持重爲名實怯懦豈兵法乎遂進英俊馳從之果遇伏四鄉圍前鋒旁山寇皆乘高懸之左右後軍因

遇走英勃身博寇被二十八創英俊被三十創所將六十人者死二十六人英勃兄弟既力戰死觀者皆  
感激曰彼援軍忠勇如此吾等何爲不自謀而任賊至此且鄉者之戰使後有繼未遽敗也前笑英勃者  
更敬服英勃至今道旁民猶喜言毛軍戰事而田興恕軍始進屯醴陵界上寇遂陷萍鄉六年正月吉  
安陷江西西界州縣望風瓦解愚民多獻糧冊輸財物寇設僞吏置津邏而守曾國藩大軍孤居南昌南  
康間爲羣寇所絀人人寒心謀者皆注意通湖南 廷諭指地圖欲鑿漣率以通水軍其憂危如此二月  
壬辰長佑進攻萍鄉甲午游騎至城下寇隨出千餘人來攻屯逆擊敗之復追寇至城下寇告急袁州袁  
州寇曰來軍雖弱然嘗經陳未可輕也以勁黨千人夜赴之甲辰平旦分三隊來攻寇將黃衣騎馬扼峽  
口以督退者長佑躬將百人繞其後背攻之左右方進戰寇陽退長佑突從後衝峽口寇將反棄馬旁走  
於是失勢官軍爭追寇將寇將保村屋則擲火燒之寇亦擲火拒外軍火盛反自燒左右寇隊來救寇將  
已自投火死遂大奔其夜城寇自逃萍鄉復是日蕭啓江亦進攻萬載破寇珠樹潭袁州寇始懼乘章聞  
萬載寇強移田興恕軍往助之興恕突將敢戰自負其勇以長佑文備雖隸之不肯下也遇長佑營官怒  
其不下馬徑鞭之且自往責長佑長佑笑謝既至萬載啓江折節下之興恕喜爲盡力萬載僻小寇援不  
繼土寇頻迎拒皆破潰裨將楊恆升稍誘城寇得虛實乙卯寇將南走袁州楊恆升入城盡收所遺財物  
乃告啓江屯軍城中恆升祖父嘗爲萬載令謹樸爲士民所安坐受前任虧空免官縣人醴以償謝弗取

客居縣中以困累死至是恆升竟收萬載貨縣人異之瑞臨寇聞之忿怒糾黨分三道各數千人期必取萬載五月甲子攻興恕屯復分鈔官軍迎戰者啓江率衆擊之皆敗去辛未長佑軍進袁州甲戌寇合崇通新來衆謀襲瀏陽醴陵斷兩軍後長佑遣要擊破之乙亥萬載寇攻官軍屯興恕力戰反燒寇屯六月援寇增黨拒啓江湖北援軍將劉騰鴻等亦自瀏陽進萬載援寇聞之止瑞州騰鴻進新昌啓江趣合長佑軍攻袁州城留興恕屯萬載癸卯騰鴻收新昌甲辰啓江攻袁州城西橋不克乙巳長佑啓江合攻南門寇不出庚戌騰鴻攻上高甲寅進至瑞州於是自長沙東至南昌南昌北至九江千里通道如絃八月分宜寇侵上高遂攻萬載田興恕拒走之吉安寇水運餽餉袁州啓江等伏燒其舟十一九月臨江吉安寇合六千自分宜運鹽袁州長佑分三軍要之沈其鹽奪餘貨數百車城寇出救敗之十月分宜寇復來攻益調田興恕及醴陵屯將余昆元進擊之遂襲分宜戊申取之袁州城寇疑廣東新至寇戰不力新寇怒謀殺寇將反正辛亥軍攻西門有李能通者陳前歸誠寇益相疑十一月丙辰勦棄城走李能通都黨啓西門納軍遂復袁州俘斬二千拔脅從者二千六百人是時周鳳山曾國荃將六千人攻吉安劉拔元等二千七百人攻取上猶五縣復分遣啓江都將劉培元等將千二百人助攻吉安翼通贛水以西啓江患上高礙軍與田興恕往攻之長佑進新喻期會臨江留黃三清將五百人守袁州十二月壬辰敗新喻移袁州屯軍戌之丙申啓江收上高臨江寇屯羅坊聯新浚峽江土寇南通吉水長佑進軍太平墟欲先

攻圍江城以走羅坊之援啓江屯嬰哥領與瑞州軍相援應二月己亥吉安寇淨散沂濠合陸寇鈔太平  
補列陳二十餘里長佑前後被攻屯潰營員左右倉卒不及走多死者軍奔不可止長佑下馬坐因臥以  
誓死寇前後至者皆在數十步內親軍數騎遠擁之潰圍出卓族收軍士皆感愧自相呼止新喻軍亦出  
列陳水旁寇以故不追得保新喻軍存者十之一輜重軍實盡喪分宜三縣民士聞敗以爲楚將仗公義  
深入誓死吾等當赴其急傳集丁壯輦運兵米不期而至者七八千人潰軍還走者見民團奮義皆各恥  
各俱從長佑於新喻三日軍復振羅坊寇來攻者不陳而引去劉騰鴻聞敗恐寇併力啓江抽圍軍二千  
自將救哥領乙巳合屯丙午寇至分四隊渡水大戰田興恕恃勇突陳深入遇伏所乘馬中槍死左手  
被創騰鴻馳救與俱還亦多所殺傷長佑軍將劉坤一亦攻寇羅坊斬賊二百寇悉移屯太平墟丁未啓  
江進攻援寇寇逆拒力戰破之騰鴻還瑞州留千七百人助啓江戰守長佑亦資田興恕衣糧三軍和輯  
士氣自倍乘章增遣江忠義將千人往助長佑檄王珍將二千人自岳州出義甯南規寇勢爲游擊之師  
江西亦遣水軍將劉于濤帥戰船至臨江會湘軍湘軍援江西者吉安瑞臨軍三萬有餘供億絲費皆取  
之湖南北王珍既至臨江蕭劉與合軍攻城不利珍以久留師老又得吉安請援書即引師南渡輟進吉  
水攻寇水東一戰破之燒其五屯萬安援寇繞西攻樂安珍移軍往南唐甯都土寇援吉安閏五月庚寅  
與珍軍遇沙溪寇恃衆攻珍營分伏山林間待軍出而夾擊我珍閉壘踰四時寇終不敢近所伏衆備皆



出將退珍出六百人列橫陳令精兵三百人先馳衝寇寇爭擊之衆亂珍鳴鼓督軍俱進寇已失次則還走山隘相擠珍麾而前江西民新脅附者怯戰不耐敗往往伏地待刃或自刎寇奪氣狂走追奔四十里壬辰寇約萬安寇合攻珍萬安寇失期不敢進先至者亦退走珍追之拔民口六百餘衆走樂安崇仁宜黃啓江移屯太平墟拒破峽江援寇長佑作長壕自圍與臨江城寇相持甯都寇猶衆王珍進軍釣峰寇屯溪洲及兩岸連十餘里然莫敢戰逼攻之則爭走礙於水多自投擠尸相藉官軍踐之以渡斬寇大將兩獲不可勝計於是江西南邊土寇頗復解散其驅民餌官軍者不戰先敗反自蹂害殺之不能止土民脅於軍威亦多避匿不復以從寇爲樂而王珍名遂大振號爲虎云六月珍進軍廣昌乘章益增新軍千人及胡兼善軍五百助平撫建丙寅吉安圍軍潰退珍改趣永豐屯藤田七月庚辰朔劉騰鴻攻瑞州城力戰克之騰鴻被創死餘寇奔臨江過於劉長佑軍己丑崇仁宜黃寇分三道趣樂安撫州寇繼進屯林頭相首尾王珍分軍屯樂安城敗其前鋒躬率輕兵要寇太平市辛卯道戰破之寇保林頭日夜築壘自固珍休兵一日癸巳進攻林頭寇棄壘南走珍還屯崇仁宜黃間以觸暑轉戰病瘥未進吉水寇乘虛疾東行陷樂安殺知縣靳丹書珍還救寇遂去珍病益甚八月壬戌卒於樂安城吉水寇遂北掠峽江謀西趨袁州斷臨江圍軍後且撓湖南邊以致湘軍時連喪名將劉騰鴻及珍軍皆無主者撫建吉寇勢復張瑞州軍奉檄助攻臨江普承堯爲大將承堯故從搭齊布及後從騰鴻嘗有功然性矜盛不能獨將前軍

至峽江遇寇而潰退羅坊承堯繼至壘未成寇奄至軍遽北走長佑所遣應普軍者三營從而皆潰承堯北走屯嬰哥領三營還臨江圍是時王珍舊部分爲二軍留六百人屯安福張運蘭王開化等北出分宜湖南防將楊虎臣東進至新喻以保袁州蕭軍在劉軍西以通新喻屯防軍而遣裨將劉嶽昭助楊虎臣拒羅坊臨江城寇見三營敗歸則大喜日夜填壕待援至而夾擊官軍蕭軍屯秧田當前敵長佑餘二千五百人守圍壕朝夕不自保寇勢五倍將士危懼張運蘭等初拔用固不月教人以自累且未能自立要視劉蕭爲進退癸亥長佑獲寇諜言援寇數萬屯太平墟刻期約城寇同攻圍軍城寇皆拔鹿角束兵以待長佑念已軍且腹背受敵諸圍丁居民見寇勢盛皆懼不復相保其勢坐因其夜鷄鳴令圍軍率十人留三人壕守餘皆裹糶持槍分三隊躬率以進而先約啓江興恕盡發秧田軍來會甲子平旦合軍寇負衆遽出迎戰旌旗連十里軍有懼色長佑約衆嚴陳植立度寇火槍及我而後鼓之李明惠江忠義並馳斫寇寇逃走或曰此僞也宜止勿追明惠等已先陷陳衆遂逐之至寇屯寇將立旗吹角收衆拒戰盧秀峰繞屯後攻寇寇大潰燒其屯四十七俘三百二十人收營帳八百九十張運蘭聞戰亦自新喻進攻羅坊寇退保富田運蘭扼之峽江西長佑啓江還圍臨江九月丙戌湖北援軍克湖口軍勢益振十一月富田寇圍吉水張運蘭赴之解去援臨江寇屢不得志城寇乃議歸誠結約未定土寇懼誅持不下食盡掘草根爲糧乃謀突走十二月乙卯夜西門開衆議斷長圍壘之長佑曰吾從軍有年凡潰圍出走未有

能遏者也任之必自潰若力拒之彼致死以敗我則勢復張矣且多傷士卒以要無益之功非仁者所爲  
乃缺陷分兩翼自後驚之寇西走瑞州於道果逃散十不得三四八年正月長佑以勞疾歸劉坤一代領  
其軍啓江自領所部爲特將合攻撫州張運蘭王開化等繼進俱不相屬自是援軍分爲四矣復增軍助  
攻吉安柵江作壕期必克蕭啓江既專將則率田興恕等以銳疾深入爲能江忠義等效之精捷軍諸將  
自是起撫州寇謀出章樹復取臨江興恕馳輕騎破之傷亡三百七十餘人二月渡贛收崇仁王開化進  
樂安辛酉收樂安三月庚辰收宜黃壬午崇仁寇遜啓江等進軍撫州甲午止屯上頓渡乙未城寇逆戰  
敗之建昌寇見援軍益東遂西出官軍南謀襲崇仁劉坤一要擊破之王開化亦拒之寇主寇不得西崇  
仁團長汪波率鄉軍助遏寇羣寇屯四鄉者皆疑懼新冠貪守撫建而石大開憚敗召令入浙以此相猜  
啓江因進薄撫州城四月辛亥王開化等南攻南豐癸丑寇遜丁卯撫州寇棄城東走諸寇皆走己巳建  
昌寇南走新城王開化等入屯建昌援軍深入江西自東境至西境橫軍千里克四名城李績賓克九江  
李元度守廣饒水軍防南昌往來彭蠡曾國荃圍吉安所在皆湘將皆半資湖南北餉當是時胡林翼駱  
秉章名爲知兵督撫莫能與爲比亦益以平寇自任合奏起復曾國藩以啓江張運蘭王開化三軍屬之  
以援浙閩兩湖分供其軍餉會 文宗已詔國藩入浙八月吉安克江西巡撫奏留劉長佑軍爲江西軍  
屯撫州未幾軍疾疫死者大半仍歸湖南蕭啓江走及行而閩浙寇已掠江西廣東邊城永州陷彬桂圍

曾慶榮章懋留軍屯防啓江追寇入廣西國藩與率運餉至景德待吉安軍同出九江改治安徽軍語各  
在其籍自五年十月迄八年八月湖南援江西者水陸勇丁萬九千軍餉二百九十三萬前後攻克府縣  
城曰萍鄉萬載分宜袁州新喻臨江撫州新昌上高瑞州樂安崇仁宜黃南豐建昌府峽江吉水上猶龍  
泉崇義永新蓮花廳吉安其非湖南供餉者猶不在此數

卷之八

一

援廣西篇第十一

寇起廣西連十五年乃平廣西財力固乏又仍被兵寇公私如洗民無所安居聞江南群寇強盛多受誘惑及見脅虜所在成聚伺隙而出則必闖湖南湖南之援廣西非遠路也與其出而拒之不若入而登之之易也援鄰省者入竟或有所取糧至廣西行軍坐營悉資湖南不則軍立潰故其爲累也曠遠無已時而其收功也不足以表襮於天下非至忠者莫能爲此謀也然其後卒賴援將東下攻浙合勢以平巨寇糜餉於廣西取償於贛東若有天道不斬而報烏乎成敗之數有可察也必有可勸也咸豐三年五月興安恭城寇復陷其縣城犯永明零陵江華藍山臨武其時湘軍初興軍政猶因仍舊例奏遣衛永鎮遣防邊會所遣援江西上猶軍張榮組等攻寇桂東破之廣西寇不復出而永明等縣亦頗治守備要禽逸寇四年會軍東下王珍以軍留湖南專屯防南界而周雲耀趙永年爲永桂營將最爲知兵濶賀土寇滋蔓如故然終不北掠廣西紅巾寇自韶連通廣州勢張甚固不謀度領奕五軍屢乘官軍稍集紅巾益北趨郴桂旁及永州掠地至耒陽而桂陽鄉軍起及永州知府黃文琛明偵候據險要以待寇王珍軍往來游擊寇卒破韓語在防守篇七年王珍援江西庚申餘寇復結廣西叛將黃金亮合興安靈川土寇分五營攻陷柳州桂林土寇遙起省城戒嚴餘寇且北掠全州知州蘇鳳文告急湖南湖南宿將盡出征則以蔣益澧將軍五百八十八人南援益澧初從王珍後隨會國藩皆見謂益澧不得意以廣西遠且貧無願往

者固自請行五月至全州寇易湘軍遠迎賊益澄所部有征討北者亦易土寇以爲不耐戰直前搏之  
三戰三捷寇奔走遠聚保興安遂圍之乘車先遣段堇器將勇千人徼益澄遣江忠濬將千餘人自新  
甯來會師寇增召靈川寇合拒官軍七月益澄等合攻援寇大破之城寇懼棄城南走丙申復興安興安  
靈川餘寇合平樂寇據府城死守乘車增遣黃輔鼎蕭榮芳將八百人出恭城九月會師自恭城進平樂  
寇用戰艇依水通糧築屯平樂北二塘墟沙子街阻險自固益澄盛兵攻沙子而躬率精兵險山出楓林  
石峽夷寇二屯間背擊之因燒寇艇遂破沙子屯與忠濬等分軍已繞二塘攻城南忠濬緣水進屯城北  
寇旣失險皆還保城桂林東南北寇連敗勢衰羣盜分屯柳溝梧慶遠各自爲部不相援應益澄等軍薄  
平樂城爲屯寇馮城唯恃險以守黃輔鼎彭玉山率衆攻之手大旗先登中敵死軍乘之十一月壬戌克  
平樂當是時湘軍鋒銳甚蔣益澄遂爲名將巡撫勞崇光奏留督軍而乘車奏助益澄軍餉銀月二萬於  
是議增造戰船募水師自長沙造船六十餘火藥七萬餘斤以益其軍八年益澄軍入屯桂林勞崇光因  
奏益澄署按察使時寇起已十年東南軍事日棘竭兵餉於吳楚未遑問廣西事提鎮備員而已權歸巡  
撫無所得兵食率假招撫以愚羣盜羣盜亦利假官令以脅愚懦故官軍土寇相蹂橫行省地吏不能請  
院司寄坐城中守城將皆盜魁人人寒心益澄至乘湘軍威悉案誅諸桀黠者易置守軍然後巡撫以下  
坦然安枕故甘委權於益澄益澄自五品階官躋兩司不滿歲年未三十志氣輕傲以英毅自喜既專兵

新以次討定潯梧屢遣空府縣官始治民事徵租稅如平時而柳州盜屯踞蟠固自以水師不能至四出游奕連結湖峇益澧計戰船當由潯浮鬱泝潭水回復千餘里象柳間岸狹備急不利水戰然不絕水斷渡則城不可取也乃具舟修仁令軍士舁負三版小船陸行九十里置洛青水中礮礮建旗鳴鼓下潯州城南門扼其津渡城寇山盜不復相應遂克柳州黃金亮走古州八月連州寇復起據賀縣益澧遣裨將潘家馥蔣榮華往攻之寇攻家馥屯軍潰退平樂榮華屯阻寇不敢還遂北走永明因至永州時論大怪之益澧自將攻賀軍疲復敗寇遂圍益澧鄉民劉鴻生等集團丁力戰拔官軍益澧因得潰圍賀縣陷未幾寇出湖南而黃金亮復走懷融益澧仍還柳州九年春石大開入湖南所過緣邊羣民皆相扇動益澧獨屯柳州捕討旁縣盜大開前隊掠全州崇光檄令回援因分軍留柳籍將二千餘人防北界大開徘徊永寶間遂圍寶慶益澧還省城勞崇光遷督兩廣曹澍鍾爲巡撫益澧代爲布政使七月石大開自東安掠全州而永明土寇出恭城益澧出扼平樂寇已大至偵城守設備北走澧陽合全州來寇掠興安直攻省城初至者三千餘人三日衆至數萬省城久不虞寇至是大駭急召益澧全軍益澧軍雖號五千以餉闕頗短其數又留防柳及敗潰失伍者過半才將千餘人皆疲乏無軍容學政李輔熙居城中亟詣益澧問方略益澧大言無所詘輔熙因上奏劾益澧優餉玩寇曹澍鍾亦請援湖南 文宗詔促湖南赴援降益澧道員而劉長佑蕭啓江復有事於援桂林矣寇之南犯也諸軍將皆策其必竄黔蜀不注意廣西及



謝鍾繼熙等爲危詞請援且侵湖南而劉長佑軍至東安士卒病不能進故以蕭啓江先行八月至興安石大開已西過義甯瀘陽寇亦連屯靈川欲俱西走聞援軍至列陳大榕江東西以遏追師啓江進擊之寇交綏因退走益濇裨將蕭榮芳亦自柳州赴援與啓江軍會省城下寇解圍俱趨義甯於是曹謝鍾等喪解官祥奎爲巡撫未上謝鍾因奏留蕭啓江防西北而分益濇南出荔浦以防柳州時援皖軍亟奏請啓江 詔授劉長佑爲廣西按察使督湘軍長佑將八千人自永福西進寇柵柳城西連羅城天河南引慶遠分趨柳州復京犯藤昭平蕭啓江已北還長沙長佑乃南攻柳州十年正月克柳州民團因收柳城 詔擢長佑布政使增蔣益濇軍至五千屯陽朔以東規平樂廣東援軍進梧州寇悉西趨而賀縣寇踞經二歲官軍不遠問復奏調湘軍將劉嶽昭自江華進攻之三月湘軍將陳品南進富川戊子復其城嶽昭自富川西禦昭平援寇於春頭源寇悉保賀縣四月蔣益濇自平樂來會師寇多詣湘軍歸誠五月軍至賀夾水爲屯賀城東隔水有大市口東街居屢盛於縣城寇據爲柵戊午王月亮李金陽分攻東街破二卡因燒其壘寇爭走水西謀保城益濇軍先梯而上己未克之援軍還曹謝鍾奪情已踰年復奉 命督四川軍胡林翼論罷之 詔授劉長佑廣西巡撫仍擢用蔣益濇爲布政使駱秉章將湖南軍援四川未幾補四川總督於是湖南方謀東征增稅募軍以應皖鄂石大開餘黨雖往來融瀘間率疾過無攻戰之事廣西姦民亦頗盡靜長佑稍以文治能自固不假鄰援矣及浙江事急左宗棠亟表請蔣益濇自助

詔改補浙江布政使將所部八千人以往益潁自至廣東請餉於總督勞崇光念其舊功賚給數十萬其度領軍勢甚盛亦戀前事更折節惜名譽遂平抗湖竟躋節鎮焉然廣西民尤感益潁首功所至爲祠祀之山谷間往往而有故夫湘軍推鋒之功效矣



援貴州篇第十二

自武陵屬貴東於秦時爲一郡之地前代別置巡撫然繼寇之爲患蓋矣貴州之政令行官吏具則以天下之財力供給一隅而湖南亦勞於轉輸及於軍興東南困敝貴州苗民乘亂而起則湖南專受其禍雖欲苟息不可得也咸豐四年冬興義安順普安土寇紛起陷普安及安南城貴州巡撫蔣蔚遠督軍遵義討之奏徵湖南兵騎乘章奏薦韓超徐河清以爲貴州不能用其才而徵調煩費無益其時永順義民亦掠府城屯聚拒官會辰沅軍至乃各解散五年十月銅仁舉人徐廷杰以苗教橫恣假征糧浮勒名扇黨陷城殺知府葛景萊洞寇和脅者萬人十一月出陷松桃遂攻鎮草城鎮道城守乃縱掠而去然麻陽晃州糜爛矣湖南官兵以黔寇烏合易襲因尼之果散走松桃銅仁復定留兵代戍之六年蔣蔚遠以同知王敬烈知銅仁因亂株連良懦皆悔其不反於是五洞團丁起應逆五月攻貴州江口官軍破之湖南戍兵多傷復增軍往貴州吏無有官銅仁者乃以知縣彭澗攝知府以知府楊書魁攝貴東道書魁將三百人以來於道被劫三百人先潰囚書魁彭澗懼出走亦獲之鎮草總兵文安屯界上與銅仁戍軍爲聲援七月寇犯晃州九月松桃石峴苗寇永綏而永從苗先犯通道黎平六洞苗入靖州復合土寇陷古州麻城古州額兵四千火器儲積爲貴州冠靖州自此無安枕緣邊屯砦焚毀略盡湖南西防南北皆急乘車以銅仁寇乘沅水數日可越辰州尤注意銅仁寇攻銅仁城爲戍軍所卻因趨鎮草以嚴備不得入戍軍

將吉隆阿等襲其屯破之銅仁解圍十月進攻銅仁縣三元屯屯倚石壁設層堡用土民計繞沱水坪取山徑襲上堡約良民舉火中堡田宗藩等攻下堡比至上堡已破寇皇怖奔散遂克之進攻壩盤裏糧盡掘山薯以食三日援軍至寇退保三角莊軍從之苗寇離解自潰去拊楊再魁於寇中悉捕斬諸酋首捷聞蔣爵速慚愷仍檄王敬烈知銅仁以餉餓楚軍戍軍乃歸十二月出軍靖州西北界討永從苗七年三月攻金山砦四月克之苗繞犯靖州不得入援軍進黎平增軍攻永從六月收其城饒貴州將韓超軍舉三萬駐軍黎平招撫六洞苗八年三月廣西懷遠盜合古州苗扇脅都勻石阡清江諸苗糜聚黎平遣田輿恕助拒之俘斬甚衆時鎮遠復陷而思南教民倡亂分三部思南爲白號銅仁爲紅號思州爲黃號皆持天主教以惑衆分犯銅仁晃州苗教屯聚至數十萬援軍枝柱思州清谿玉屏邛水間頻以捷聞九年石大開犯湖南悉兵防永寶檄古州援軍還八月大開走黔邊思州苗紛起響應乃復議攻思州九月破風崖等五屯進收鎮遠苗聞官軍至輒棄屯走收其空城遂蒿沒人又分軍進黎平偵大開所至爲防以田輿恕爲特將十年寇自夔安犯遵義土寇陷平越延及龍里貴定省城危急輿恕改道出銅仁石阡徑赴貴陽三月軍行鎮遠苗復攻邛水天柱援軍退還黔陽是月詔擢田輿恕以副將署貴州提督增軍滿二萬悉由湖南轉餉六月辰永道程誥以習邊事由按察使署巡撫命駱秉章督軍四川既受代而秉章察誥浮情奏劾罷官於是議者稍稍疑援黔軍未盡可用而周洪印戈艦之徒適有平茶之敗退屯

靖州十一年三月黎平苗出圍靖州掠通道綏甯石大開餘黨從之復走義甯靈川諸軍皆南防五月苗圍攻銅仁 朝議慮石大開脅苗寇大出爲楚蜀患尤重貴州授田興恕欽差大臣以湘軍將江忠義爲貴州巡撫興恕忠義皆年少英銳以爲功在指顧湖南巡撫毛鴻賓奏留忠義防西南邊疆以部將侍之又以興恕起勇目佩欽臣關防陰奏劾此兩人自駱秉章後湖南巡撫權重會興恕捕斬天主教主法琅西懇之奪官更以江忠義爲提督韓超爲巡撫忠義將軍自廣西赴安徽俄病卒興恕後出四川吏議當遣戍貴州自此不振十一月石大開連陷會同黔陽辰沅大震同治元年正月寇西走援軍始復進麻陽三月石阡銅仁苗寇攻貴州鎮道軍屯悉破之遂攻印水戍軍援軍進據銅仁寇南掠松桃北攻天柱鎮軍總兵分部防守印水戍軍潰退增兵防晃州 詔責韓超田興恕專恃援師負驕寄五月復徵水軍扼沅水自石阡至思南苗寇勢最盛諸援軍率以數百人爲一營多至數十營不相統制以斬級焚皆報捷者日有聞其地形兵勢雖土人莫能明也七月軍進天柱印水寇散走收其城八月攻漢峒漢峒者寇魁姜映芳所踞十餘年官兵不能至至是乘勝招撫旁峒皆深入無阻旣逼峒火燒之皆寇無火器惟恃刀石火起皆踰峒逸去保清江援軍憚瘴毒皆還晃州分偏師援銅仁二年正月思南石阡苗數合踞剌竹園攻陷印江與銅仁寇結連分犯清谿玉屏三月清江苗陷古州攻黎平芷江黔陽姦民潛受誘惑浸淫及於內地矣八月石大開餘黨自酉陽入永綏掠會同綏甯走廣西軍曾遠數十月復出援黎平三年

貴西苗寇陷開州修文貴陽飛巖時張亮基巡撫貴州益以貴東委湖南二月援軍收古州益西攻都江而台拱清江苗衆屯聚深固莫敢直進乃益繞越深入以爲功苗以此并驅湘軍當入寇輒叩壁門呼曰吾當往攻汝湖南矣既掠歸復謝曰多擾汝湖南巡撫憚世臨起曹司躋大官唯倚趙煥聯以盲兵諸校將深相結卒苗寇無遠畧以故援黔卑比之援江粵者殊絕而勞費尤久五月天柱玉屏復陷七月犯沅州掠沅靖五縣十二月官軍復收玉屏大徵諸軍屯沅晃始有意於整軍已奏用趙煥聯矣四年二月憚世臨罷李朝章爲巡撫 朝議以洪冠平將合四川湖南財力經營要貴會有叛軍逸寇之防重戍東南邊五年春乃議援黔援黔大將兆琛周洪印爲最請習自黔事起領軍幾二十年琛以知縣至湖南按察使貴州布政使洪印以千總至總兵專其任日益無效靖州受苗寇沅州受苗寇兩寇而石阡荆竹圍勢盛沅防尤急乃仍用琛備苗而別起用李元度募新軍率洪印先攻荆竹圍貴東之用兵也皆步步值寇巢卡彼各自爲戰官軍大至則皆走少則不敢進精兵無所施勇疲卒則爲所乘元度銳意攻砦寇踞險自保時乘雨夜盜掠軍卒或方寢而失其頭及行陳林箐中暗傷斃者往往而有其合戰未嘗不勝荆竹圍驟不易下也前將失職者乃流言以爲琛等無過苗寇往來自如邊縣仍失仍復不可勝紀六年夏劉崑爲巡撫九月上奏曰兆琛等兵勇三萬歲糜餉二百萬名爲大舉援黔而境內之患更甚於前沅晃欽軍黔麻靖會幾千里無費居軍法不立故也援師例受賞而不議罪失城皆得歸貴州復則上功是故貴

州之蹂躪皆援軍之勳績也兆琛身任黔藩鎮遠失守不審機宜周洪印駐軍沅州賊至移屯托口賊退托口復回沅州取巧避兵會不知恥請免兆琛官議洪印罪遣散所部酌留三營屯防布政使銜李元度久攻荆竹圍曠日無功奏先奪一階而更薦席寶田募萬人援攻貴東 詔皆報可於是人始知法十月寶田軍至沅州將合攻荆竹圍十一月天柱苗出攻會同寶田裨將席啓庚方攻天柱聞警曰此苗寇故智也彼狂於軍出不還救悉所部三千人追之分六道要遮前後苗窮相聚保谷中啓庚獨領五百人入擊之道狹中伏戰死龔繼昌自會同出苗乘勝引去苗酋張秀眉語羣苗曰苗疆危矣往日官軍敗則走今深入尋戰此癡軍也汝曹謹備之李元度聞寶田至則急攻荆竹圍破旁砦二十五水軍將許寶坤破旁砦七益作屯逼之十二月辛卯寶田進軍石阡與元度察地形當據北岡圍砦乃可破元度進作二屯寶田列陳待戰寇爭岡攻李屯席軍遽退元度新壘不能固遂棄屯敗退明日寶田率軍因李屯而屯寇復來攻拒走之既得北岡寇無復固志七年正月元度寶田分攻圍砦東北卡薄門爭柵元度裨將黃元果先登遂克荆竹圍白號黃號教及石大開餘黨悍者俘斬略盡捷聞言黔事者皆驚喜以爲奇功元度進屯偏刀寶田進橋頂破三十六砦撫定者百有十收民口二萬八千奏言所定府縣隨營委賢能人員攝守令且奏薦葉兆蘭署貴東道事下貴州巡撫曾璧光璧光奏如劉崑所言二月張秀眉犯晃州三月犯沅州麻陽寶田還軍銅仁元度留石阡平餘寇築維善南趨鎮遠道還東要苗于沅州寶田要苗麻陽



皆先斷其歸路乃力戰皆大破之苗前以深入疾還疲我援軍恐獲善地不敢退故屢得志至是大創終不復東犯矣黎平永從苗乃謀襲通道戈鑿襲繼昌擊走之寶田至沅州會軍四月癸巳泝沅水西行壬寅克頗洞癸卯克德明甲辰克台笠乙巳克砦頭駐軍爲大屯以攻台拱初兆琛之援黔也久屯八弓八弓去砦頭二十里而近然游騎不敢望砦頭寶田既作屯羣苗大恐十二酋長分部作屯相保黎平又告急遣襲繼昌往守之李元度師會四川援軍於偏刀降七十八砦閏四月辛亥克偏刀元度告歸汰其軍留三千人悉隸席寶田寶田以繼母喪歸仍起督軍以榮維善暫領其軍事賈平麻哈清平苗援台拱合攻砦頭大營別襲德明分拒破之維善率數百人夜攻石隴苗駭潰苗之來也黨雖衆其戰地險阨即敗不能多死傷官軍恆聚攻之故散佚爲害一日數十警一地數十敵非精軍莫能散戰而維善尤善出奇用少苗以是大困五月江口苗繞攻清谿六月攻荆竹園七月攻上河皆爲屯軍所拒破寶田議曰台拱苗最彊破台拱則羣苗披落矣右鎮遠而左清江台拱之兩翼也不取兩城不能規台拱不通砦頭左右不斷賊援不能克兩城不悉平砦頭前路不能通道然專注砦頭苗乃從他道內侵文法吏反得持長短衆論喧譁軍餉不繼則事敗矣宜增兵處處爲防而後可以言戰乃上書劉崑請益萬人議者皆以糜餉甚鉅而平苗無益又軍例將五百人者將雖廉平猶歲入三千金凡購增兵皆利其所入疑寶田欲專大利然無以難之乃出省城防兵附以沅北戍軍不隸寶田者爲萬人以資調遣爲大將鄧子垣副之出

晃州北路而令寶田專南路寶田語榮維善曰言苗事者必曰勦此勇夫名將之事也夫勦者駢軍深入饋因敵糧夜宿敵壘行不持營帳居不依城營軍不時出出不時反乃可以入穴得虎而申其威力然其敗莫救徒有策無能行之者此岳鍾琪張廣泗之所以擅能惟君可以繼之維善嘗請行率所部轉戰山谷間自大營南取清江懸白餘里縣軍五日苗偵者率莫測所鄉時越大砦攻小砦或已過復還驟至清江北岸城苗望之以爲其部衆叛門已知官軍乃大驚嚴備將渡沅官軍已去時十一月大雪軍中亦不知維善軍所在俄而還營簿功屠七砦撫四砦砦頭南路平乃謀北通鎮遠攻抱金破七砦西通松柏洞苗合圍其屯方戰維善已先率唐本有等伏屯外卷旗草山行反圍圍軍所處仆相望十二月夔稿繞稿繞兩山險絕無路衆曰此絕地也維善曰苗處絕地獨我絕耶此所謂兩鼠鬥穴者也遣蘇克金先據右山唐本有自下攻而上維善橫貫其陳苗大潰顛自死者無數砦頭北至鎮遠八十里苗砦悉空黃潤昌聞之馳至思州遂攻鎮遠城鎮遠城分府衛然久圯苗長於守砦其踞城者無固志潤昌方平江甯還部軍氣盛直薄城梯攀而登江忠珀先上苗擊之殪軍繼入者不可止立克鎮遠劉崑知苗事將定復奏請 詔廣西合兵移戈鑑軍助清江八年二月維善軍進渡沅清江苗有二大砦自古負固雍正中總督鄂爾泰督大軍二萬圍攻公鷲屯董敖屯數月公鷲破董敖卒不能下以停軍久無以報 朝命招撫之而還羣苗恆以自詫曰吾輩不知何者爲反以兵來則戰以好來則撫饑則掠怒則殺耳吾不擾官官

乃擾吾唯有疆者勝耳維善至乃先越山攻放一鼓破之還攻公鷲又破之諸苗皆白七十八望風俱下清江廳城苗先走入撫居民皆以爲重見天日施秉苗震怖乘勝襲其旁皆收施秉西北破餘慶四川援軍已至黃平官軍阻苗才六十里 詔湘軍亟進疏通驛路於是黃潤昌鄧子垣促維善會師維善乃還大營悉集所部六千人合李元度舊部二千五百人與潤昌子垣所領萬人合攻苗自施秉進二十里曰白洗又三十里曰夔谷隴皆大砦所至悉下維善私謂潤昌曰吾軍不立營幕利在用少今連軍大進維善六千人精銳久疲且宜休士贏糧乃可進也潤昌雅重榮提督因止壘不進軍中以爲功在指顧疑維善欲專功以激潤昌潤昌先出時受劉峴戒及布政使李榕言專主防邊於道得寶田書盛推之大喜乃進戰又連勝寶田反與書戒勿輕敵其意頗愠至是人衆言則變計令拔營維善亦愠且笑曰我不能進耶反先發甲午度黃飄山徑斗隘行者頂趾相接苗憑山拋石擊官軍維善疾行先出險潤昌軍初見擊石仰望兩旁山盡苗衆以爲陷伏即駭退爭道相擠苗徐繞下棧出呼譟軍遂大奔人踐人而下潤昌再失馬與子垣俱死維善遣蘇元春往援亦潰退維善久待乃聞潤昌等敗死乃大憤怒袒衣持刀入求其尸獨親兵二百餘人從入遇已潰軍行亂苗益至聚者幾千數前後道斷維善旁保一山苗圍之久乃急起潰圍出反攻山間苗皆破之得其飯及飲復出縱擊三圍三潰終不得脫苗列炬夜守之凡三晝夜維善與二百餘人盡戰死其餘軍先走者乃皆無恙鎮遠敗聞湖南大震而苗方幸休息終不入犯

寶田論潰軍罪於坐叱下蘇元春縛欲斬之衆愬元春戰狀乃釋與徐啓瑞等皆令從戰立功以贖死四月乙卯寶田夜攻稿米關行五十里徐啓瑞戰不力立新之軍懼即攻破其營遣軍分守鎮遠及施秉寶田仍還紫頭 廷議憂苗疆乃更命李鴻章以平捻師移討貴東鴻章奏以轉餉運礙遠阻爲難仍議以席寶田當前敵而開幕府於沅州會有天津事不果來援軍易將又二年所進道皆兆琛等所至攘辟無百里人夏則避瘴氣休兵待白露軍士猶多物故寶田軍伍例缺額軍萬人不及七千言者藉藉爭欲罷寶田減援師雖藩司亦怨巡撫而劉峴持之益堅復奏言苗巢深險度兵勢必分三道一從清江徑指台拱一從紫頭進故施秉城取施洞一從施秉渡沅簡羸弱罪奔潰更增兵萬人立援黔營務處以張自牧領之寧司轉餉五月黎平苗攻屯軍龔繼昌黃元果合拒之六月戊申進破慶洞辛亥破冰洞七月刈其禾九月克施秉城始達施洞十月苗犯鎮遠鄧善燮自清谿赴之苗引去龔繼昌等攻抱巖九紫克之思州苗出攻州城蘇元春曰思州城非苗所利此必見官軍益西而欲襲天柱也潛師北還果遇之高浪拒破之九年三月大合軍攻施洞分四道皆力戰苗遇洞口發礮礮然自炸乃走九股河宿平敏又追之走白土是時苗地日蹙苦攻鎮遠以求招撫黃仁遣力戰城下施洞既破南北軍哨旗相望乃進施秉苗踞涼爽城復緣水作七屯堅遏兩軍四月戊戌悉克諸苗屯白洗苗急來援庚子敗去甲辰復至寶田率大軍躬破之苗奔班鳩倚瓮版苗遣三軍並進苗不能相救皆破之四川援軍進至黃飄白洗瓮谷苗始中

絕約四川軍將唐炯會師岩門唐炯者貴州名家子以守城知兵自知縣至道員負氣直言獨事既定嘗  
藩稍裁之議援軍可還專濟餉使貴州自戰炯聞之遽騰牒抽軍實田惜其功遂成飛書留之且上書劉  
峴請奏飭四川毋得輕退奏未上炯軍已還故白洗苗復聚清平重費皆陷八月龔繼昌定施湖北岸諸  
砦實田請先攻台拱專注力南進貴州之亂也種藩諸官困於孤城數十里外爲政令所不及上奏唯乞  
援請餉援軍交進而協餉罕至以故得地不喜失城無罪則亦不憂四川知其情則請月致餉五萬罷援  
軍俾貴州自募師討捕文武官貪得其權欣然許之四川援軍遂罷湖南專任苗事矣台拱砦百計革夷  
最大十月丙午先攻革夷旁三砦夜薄之皆潰苗酋方在革夷聞敗奔歸丁未革夷破分零左右諸砦交  
農最堅實田自攻拔之丁巳至台拱應城苗不守而走己未進軍九股河九股黑苗者自楊應龍以來頻  
拒大軍皆以深阻約降而退官軍未嘗入其境實田銳意滅之論者多主撫乃分別招討十二月雞請苗  
請歸化專討丹江用兵三月平苗砦二百一十丹江諸苗固馴弱十年三月庚子丹江平四月軍進凱里  
凱里者疆於台拱苗台拱昔所倚爲援者也見台拱破收餘衆使居全洞辛酉官軍屯方索坡望全洞凱  
里險固斷絕而官軍經百戰所破砦千數殊以爲易與實田以用兵久湖南倦於餉軍欲必破凱里而罷  
兵悉召諸將勉之期明日破苗而會食壬戌旦兩軍皆出苗恃險坐甲而守實田親鼓之諸將皆先進  
以率士苗拋石下擊多傷者莫肯先退乃直薄砦下苗用長矛挑刺而官軍火槍仰擊死傷相接攻久之

不下乃令諸軍更食迭戰唐本有者寶田里人也其名望在蘇元春龔繼昌左於席軍爲下中方食聞其部將死輟食袒而起遂馳至砦垣蹂躪而升諸軍方小卻苗憲息愕出不意本有旣登諸軍譟從之苗憲潰踰砦跳走頓死踐仆無數旣克凱里全洞從面潰并克之得官印以百計遂乘兵威悉脅收二百餘旁砦遂軍施洞沅水南北岸乾隆中所設六廳城皆復進麻哈定黃平苗事畧定寶田卒感瘴病風痺劉屺藉其名以統諸將未之易也苗酋張秀眉遜保雷公山甲申進軍逼之丙戌克其前砦丁亥克山下砦戊子秀眉遜燒其屯五月攻苗砦十二分兵徇旁砦皆下之軍益西進八月苗糾殘衆謀襲雷公山要擊走之苗悉衆保黃茅十月進攻之破其要隘十三砦直攻黃茅苗守一日夜潰走得屯糧以供軍張秀眉益不振而劉屺坐公事 朝命總督索之意不樂議寶田者藉藉十一年布政使王文韶爲巡撫議汰席軍以負軍餉數十萬無以償之猶憶未忍決張秀眉致書八砦苗將扇亂以自救八砦苗官拒其使二月龔繼昌攻施洞降其酋義宗使偵秀眉隨所至而攻之破八砦秀眉獨將數十人匿烏鴉坡生俘之斬以徇苗砦存者十之二皆良苗其能劫掠精壯者殆盡貴東盡平捷聞乃罷兵用陳寶箴計使諸營官自請半餉所當領銀三十六萬悉輸之 朝南方軍事告竣猶留防軍屯沅西凡四將五千人苗時小有反覆不復能爲亂矣

終



川陝篇第十三

湘軍興而其餉最絀恆仰羨於越蜀咸豐中蜀尤完富雖頗設防不至大調發自承平以來賦輕民懦官吏大小求取輒厭其望西北故寒瘠東南兵興言仕宦者至四川則忻然自湘軍起文武名者頗或遙授蜀監司以款勸之胡林翼治軍江漢仰鑲貨於上流恆欲通川督以自裨助同時資望材德獨曾國藩可重任而又久屈無尺寸之地故林翼私策冀國藩督四川特未有間未有以發也九年藍李寇寢聞藍李者藍大順李短荅居雲南昭通大關邊以運護鴉片爲私販魁其徒黨無慮數十部率三五人或數十人爲一隊往來敘州射利作姦然自託商販頗重身家無反心會老鴉灘私販有訟事汛官詐賂之不滿意因宜賓典史別陷以事捕二人置獄竟請府縣殺之販黨憤懼初謀劫獄既聚衆百許人道路兇兇邊縣震恐輔國公有鳳著總督遣提督按察使將千人往討不敢進筠連姦民導寇闖入縣城知縣先以病去府檄州判署令事聞變輒走敘州始聞寇俄報寇至高縣亦潰亂慶符令武來雨朝服縊堂上寇實未至姦民縱掠藍大順等約徒黨分三道長驅官軍遙屯府城西鄉民頗相約聚遇寇左右部部各百餘人見軍至皆散走其千餘人自橫江渡金沙遂攻敘州城中民聞寇至皆閉門多欲自殺者及夜寇不入城明日登陴會有鳳別遣營將明耀光先馳入城守後寇二日至城中人亦大定寇屯城外亦稍益附脅至數千人事聞 詔陝撫曾望顏爲四川總督徵兵湖廣於時湖南巡撫方奏與曾國藩進軍安徽以蕭啓江



諸軍屬之未發被 命遣啓江率所部援蜀胡林翼乃奏薦國藩因言蜀財賦險固宜以時鎮撫繫天下根本十一月寇自敘州分犯一沿江西走犍爲一北走自流官軍屯防者望見寇四五里外輒跪呼乞命寇頗先攻軍實而擊殺之又假義舉淫掠附者益衆既至自流虜鹽井丁夫數萬十年春合走嘉定不攻城屯五通橋號十餘萬於是築眉井研青神資陽皆騷動成都知府結有鳳以傾望顏 朝命駐藏大臣崇實代有鳳爲將軍案其事趣國藩入蜀而別授東純爲總督國藩林翼皆憚以空名將客軍復疏言江南寇勢盛宜先所急啓江帥八營四千人徑至成都於道啓江病不能軍比至望顏議授以按察使啓江不冝未幾遂死軍無統帥一戰井研大破寇解其城圍蜀南西洩亂寇散布不勝其討捕啓江部將分三統則亦觀望或縱掠無復湘軍規制望顏聞被劾則屏鹵簿單橋出入其中軍副將及布政使交侮之總督出逢副將傳呵辟人鞭其昇夫望顏不能堪東純至襄陽道卒 詔廣西巡撫曹澂鍾代國藩援蜀澂鍾不以知兵聞特習四川以有此命大喜將行遭母喪自誓奪情林翼劾罷之奏薦劉長佑 文宗意重廣西而念蜀寇無能爲七月 詔曰湖南巡撫駱秉章素習湘軍將士可督辦四川軍更增率湘軍以行九月駱秉章治軍將行幕客左宗棠奉 詔別募軍援浙秉章初不自治事乃請湘鄉劉蓉佐其軍湘軍將士名者多附胡曾左唯資瀘熙善劉蓉劉嶽昭故久在湖南從秉章行未幾石大開自廣西還出沅靖邊將入蜀兩湖相驚以巨寇各治邊防奏留秉章新軍於時崇實代望顏增募軍至三萬游弁驍將坐

食而行掠寇所略邛州雅州峨眉瀘川所破青神丹棱名山天全榮經洪雅隆昌樂昌江油長甯興文  
一魁一部分掠四出各有所結虜無慮百萬而雲南邊寇出筠連者凡三四十至所過無留難浸及川東  
湘軍將蕭慶高何勝必胡中和蜀將唐友耕奔命往來莫能大創之而石大開復自廣西還沿湖南貴州  
四川湖北界上崎嶇間行五省屯軍憚其名蜀尤震動湖廣督撫復奏留秉章防施南秉章自爲巡撫時  
稔知軍餉不肖應客軍故觀望未敢直進黃濬照議以本指授蜀今逾年逗留非法又雅輕劉嶽昭不欲  
與並將因說秉章分軍留嶽昭軍助湖南北防剿秉章率濬照軍分水陸泝峽上期會夔涪崇實見蜀事  
日棘度己材不足濟虛心待秉章頻上奏欲假 朝命促之且自言旦夕竭厥恐悞國事當是時封疆大  
臣雖見危敗知死莫有言己短曾國藩所至見餉乾秉章親遣之至欲資餉地主則撓訕百方唯蜀崇實  
懇懇推賢能常若不及秉章在道頻奏訴餉匱初不意四川能供其軍比至未入境總督公文手書殷勤  
通誠遣官候問冠蓋相望悉發變關稅銀資軍湘軍喜過所望時黃濬照將所部先發濬照將兵務推鋒  
尤恥言持重聞寇方圍攻順慶則從萬縣出山道赴之五月戊子朔至府城寇先南走定遠乙未濬照率  
軍趨定遠己亥遇寇姚店寇聚屯城西南連十餘里官軍逼壘前寇遽奔湘軍新從彬桂追石大開習寇  
勢見寇若摧枯朽士氣奮踣推鋒直前寇無敢迎拒或憑壘持刀矛稍發小槍官軍益笑之拋火寇屯寇  
大亂爭奔走數萬衆一戰而潰降死者千數捷聞鄉民及羣寇轉相告語以爲神兵庚子寇北走瀘川至

二郎場遇援寇合屯將渡涪涪未渡辛丑漳熙軍至自軍事之起也將帥每至一城輒留止號爲休息審勢而後進湘軍行雖速未嘗有連日行戰漳熙新從大將李績宜援寶慶見其行恆憤恥故其行軍晝夜赴利同時唯僧格林沁多隆阿恆數百里馳逐然僧格林沁多尾追而多隆阿應變無方非他將所能測皆與漳熙不同而三人者後皆暴尸被創死以快持重者之意語曰千鈞之弩不爲鼯鼠發漳熙其尤可悲者已漳熙遺卒三輩偵寇所鄉土人喜勝張軍勢皆報曰去遠矣不可及矣最後始知尙屯場中還報已甲夜漳熙先恐失寇令軍中募食五鼓行後令邁明持矛扣槍戒備以待寇傳令後者先至先者反後軍士失指前隊輕行突前漳熙領親兵三哨繼之寇前隊聞軍至亦夜出各行七八里遇於燕子窩交綏寇退漳熙比至場見寇分從兩旁登山以待官軍知中伏業已相見卽分所部爲三左右搜寇伏中軍直進於是四山寇盡出而前軍驚潰漳熙所分三部失勢亦驚漳熙驟馬率退者馬陷田泥棄馬步進衆潰不可止漳熙坐地上拔佩刀瞋目直視寇或刺之或斫之解其頭臂後軍聞敗引退其後隊遂不發結屯自固惴惴終夜所俘馬多夜嘶恐寇聞悉屠之而寇懼湘軍威乘勝急渡涪北去漳熙奔至而奔亡勝非勝敗非敗然四川寇自此破散其後湘軍滿百營終無覆亡者知蜀寇無能故也騎乘章自萬縣之順慶寇悉趨綿州其時湘軍無統將拔用曾傳理以附生領軍先湘軍將蕭胡何號三統川軍將唐友耕乘章護軍營將劉德謙絳州知州唐炯所募黔勇將顏佐才合兵萬九千人會師絳州城下蓋大順圍絳州

其黨分屯絲竹什邡羅江安彭李短塔圍眉州其黨分屯彭山丹棱青神夾省城南北百里內皆寇地八月秉章授總督移屯潼川崇實還將軍任仍署印居省城秉章初至夔逢曾望顏訴布政使副將狀而泣亦頗言將軍短楊重雅以署成都府事致累望顏身亦被謗忌出知順慶罷官傾心奉秉章秉章初不知崇實公忠推賢但知其吏治軍事叢睦既受命則劾布政使及督標中軍副將罷之何勝必等故劉蓉鄉里又聞新軍敢戰頗亦自奮四川文武聞秉章嚴靜洒然易心矣是月丁巳朔曾傳理等攻寇絲州西北門戰小利以違節制劾唐友耕奪官仍領軍自效寇收屯相保官軍作五浮橋於涪庚午蕭慶高率軍循左山趨寇後約傳理德謙等分中右進而夾擊黔軍先進未及寇遽發槍礮驚之寇乘之佐才退德謙傳理繼進相持慶高等自山後破寇二屯傳理復分軍鈔寇旁寇乃大奔解圍南走羣寇蟻附無固志則皆南走遼省城西南掠郫邛遼丹棱川北號為肅清乃休軍論功而湘黔軍門絲州州堂秉章復奏劾唐炯罷之炯之守城借財募軍有拒寇之勞四川州縣論知兵以炯為首既超擢夔州知府復負其能又其父雅善秉章慷慨自喜無所推讓湘軍制營各有長夫運糧械雖過郡縣不煩官中一芻粟方其初起所過官吏亦困撓之至不得入城無所謂供支四川獨守盛時軍興法州縣具食米供軍按人結舁馬擔夫諸軍因以為利折取夫錢湘軍初至得錢大喜已習為例則稍稍苛索脅取既解絲州圍尤負其功所索夥奢唐炯以絲州圍半年資力困乏所應不滿其意又先與營官言營官漫應之自謂已辦則置酒宴他客

談其事家丁湘軍人來索夫語不遜家丁怙黔軍勢亦不遜相爭而閔黔軍無紀律炯自謂有紀律詆訶湘軍先已不相能傳理年少輕慢初統軍不能束其衆黔軍將銜之伏百人州宅內待門湘軍哨官去復來閩州堂益囂炯親將告曰湘軍持刀登公堂請禽治之炯諾未已其親將遽出斫先入者一人來者皆怒譟於是伏兵起欲盡縛湘軍來者奔逃殺傷各自戒嚴湘軍將皆大怒訴秉章且衆軍不行以要必勝秉章特劾罷炯炯亦訴狀秉章設罵之湘軍自此多與蜀軍分行蜀軍益絀而唐友耕以謹畏能戰更見賞爰奏復其官九月秉章受印成都十月丙辰朔胡中和等自崇慶會傳理等自彭山進攻眉州寇聚兵州西松江口諸將合兵深入攻之丙寅寇奔青神超擢劉蓉署四川布政使蓉以附生敍五品銜從入蜀秉章以知府奏薦 特有此命自軍興以來無有與比湘軍移攻丹棱以唐友耕屯眉州南綴青神李寇部黨掠銅梁璧山永川大足定遠南充岳池廣安增募川軍以張由庚將之合黔勇分討川東北更募湘軍以易佩紳將之道永順期入酉陽徵劉嶽昭軍會師夔州十一月增軍丹棱作長壕木城壁圍之乙未寇焚城走蒲江略崇慶雙流界入彭縣壬寅分兩部一東北直趨綿州走江油平武折北走石泉彭明一東略什邡漢州中江遂甯折南走安岳內江隆昌富順所過逃散民團營兵往往狙擊斬虜藍大順遜去所部遂徵蕭慶高等圍李寇黨於青神胡中和等圍李寇於懋爲之鐵山川東寇黨自廣安分略營山渠縣東鄉新甯同治元年正月癸巳殺新甯知縣國澍典史耿鳳翔把總何玉春此時石大開方屯來風窺

涪夔川東寇別部踞涪州南鶴游坪二月戊午新甯寇南走合墊江寇東南走鄧都石寇陷石柱三寇相去各百里然不能相應乙丑劉嶽昭軍四千五百人自夔沂江會唐炯等於涪石寇游騎西至涪巴南岸不得渡鶴游坪寇伏不出鄧都寇復東北略忠萬走雲陽聚軍重慶專防石寇三月甲申鐵山寇走宜賓遣別黨北援青神己丑蕭慶高擊走之庚寅城寇循江南東走宜賓分兩部一走天洋一屯八角砦官軍收青神四月石寇掠南川出境趣貴州桐梓過綦江留攻城一日西走貴州仁懷南入敘永西北走興文琪慶符高東還陷長甯知縣周于堃死之天洋寇西走合於八角砦雲陽寇直西北走戊申陷太平出境走陝西定遠易佩紳尾之與俱入陝劉嶽昭唐炯會傳理唐友耕皆持寇長甯鶴游坪寇分略梁山墊江大竹鄰水七月復分黨出梁山墊江掠達陷開從城口出陝境陷平利漢南羣盜相挺起八月癸巳李寇乘八角砦走犍爲屯龍孔場胡中和等移軍圍守閏月丙寅劉蓉出督軍丙子寇突走禽李永和及其黨魁卯得興永和短搭正名也藍李亂四年而平鶴游坪寇亦棄屯走太平分遣周達武曾傳理等追討之九月禽周紹勇於大竹東鶴游屯寇惟前後入陝二部合陝豫羣盜掠洋鳳文階邊還入廣元遣周達武拒之石寇復陷筠連至宜賓胡中和等屯橫江十月庚辰朔寇入高縣知縣丁良俊走免丁未寇復至良俊死之十一月庚申胡中和何勝必等捷於橫江寇分黨出甯遠辛酉周達武遇寇儀隴破之辛巳禽寇帥郭刀刀曾傳理等以內寇盡平請罷軍及劉德謙等先後歸唯胡中和劉嶽昭周達武分部屯防石

寇亦出境走雲南東川陳玉成餘黨自湖北走漢南合川陝盜縱橫與安漢中陝西布政使毛震壽師久無功 詔秉章舉大將分軍往討奏薦李雲麟嚴樹森二年三月石寇復分犯建昌綦江以劉嶽昭屯綦南何勝必蕭慶高屯敘南胡中和屯嘉定朱桂秋張由庚合五千人援漢中增周達武軍至四千人游擊往來石大開擁衆間行經七年崎嶇山界饑乏崩散不復能令衆三月將出甯遠行間道誤入土司界中土司所部以劫掠爲生計無論官賊見衆至則聚掠與鬥則散走寇絕食又牽綴不得行於是潰散與所分部兩黨相阻絕癸酉大開獨至紫打地欲渡大渡會秉章先遣唐友耕防江未至寇前隊結筏已濟大開恐日暮衆不整復令還西岸期翌日畢渡是夜大雨水長四五丈明日防軍至大開遂窮困山谷殺馬煮桑葉爲糧至四月壬寅土司嶺承恩等生縛獻大開及其黨魁五人劉蓉復親往受俘其餘寇先由貴州界北走酉陽後還湖南於桂陽破滅語在湖南防守篇秉章督四川三年平羣寇禽大酋遂以知兵聞於天下 穆宗初立朝廷銳意求治廷寄咨問或日三四至是時 欽差大臣將軍多隆阿討陝叛回以病留河南未進李雲麟以母喪歸官文奏薦劉蓉六月癸卯 詔秉章遣軍從蓉援漢南七月丙午復授蓉陝西巡撫並將前後援陝軍朱桂秋何勝必蕭慶高等萬三千人先解漢中圍漢中縣富大郡自川寇合陳玉成黨部連結土寇環城作屯城中守備完具毛震壽憚事唯以軍餉難繼辭援軍皆武人不知機宜觀望養寇川寇初據洋縣既引湖北來寇數十萬徑進漢中震壽屯城固漢中府道先後病死城中唯

都司護總兵及南鄭令又不相能令收召游軍至萬人日食米百石諸避寇者相繼入保城食益糲疾疫起死者日或至千人川湖寇中悔相猜忌洋縣寇疑來寇欲併之故不冝合勢城中頗出戰援軍不能進攻唯待統帥八月丙戌劉蓉發成都戊子何勝必等議曰漢中寇雖多心志參差可一戰走也劉公度吾等功將成輒先至收其名宜及其未來破賊立功約朱桂秋張由庚等俱進甫至油房桂秋等失期先退勝必等亦收軍還屯己丑庚寅雨連日圍寇懼援軍乘之具馬馱將遯城中糧竭見援軍自退益句懼開北門走出寇疑不入久之乃縱掠援漢中八軍聞風潰走寇擠之皆走背水溺斬無數城民走者亦皆虜死敗書聞劉蓉止巴州增調劉嶽昭軍洋縣寇見漢中寇盛益恐則分黨北收佛平整屋設偽吏禁淫掠欲以自固漢中寇亦東取城固連西鄉石泉通於興安多隆阿自河南入解同州之圍克臨潼高陵三原涇陽李雲麟進軍山陽取鎮安西攻石泉十月劉蓉移屯廣元久之蜀軍不出 朝議重西安促多隆阿先攻整屋藍大順之遞也其黨先後入陝或屯或流其流者又合石寇中旗馳突襲沔隴秦界中其屯者則踞洋縣招湖北來寇陷漢中已而猜鬥常以千餘衆拒漢中寇數萬因略整屋各自爲戰守故寇得漢中不能自安又會江南寇急來徵援同治三年正月留壩褒城沔縣寇俱入漢中府城城寇先循漢水東下又分黨陸趣鎮安山陽商南步駱駱驛連十許日漢中興安諸屬縣寇皆退去洋縣寇亦悉北保整屋增柵壕堅守其餘黨或從佛坪東窺甯陝劉蓉至漢中則入府城見尸骨縱橫輒慟哭命悉棺斂官瘞之



奏免丁糧卹忠烈借給牛種以收人心留何勝必等分屯漢中興安罷歸劉嶽昭所部四千五百人仍還防葦江且言遣軍助攻蓋屋多隆阿大愠以蓋屋功在指顧檄還其軍蓋屋城小寇少無所用武論者皆言不足煩大將且宜徹圍待其走而殲之廷議不知多隆阿之戰狀依常法督責多隆阿憤懣作望樓躬視城中中槍子傷目督攻益急寇作地道出走二月丙申遂克蓋屋而多隆阿自創甚不能興養創西安三月劉蓉至省城往問疾多隆阿方臥向外聞巡撫至強扶起回面向內目不視亦不言月餘傷發薨聞者莫不傷痛陝西處處祠之雖所未至皆歎息謳思焉蓋屋敗寇走興安餘十許人爲民團擊殺之猶自稱藍大順自三順至九順皆傳首漢中西安甯陝寇捕斬略盡唯秦州寇復東趨留壩佛平留防軍不能禦商南殘寇西與合黨貴州寇侵南川增募湘軍二千人以曾志友成耀星等領之坤秀山葦江防劉嶽昭授雲南按察使唐友耕授雲南提督均畱四川屯守四月廷議多言劉蓉無實不可用 詔詢秉章秉章言隨器授任無可棄之士五月佛平寇卒至杜曲陝西省城大震是時叛回悉避甘肅多隆阿部軍分散金順彭基品將馬步軍擊之於澧寇還攻鄂蓋屋己未蓉出城督軍大徵諸軍將鍾玉勝曹克忠孟宗福何勝必蕭慶高黃鼎等新舊襍置七月甲辰蓉會西安將軍穆圖善攻寇於郿壬子寇踰秦領西走畧陽入甘肅陷階州陝軍罷四川軍將周達武等九千人出屯防蕭慶高等防漢中 詔以洪寇平論功加駱秉章世爵一等輕車都尉十月周達武進攻階州十一月徵蕭慶高等會師何勝必疾病畱廣元胡中

和以四川提督自敘南屯所出廣元領何軍攻階州四年正月劉蓉言宜令中和總統諸將專奏報以一事權秉章言達武慶高皆中和等夷雖主簿以下但爲營官卽與司道提鎮頗頗勢不相統中和亦固辭事乃不行自胡林翼驟拔多隆阿節制李續宜鮑超等大捷潛山諸帥無能效之者湘軍制以憲氣相救恥言爵位多不肖屬人故李續宜統援寶慶軍幾奔潰而劉蓉後以蕭德揚各統陝軍覆師霸橋置將不慎故也蕭何等部久轉戰喪亡更代士氣益弱而崇慶人黃鼎新出寇中號敢戰有名雖亦將湘軍然僅用滇蜀別爲一隊亦奉蓉檄會攻階州劉嶽昭擢雲南布政使四月出境攻貴州鎮安以援遵義五月丁酉收正安丁未胡中和等克階州李寇餘黨盡平蕭慶高還鎮漢中周達武進軍松潘討叛番番據險鈔掠所部八千人驚幾潰九月畧地置臺站如承平時授達武貴州提督始議援黔劉蓉罷以四川按察使趙長齡巡撫陝西蓉之驟進也中外指目前年順天府尹蔣琦齡陳時事反復議蓉蓉請罷而秉章請留蓉是年三月編修蔡壽祺言事復訾蓉夤緣 詔蓉自陳蓉言薦舉本末且論奏曰凡夤緣者必其平日縈情於寵利不勝其歎羨慕思一得之以快其意然後喪其本心捐棄廉恥爲乞憐昏夜騙人白晝之行故凡小廉曲謹之士盡知自愛卽有所不屑爲不必過人之謙量而後能之也臣雖愚陋其於希榮慕祿降志辱身之事往往不待禁戒而自絕於心蓋其自治尙有精於此者而此特其粗節乃蔡壽祺以其不肖之心肆情造謗唯所欲言直欲厚誣天下謂無復有稍知廉恥之人事則何其情之悖也又訐奏

壽祺挾嫌構陷疏上朝論益謹御史陳廷經復疏攻之事下秉章案蓉及壽祺所陳他事皆不讎部議奪蓉一級而趙長齡亦爲秉章先所薦故令代蓉庚辰長齡至西安十月辛丑蓉被 詔復任十一月壬戌朔受印治軍蓉爲政察吏愛民然恆訴餉匱欲取資四川時雲南貴州巡撫亦交章取 朝旨索餉秉章一切奏罷之因請疾崇實兼總督唯軍事仍借辦秉章五年二月劉嶽昭克綏陽擢雲南巡撫將所部轉戰以往四川陝西內寇略定猶養軍如故凡四川出境軍二萬六千人畱防萬七千五百人屯省城二千五百人胡中和猶將五千人唐友耕三千五百人陝西湘軍七千人於是蜀財竭矣十一月壬申秉章薨省城士民如喪私親爲巷哭罷市其喪歸號泣瞻慕者所在千萬數自胡林翼曾國藩莫能及也其年劉蓉罷免以擒寇奔馳陝境復 詔蓉領軍助巡撫喬松年禦之十一月甲戌蓉軍方屯霸橋擒寇卒至湘軍無統將又聞其帥與新撫齟齬固無戰心寇分兩隊鈔之其日大雪軍士凍僵莫肯拒門於是盡潰而蕭何舊部遂盡唯川軍黃鼎潰圍出寇旣勝亦遂西走蓉遂告歸終於家其後左宗棠督陝甘出塞討叛回大寨湘軍至五六萬川陝湘軍名存者多隨地募補蓋無復眞湘人矣

終

平捻篇第十四

捻之爲寇蓋始於山東游民相聚有拜幅有拜捻蓋始於康熙時其後捻日益多淮徐之間因以一聚爲一捻或曰其黨明火劫人捻紙然脂因謂之捻莫知其本所由也咸豐元年廣西寇既聞 朝廷尤重除盜夏邑民士訴捻劫御史張澧翰因發南陽盜劫事有 詔詰責河南巡撫因並飭兩江湖廣督撫搜緝而壽州盜亦上聞二年李德巡撫山東蘭山幅盜拒殺把總其魁黨在徐邳嶧費間其時山東捻掠海州安徽捻犯鹿邑甯陵而豐沛曹單亦騷然矣三年安徽江南省城俱陷宿蒙毫壽捻滋甚始 命提督善祿屯永城備盜周天爵駐徐宿鎮羣捻工部左侍郎呂賢基出治安徽團練桐城盜有馬踰千匹開歸捻分二十餘部汝甯信陽捻攻正陽復掠永城殺桐柏知縣潘樹霖圍攻夏邑沈邱河南巡撫陸應穀自汝甯走保省城周天爵薨袁甲三代之治軍類毫復 命舒興阿以陝甘總督領軍駐陳州舒興阿移皖北牛鑑代之統於河南巡撫英桂五年袁甲三以違例委調宿州牧得罪去提督武隆額將兵屯亳州總江蘇河南安徽三省戰守事而捻首張樂行李兆受之名亦稍有聞濬淮防復急矣張樂行起蒙毫犯歸德以英桂代統武隆額軍自是捻衆分五旗率馳突徐宿歸防軍不能制六年增調江南軍將鄭魁士援宿州仍以袁甲三助英桂大徵西北兵八月甲三自永城進軍亳州攻樂行於雉河集捻趨潁州皖豫官軍夾屯莫之禦也十一月捻復東走徐州皆大掠而還七年春 命勝保助英桂捻圍固殆邳邳盜復起

亭檢與袁甲三相持南延霍邱壽州西北掠舞陽葉內鄉檢復德宜陽高英桂赴禹密河南燬火糧望洪  
寇部黨亦結檢合勢分掠廬巢勝保袁甲三會師正陽關始議招撫李兆受苗沛霖以滅檢患而勝保北  
屯潁州過歸德陝西軍防武關檢入商南殺知縣施作霖安徽檢陷霍山犯和滁東西幾二千里皆蹂於  
檢其冬直隸開州東明亦有檢游騎滑林洛淇被其患八年春寇檢合攻固始六安檢久踞城分竄出掠  
危出掩入軍疲於應其夏收六安檢皆東趨南攻全椒來安滁北及徐宿英桂病還瑛奕代爲巡撫勝保  
援臨淮苗沛霖始用事袁甲三進宿州李兆受歸誠迎勝保於清流關淮南北事解嚴於是仍授勝保欽  
差大臣整軍廬州秋檢入山東圍單攻金鄉以總兵田在田提督史榮椿防曹兗增設歸德鎮總兵官又  
遣總兵邱聯恩屯鹿邑朱連泰出屯亳州蓋河南尤弊於征戍云商水北周家口者瀕小瀝潁口商驛通  
道檢大掠而去其勢益張九年春勝保奏劾袁甲三持重失機 詔以總兵傅振邦代之統於勝保副以  
都統伊興額二月檢自西華趨舞陽破官軍於北舞邱聯恩戰死伊興額悉軍西援振邦等劾以齟齬罷  
之以協領關保督河南軍抽天津海防軍遣協領德楞額將屯曹州夏勝保移防盱眙檢攻定遠安徽巡  
撫翁同書退走壽州冬勝保以母喪歸復 命袁甲三代之檢出歸德自蘭儀渡河犯定陶東明還潁州  
於時諸將帥皆以回巢爲幸騰章告捷以內地爲盜賊巢自此始其後直省皆引例焉甲三至軍克臨淮  
十年春改 命勝保以都統督軍河南關保副之傅振邦督軍徐宿田在田副之德楞額督軍山東侍衛

哈勒洪阿副之袁甲三以欽差大臣專安徽翁同書及副都統穆騰阿副之正月擒陷清江殺淮海道吳葆晉副將舒祥漕督河督等方置酒奏伎倉卒走保淮安言江蘇形便者以裹下河爲膏腴以王家營爲亢咽至是人情大駭 詔奪聯英庚長官擒復還走而河南擒趙鞏洛山西陝西均備邊罷勝保以府丞毛昶熙還河南爲團練大臣南汝光道員鄭元善副之兵事總於巡撫屬於關保各省團練始重秋海防罷畿南盜賊蠶起擒犯濟甯乃 命科爾沁郡王僧格林沁督軍捕討擒縱橫荷濟間山東大亂德楞額軍敗於嶧冬專遣道員聯捷防河得專奏事僧格林沁至濟甯奏言擒衆繁多其出掠伺空虛避官兵以焚掠脅俘良民黨衆日增馬步數萬列隊百里兵少賊多衆寡懸殊如欲攻其巢則相距一二百里外井堙地赤裹糧攜水不能持久退爲所躡往往失利十年以來未有能進軍接仗者也臣軍萬二千人請合傳振邦德楞額二軍直攻老巢蕩平醜類 文宗手詔以無後勁爲戒十一月擒屯鉅野乘雪進攻之大敗還關保以昏庸罷河南軍事專於毛昶熙徐州民士三奏請用伊興額 詔從所請僧格林沁令諸州縣各築長圍以并擒馬步傳振邦病免田在田代之十一年正月僧格林沁遣軍援荷澤復敗還 詔責以勇往輕進穆騰阿病免總兵成明代之擒自曹州趨鄆城渡汶而掠泰安南北伊興額及總兵滕家勝俱戰死僧格林沁移屯汶上擒遂圍青州其時河南擒縱掠連二十餘縣西自南陽南自汝甯東界淮南界河莫能定所懸巡撫嚴樹森以豫軍冗弱思以湘軍法齊之與毛昶熙不相中山東民團亦相聚距殺

官軍擒四及浙川張芾領陝西團練勝保復出屯景州將兵萬人莘范羣盜北侵大名滕嶧擒西掠僧格  
林沁歛兵保鄒山東巡撫譚廷襄出屯茌平擒陷曲周掠威東陷清河殺知縣陳大烈苗沛霖陷壽州宿  
州捻勢盛徐宿阻絕僧格林沁遣詹啓綸募軍防清淮秋擒分黨北趨山東河南省城皆乘城守望德榜  
額免袁甲三極論捻事頗咎僧格林沁驕愎懈軍擒掠登萊諸縣山東最富庶地也僧格林沁方南下沂  
邳奏功進爵親王悉奏罷諸團練及防河大臣委權督撫以副都統遮克敦布代聯捷巡河大順廣道王  
榕吉副之勝保屯防京師其冬河北及鄒縣教黨次第撫定 命勝保移軍援穎僧格林沁屯單湘軍揚  
言進攻穎亳於是羣捻頗多合洪寇部黨游奕襄洛不復專剽劫僧格林沁遂連破亳北諸莊圩同治元  
年春穎州解圍夏擒陷宜揚殺知縣謝仁溥西陷永甯別自內鄉入商州陷鎮安孝義固原提督孔廣順  
禦之藍田寇捻合陷渭南殺知縣曹士鶴東陷華州直走澠池遺敗河南軍時廬州克安徽事定將軍多  
隆阿將廬州軍勝保將穎州軍俱入關僧格林沁督山東河南軍防直隸山西四省督撫提鎮將兵大員  
均受節制湖北出軍助河南攻捻屯多隆阿進兵荆子關羣盜迸散進滅商南擒捻遺奔北走盧氏南趨  
斑陽陷隨州京山應山湖北大震復奏請多隆阿還軍袁甲三請病李續宜代之續宜母喪臨淮欽差大  
臣迭罷冬逮治勝保多隆阿兼統其軍降擒宋景詩懼誅請隸雷正綰至邵陽叛渡河走山西直隸而張  
錫珠亦先以降擒叛於莘冠渡漳犯大名大順廣道奏聚奎戰死宋景詩者故堂邑劇盜欲還與張錫珠

合以八百人行腹地幾二千里所過無留行山東巡撫譚廷襄直隸總督文煜免以闕敝歸劉長佑代之  
遽克敦布免副都統成保代之山東教幅棍諸姦民連結起於兗東二年正月僧格林沁及捻雉河集克  
之禽斬張樂行姜台凌等二月冠莘擒復渡漳犯大名署提督寶山成保嘗以憂免僧格林沁移軍攻  
捻淄川分馬隊遣恆齡助防大名漕督吳棠遣軍攻捻沂甌毫汝捻並南趨麻城斬黃三月苗沛霖復叛  
羣捻益張夏淄川克移攻鄒教黨於白蓮池七月破平之奏劾劉長佑誤軍機致朱景詩不獲景詩張錫  
珠自去年冬陷武邑還南自臨漳北走邯鄲東掠廣平曲周北趨平鄉鉅鹿隆平新河斜東至武邑東光  
乃直南奔從張秋渡河官軍追者皆若狂長佑以總督重臣將兵躬追之曾不能相及或卒相遇輒爲所  
衝突 穆宗初卽位朝議但嚴責諸軍捕討以一窮寇疲敝畿輔馬隊自此羸困焉僧格林沁移軍紫城  
討苗沛霖十月沛霖死臨淮平捻首張總愚等西掠南陽襄陽三年僧格林沁自歸德西追捻南至隨州  
應山湖廣總督官文出督軍會於京山以護軍統領舒保爲前鋒遇捻德安西搏戰大破之追奔入山谷  
間騎步不續捻回擊之力戰死舒保與多隆阿皆湖北名將多隆阿堅毅舒保純實湖北有事則驅之出  
無事奪其軍舒保口未嘗言功及其死諸軍奪氣戰事倚於僧軍而僧王左右橫恣求見者先納白金至  
四百金視領軍多少以爲差民有訴軍淫掠者王盛頓曰若等離家來久且宜徃民避之湖北民大失望  
六月江甯克洪寇平其餘黨合於捻九月攻黃安麻城至蕪水陳亡大將石清吉圍成大吉於新北僧格



林沁軍麻城官文出黃州 詔兩江總督曾國藩援湖北國藩奏言大帥三人屯駐四百里內恐羣盜輕  
朝廷請發軍從官文自駐安慶捻掠廣濟而還馬隊將常星阿再敗僧格林沁退光山再退鄧州僧軍  
名望頗盡蓋其初轉戰追逐皆未嘗與洪寇合戰故恆以爲捻畏我至是捻勢異矣湘軍將劉連捷淮軍  
將劉銘傳名將也 詔令徵其軍僧格林沁以爲皆不能戰奏止之又曰皖軍爲上豫軍次之楚軍爲下  
毛利熙聞之大喜所謂皖軍者蓋臨淮諸軍也捻犯南召魯山恆齡戰死捻西北走尉氏四年春僧格林  
沁追捻至尉氏捻西南走臨潁東掠郟城南走西平西南走遂平東南走汝甯南走正陽信陽折北直還  
扶溝東走睢渡故黃河北走曹東北走城武金鄉濟甯汶上東平東走甯陽南掠兗州東走曲阜南走鄒  
滕澤東走郟城鞏榆阻海還南走海州沭陽西走邳嶧北趨滕鄒還濟甯西北走鄆城渡河走濮北至范  
南屯曹州凡捻所至數日而僧格林沁至或一日再接再戰輒有新殺然莫能大創之 朝議亦憂危 命  
曾國藩北征四月丁亥 詔下戊子僧格林沁親攻捻屯軍士疲怨以正用法嚴益懼且恨捻拒戰諸軍  
潰退中軍被圍保荒莊至夜無所得食僧格林沁率百餘騎潰圍捻依林外設伏待之短兵接馬被矛傷  
驚逸僧格林沁墮被八創死之 朝廷震悼輟朝三日京師驚疑以爲捻且北犯急召曾國藩赴難羽書  
追督相望山東河南巡撫以陷王督獲嚴譴五月國藩奏言流寇剽忽宜以有定制無定僧格林沁能以  
數月歷五省臣則不能也非獨不能速援且不能顧後輔故直隸宜有事防之軍兩回軍以豫州爲老營

以經營淮徐海兗沂曹濟陳廬鳳穎泗十三府州此十三府州者縱橫千里皆匪出沒之區也金陵等軍裁撤殆盡李鴻章所部稍留北方今惟劉銘傳周盛波兩軍尙須增募徐方之士采買戰馬加之訓練扼賊資河又宜水師爲謀迂緩駭人聞聽且臣之行軍略師古法逐日結壘行必裹糧日行率三四十里此其萬難迅速者也李鴻章聞之以爲人心惶駭宜先安定乃奏遣潘鼎新軍由海道至天津比至捻已休息南還張總愚自城武趨永城宿州西攻新渦陽圍英翰大營渦陽者故雉河集張樂行舊屯也總愚樂行族子自羣捻破滅遂爲盜魁合陳玉成餘黨賴文光謀復踞淮北英翰輕騎出走大徵諸軍劉銘傳周盛波及河南將宋慶安徽將張得勝等赴援史念祖自團中應之十月捻解圍分走西犯陝州扶溝其一北自通許唯考城定陶曹州至東明山東軍十六營夾定陶南北而屯國藩增調楊鼎勳軍且檄潘鼎新軍移濟甯其一南還新蔡西踞唐鄧間攻南陽九月東明捻復自曹州東走城武單豐國藩奏以劉銘傳屯周口張樹聲屯徐州劉松山屯臨淮潘鼎新屯濟甯兼飭河南軍屯雒湖北屯隨棗以靜制動唐鄧捻掠寶豐魯山還長葛豐捻還自虞城圍睢扶溝官軍至解去國藩以攻捻皆尾追今始得迎擊更以張樹珊屯周口使劉銘傳游擊罷遣吉林馬隊以休其勞捻自扶溝分犯襄城隨穎十一月東西背馳東黨所趨汝甯西黨南走唐新野十二月汝甯捻犯光州東掠固始西掠信陽成大吉屯麻城西南都卒餉乏燒營北應羣捻大吉跳而免捻遂入黃安南至黃陂黃州西至孝感所屯踞五百餘里武昌戒嚴劉銘

傳赴授五年正月湖北軍將提督梁洪勝攻捻黃州戰敗死劉銘傳至黃陂捻遞走收其城山東河南民士習見僧王戰者皆怪曾國藩以督師大臣安居徐州誘讓盈路二月國藩移濟甯新野捻復自舞陽馬州至中牟北犯曹州東掠鉅野賁城捻自光州北至沈邱周口屯軍出擊之捻東鄉潁州鉅野捻北侵鄆城三月劉銘傳大破潁州捻移軍赴定陶起曾國荃爲湖北巡撫汰湖北冗軍增湘軍六千鉅野捻南還城武至睢甯潁北侵亳以待講學士劉秉璋將軍助屯徐州劉銘傳休軍濟甯改秉璋及潘鼎新楊鼎勳軍爲游兵與直隸山東盡地分防四月睢甯捻仍屯曹徐界亳州捻屯濉泗間五月捻聚於徐西分前後部自虞城太和俱掠陳州攻周口屯軍北至太康皆西南走裕州後部自上蔡西平南走汝甯七月裕州捻攻南陽新野北掠南召魯山至汝州增調鮑超軍陝浙川防陝邊郭松林自隨州出桐柏屯唐曾國藩自濟甯舟行泗淮中沂濶至蕪案淮南北民圩曉以順逆凡閉塔拒捻者奏獎有差建議自開封至潁州依汴渠繚水挑濶爲守河南巡撫迂之未措意也八月捻合趨中牟破河南防壕屯軍復犯曹州劉銘傳潘鼎新軍宴之鉅野北大破之九月捻南走杞東犯曹縣西犯許州自此有東捻西捻東捻名者賴文光西捻名者張總愚國藩請疾 命李鴻章出駐徐州十月西捻自汝走宜陽永甯入陝西南州犯華陰東捻走豐沛西還太康十一月 詔曾國藩還本任李鴻章代之督軍國藩漸懼三辭東捻與湖北邊往來光固入麻城趨孝感略應城雲夢遂攻德安郭松林拒走之劉銘傳至麻城周盛波等至隨鮑超還軍襄

陽十二月郭松林追捻曰口深入中伏捻生得之以傷足委於道逢舊部俘者負逃以免其弟芳餘戰死  
捻進攻安陸西捻敗陝西湘軍於霸橋蕭德揚死之諸軍皆潰還國省城張樹珊援德安敗績死之六年  
正月 命陝甘總督左宗棠督軍討西捻是時湖廣總督官文坐事罷其欽差大臣關防存武昌宗棠自  
福建道漢口因以授之李鴻章奏言漕督總濟淮防軍號令岐出請悉聽欽臣調度劉銘傳鮑超合擊東  
捻於京山北超失期銘傳戰而敗超背攻捻銘傳收軍還應捻退走超追奔大破之超久爲名將而銘傳  
新貴與之情超固不樂至是銘傳咎超李鴻章頗右銘傳超既大捷遂請疾解兵 朝旨五六慰勉曾國  
藩李鴻章函續相繼超稱病爲所部三十營分別留散自此無重軍焉二月劉松山破西捻於西安擒走  
渭北東捻犯麻城廣濟黃梅劉秉璋等自英山至太湖捻西走斬水湖北新軍將彭毓楨者方平江甯有  
大功聞捻至自黃州進擊輕騎視寇裨將提督羅朝雲鄧泰福王仕益陳致祥總兵彭光友羅興祥皆從  
或有諫毓楨宜持重不聽至漢潭度前岡擒大至遂前搏戰捻鈔攻之大軍初不知其遇捻又營官半出  
無繼陷圍中與別將道員葛承霖均戰死曾國荃所用大將唯毓楨與郭松林松林前敗創發告歸及毓  
楨死新軍盡燬圍荃初奏言宜引捻入腹地蹙而殲之其言不讎鬱鬱復病三月劉松山攻西捻於郟破  
之左宗棠以湖北事亟留屯德安東捻復屯曰口東北出應山周盛波等自北攻之捻返走總兵劉啓福  
見一騎被黃鞍越澗追之捻步從者予中啓福額負創馳逐益急踰山七重中槍死俘者言黃鞍者顧文

光也捨內走孝威劉秉璋楊鼎勳連戰不利劉銘傳出黃安黃陂捨還曰口北走秦陽新野五月癸丑朔犯唐縣壬戌遂及鉅野李鴻章諸軍皆在南山東屯軍倉卒潰走捨自戴廟渡河殺東阿知縣周毓南陽運隄燒防軍屯收其軍實自曾國藩督師以來運防未嘗潰時議大喧西捨西犯與平東自富平合同黨北犯蒲城東捨分掠甯陽萊蕪劉銘傳議以捨海隅悉徵諸軍會青萊莒驛捨入登萊捨避山東軍直東趨平度萊陽招遠鴻章乃議守膠萊河膠萊河者元末海運時所開海渠也首尾通海幾三百里用守兵五萬人戰兵四萬人徵直隸軍五千浙江軍五千湖北軍萬二千替運防鴻章以膠萊渠北口沙營崩隄築牆備之濰水欲盡發山東軍萬六千人分屯巡撫丁寶楨不可重違鴻章意以七千與之六月隄成捨掠福山甯海西捨趣三原涇陽官軍至返走蒲城七月東捨返平度循膠萊而北突濰口防軍潰捨掠濰至昌樂乃東南走安邱鴻章之防渠也排羣議方朝命尤與寶楨意異山東軍本防南頭潘鼎新強移之北及敗鼎新委罪王心安詔斬以徇寶楨爭之騰章相証詔和解之而切責鴻章捨分犯沂水莒州鴻章復議運河防八月捨自莒犯日照贛榆沭陽西北走郟城劉銘傳潘鼎新要破之返走海州又破之捨東走宿遷北侵邳濇督張之萬訟言皖軍將牛師韓姚廣武郟城宿遷戰功請增募馬步五千人西捨渡涇攻咸陽游騎及醜泉乾州左宗棠駐西安督軍李鴻章合見軍萬人以郭松林爲統將劉銘傳休軍於邳九月東捨犯邳丁寶楨自沂州繞曲阜進軍之捨東北走新泰遇潘鼎新軍南走蒙陰西捨東趨

富平蒲城白水北犯中部洛川迤及鄜州西增遣提督高連陞屯三水劉厚基屯延安劉松山郭寶昌躡  
捻北進十月捻團甘泉劉厚基戰不利別部捻回攻耀州劉典自宜君進同官敗退東捻自蒙陰北犯章  
邱齊東阻河東南趨青州東掠濰及安邱劉銘傳襲之捻走高密諸城日照韓楡銘傳購擒黨狙擊其魁  
首任柱殺之捻遂大奔西捻出延安陷安塞延川綏德十一月東捻返走諸城北至壽光郭松林方自莒  
向濰卒相遇捻出不意大敗走膠州遂自高密直西走臨淄新城避官軍返走壽光郭松林自安邱出青  
州復遇之捻自起亂未嘗頻戰又新喪任柱黨衆潰解束手歸命者近萬人餘千餘騎南奔沭陽悉爲安  
徽防運軍所俘西捻南返宜川踰山至壺口乘冰渡河山西巡撫趙長齡委河防於按察使陳湜湜聞捻  
在綏德注意防葭州又自以爲無患乃東至省城離防所數百里聞報愕眙捻已陷吉州及寧鄉湜馳至  
趙城墮馬不能進陝西巡撫喬松年劾湜專河防三年糜餉巨萬敢於要挾及所部淫掠狀山西士民亦  
愬長齡俱得罪免十二月東捻首賴文光率殘黨突渡六塘循淮麥實應高郵南走諸軍至者如風雨文  
光知死下檄揚州防將吳毓蘭歷証官軍將而以毓蘭爲愈使得己以爲功乘夜投毓蘭營軍中傳誦其  
僞檄言至深痛羣帥嚴禁祕其事使毓蘭謬上捷言雨中陣俘之云於是李鴻章自以大功成請散軍船  
兵示將士不復行陣而西捻已南走絳州曲沃垣曲殺垣曲知縣王國寶東趨濟源循河至原武七年正  
月捻直北犯自新鄉趨順德至定州京畿大駭河南軍將張曜等方至湯陰陝西軍將劉松山等先至清

苑李鴻章軍猶在徐 詔切責鴻章李鶴年左宗棠及直隸總督官文均奪職丁寶楨率軍先至河間有  
詔嘉獎京師五城團防神機營發兵屯涿易 命恭親王巡防捻至保定知有備西掠滿城易州禁軍  
誤以官軍爲捻騎始議設偵探焉安徽巡撫英翰請率師入援捻已南陷祁州殺知州胡源東陷饒陽山  
東軍將王心安軍至捻走安平以捷聞李鴻章軍將潘鼎新言於獻縣見山東敗軍 詔以左宗棠總前  
敵戰事遣陳國瑞別募一軍爲特將 命恭親王節制左李及諸督撫二月李鴻章至德州捻游奕獻深  
官軍遙圍之捻突郭寶昌軍敗之因西走正定未至復掠深澤安平饒陽東至獻又西至晉東北至肅甯  
均礙於官軍乃自趙趨鉅鹿官軍旣集頗多掠商民居市直隸民患之相約格殺日有俄門戎服乘馬者  
十餘人猶不敢經行枉殺者不可勝計於是李鴻章復議驅寇太行黃河間而李鶴年自奮請專任攻戰  
三月捻至滹滑西犯新鄉循河至延津破陝西軍於封邱郭寶昌被兩創提督周盈瑞戰死捻北趨滑敗  
李鴻章軍提督陳振邦中丞死捻自內黃走莘趨東昌在平德州吳橋東光四月至天津 詔英翰急赴  
東昌恭親王奏飭諸帥限一月平捻捻東走鹽山慶雲海豐潘鼎新復議守運時漳衛盛漲引之滅河使  
捻不北窺乃循運屬之河通水師戰船至德州與諸軍畫地而守鴻臚少卿朱學勤奏召劉銘傳銘傳平  
東捻後假歸坐逗留奪官因稱疾鴻章招之不至放假 朝命強起之捻南西走樂陵德平臨邑禹城還  
走滄州復南掠平原齊河左宗棠至鹽山以屯軍防可恃西還吳橋閏四月 命都興阿爲欽差大臣

列名在左李上侍郎崇厚副之統張曜等軍陳國瑞奉 詔防陝西不俟 命徑領軍東行討擒自效  
有兵萬二千亦隸於都興阿擒犯陵縣吳橋復南走恩遂至荏平英翰奏院軍不必合湘軍左宗棠令劉  
松山休軍東光擒還海豐復西走樂陵德平率一人挾數馬避兵疾行折東至武定陽信李鴻章復建議  
自臨邑築牆以之馬頰河六月擒走商河濟陽西犯臨邑清平博平值大雨徒駭河盛張官軍圍盛之擒  
不得復渡部黨解散死者數千人張總愚赴水死西擒平七月辛酉捷聞賞諸將帥而劉銘傳新至收  
成功封一等男以龍神見於水師船中增水助順加封號焉

終





營制篇第十五

軍興調發而將帥莫知營制被調者輒令綠營將官營出數十人多者二百人共成千人三千人之軍將士各不相習依例領軍械鍋帳鐵斧槍矛皆滋鈍不足用州縣發夫馱運載軍將拱手乘車馬入於公館其士卒或步擔一矛倚民家及旅店門居人惶怖唯恨其不去及遇寇作屯壘壁不及肩負販往來營門隘襟諱囂十軍而九有能者因宜約束自爲風氣諸將雖欲畫一率非所統無所行其禁令唯滿蒙軍稍整齊而驕橫貴倨言語不相曉其死亡輒當奏報又各有貴將督撫莫能統尤不輕調發所發者多綠營額軍其弊如此民間徒知其擾累莫肯憐其送死故征役者益怨恨讎掠於寇所不至之地而愚民避官迎賊之議起矣楚軍起於江忠源其時以三百人從烏蘭泰不能成營制後忠源官尊師衆第從先廓之而法制不改曾國藩既請練軍長沙奮然以召募易行伍盡廢官兵使儒生領農民各自成營接攻規制今古章式無可放效獨戚繼光書號爲切時用多因所言變通行之未幾湘軍大效而王珍羅澤南胡林翼各撰其軍營制爲書珍自序甚矜詡所作謂不可使賊得然所言世俗之所知也琦善者不以能軍名與雷以誠俱屯揚州城下雷營終夜擊柝燎火治守備琦善營寂然闌靜無火光人聲他日以誠過營琦善微諷之曰公營中甚隘盛以誠不悟徐曰夙夜守設火賊得窺我吾擊刁斗則不聞外聲此危道也李元度之戰士呼譟甚勇席寶田誦孟子書譏之曰先生之號則不可軍中以呼殺爲號子故寶田云云由

此觀之良史兵書所言雷李行之而不免訾於琦善席寶田軍事變化焉可言乎自湘軍衆盛人人知兵新募軍規制一日立就領軍者不必煩條教所謂楚鄂湘軍章程至今將帥皆無其書而淮軍本倣湘軍以興未一年盡改舊制更倣夷軍後之湘軍又更效之水軍之立尤困於思慮船一槳一版位置失宜輒絀礙不可行及後成功率取木輕料薄爲先寇平後無行陣之事乃更改大船制務於闊厚是故今之湘軍非昔也況其將帥昔愚而今驕昔懼而今侈昔憊拙而今諛柔雖復用儒生將農人則所謂儒者不儒而農者不農曾國藩之所爲咨嗟於暮氣者耶軍興名將推塔齊布劉騰鴻李續賓多隆阿而郭嵩燾服羅澤南左宗棠推王珍珍澤南弟子也澤南亡有續賓及珍珍死則張運蘭尢闕沈默卒以敗死然則澤南殆可謂名帥非但名將要其言戰在續賓下遠甚而續賓諸人存則勃焉死則忽焉舊部各將無豪髮之効又況讀其書觀其迹者乎本湘軍所以起爲救額兵之敝也曾國藩首建義旗終成大功未嘗自以爲知兵其所自負獨在教練至今湘軍尊上而知禮畏法而愛民猶可用也觀將能否但於列隊時號三吹軍士肅肅蠶綴而出則勝負可見矣是故兵法不可言而營制不可誣也

凡立營十人爲隊八隊爲哨隊哨有長隊有斯養隊十二人其正制也八隊之械一五擡槍二四六八刀矛三七小槍擡槍遲重則增二人故百六人而成八隊統以哨長哨百七人置哨官領之四哨爲營親兵六隊隊長斯養如哨之制隊十二人六隊之械一三主礮二四六皆刀矛五爲小槍凡七十二人不置哨

長合四哨四百二十八人皆統於營官故曰營五百人而哨營官不數其書記醫匠或有或無營官主之其費於公費取之營之用器哨隊備之其軍器立營時給之壞敝營官修之於公費取之唯鉛彈藥繩帳棚得以時領營官給十帳八夾二單哨官三帳一夾二單親兵隊二帳一夾一單哨隊二帳皆單凡營帳單者八十夾者十八輜重軍裝行糧長夫運之率百人而卅六夫營夫無過百八十亦無得闕不足行而索夫軍有司誅之其當行令三百五十人各備戰器百五十人督長夫護用器前有探馬後有押幫各從其營無有或錯其行率日三四十里黎明而發未哺而息行所至爲壘營官相其地準之以繩從而爲壕壕丈五尺復壕土爲牆厚一丈其崇八尺牆壕容二丈遠其餘土隊爲一棚棚有竈廁廁有外內外廁四之內廁一之火藥有窖以董塗之塗皆孔之其軍市設於繩牆壘外其壘近市則嚴其門禁午夜籍之出入無驗譏而誅之夜號之字營官授之守夜之卒營五十人寇近則百人以更爲班班十人若二十人哨長察之五更咸與朝暮練操以聲響之故行不可速止不可懈行速則病止懈則散軍雖強久頓必荒甯驅市人勿將舊軍屯兵待戰是謂自亂作壕之法外內重設外壕廣六尺深八尺內壕半之環而溝之必有橫涂相距二丈壘牆旣成去其外涂畱其內涂作牆如城其高七尺子牆半之牆厚六尺左右二門出入謹之見敵則併力無事則長夫之役也步行率八刻而行十五里塞日短而行易暑日長其行難以晝四十六刻率之行十六刻而三十里其十六刻以築營壘餘十二刻而後昏暮則神暇形壯可以待敵

故百里而趣利者蹶此軍家之大忌也

初欲立水師湘中不知戰船形制依古法作筏載礮將以截流又欲爲隸艦大艦皆不能旋運曾國藩令做競渡舟設短棹長槳如蚊之足又得廣東船式作快蟹長龍三版三等船未幾水師總兵自登州至主作柁罟大船一戰而敗語在水軍篇其後水軍益利所至克捷雖被礮傷死船餘一二人猶足勝寇然後知水軍萬全過陸軍而用法益得嚴初議避礮依近代兵書法張魚網溼絮牛皮藤牌鉛丸輒洞中之又編竹如細鱗施絮草人髮密覆之鉛丸來勢益猛及戰而楊載福彭玉麟等倡勇敢悉屏盾蓋當礮衝而進於是礮失勢而士氣益勇故凡言畏礮者怯將也不待接戰敗軍而廢之矣曾國藩以懼敵士以慎行軍用將則勝自將則敗楊岳斌鮑超以無懼爲勇以戒慎爲怯自將則勝用將則敗論語曰臨事而懼帥之言也記曰我戰則克將之言也爲將者功名成富貴得則知懼矣知懼必敗水師爲甚彼不勝其懼故也接流爭先小舟爲礮船有三等無三版不行船置一哨官制其進退百船雖退一船可進其輕重則有公船暴風掀波三版必摧則保於大舟大舟不可戰也快蟹長龍以備指揮敗則棄之而以三版歸此江湖水師之恒也戰於海中嶋夷之利耳中國無故而與爭於海非所聞也水軍雖亦有刀盾槍矛無所用精漿柁礮手指臂相使凡三版槳十人柁一人頭篙一人礮手二人礮置船首尾旋而發之礮一發舟一頓則進愈疾矣亦或置礮爲觀美臨敵無所用之長龍槳十六人榜四人餘如三版之數快蟹槳二十

八人榜八人艙長一人頭舵各一人礮手六人凡快蟹長龍船各一三版船八而爲一營營官價之蓋三百八十八人而成營其船人或稍增要本茲制作營之法相距欲疏小船依洲大舟橫流要避暴風無令相撞軍皆守船尤禁登岸其後長江水師章程編於方略大略準此其帆桅篙槳礮隨時修制不可一限三版露載無篷版各施夾帳覆船軍士又私造長龍編爲公船以食以居故軍容唯水師爲壯而應對便辟多逸少勞亦始於水師云

湘軍成馬隊至湖北乃有之恆用北將束以湘營制而多隆阿以此顯初以三百七十八人爲營四人爲棚六棚爲哨後討捻寇更改以三百二十二二人爲營營五哨人各給一馬唯馬夫火棚夫無之又有步隊十人立什長別爲一棚以供襍役營官長夫八公長夫四十營官一員幫辦一員先鋒官五員哨官十員給藍夾帳十四白單帳三每棚白單帳一馬棚帳一凡白單帳六十六藍夾帳十三馬棚七十二長夫八棚白單帳八其馬初從口外買之官價匹銀八兩多病道斃後或隨所至而買補焉歲百馬病斃更易無過卅六餘各令乘者補之又別儲朋馬銀月可百餘兩以備買價其銀出於襍費營官掌之

凡營官一員月給銀二百兩不計官位異軍特起亦不相統或令受他將節制輒不相能非其所置莫能屬也一營則哨官四員日給銀三錢月支銀卅六兩哨長四員日給銀二錢月支二十四兩什長卅二人日給銀一錢六分月支百五十二兩六錢親兵七十二人護勇二十人日給銀一錢五分月支四百十四

兩正勇三百卅六人日給銀一錢四分月支千四百一十一兩二錢火勇卅二人日給銀一錢一分月支百卅八兩六錢長夫百八十八人日給銀一錢月支五百卅兩凡一營月支口糧公費銀二千九百十七兩四錢小護之月日給扣建月給不扣水師之制依此爲準頭篙舵工依哨長船長依什長唯無長夫而哨官倍之故水軍一營月支千九百一十一兩二錢

馬隊依前制營官一員月給銀八十兩哨官月給銀十兩八錢先鋒官月給銀六兩親兵馬兵月給銀四兩八錢步兵什長如親兵之餉步兵月給銀四兩五錢火棚長夫如步軍之制凡馬月支秣豆銀二兩每營馬二百六十八匹凡一營月共支銀二千六百六十三兩八錢凡統將得專置營官營各獻助公費月或百金或二百金至三千人又公加公費銀百兩夫價銀卅兩統五千者倍之統萬人者三之萬人則廿營營助百金并之則月三千金此湘將之廉者也楚軍之制於所統營各置司籍一人則軍闕未補者或竟闕者或除名者餉皆入於其將軍械修補之費不與焉故將五百人則歲入三千統萬人歲入六萬金猶廉將也唯多隆阿統萬人而身無珍裘廉萬之奉家無屋子無衣履其天人平勤所事誠有所不暇也劉長佑軍士輒取足額席費田爭之以爲徒自弱必不能戰所謂廉將者非設於用之足貴也然徒湘軍之制則上下相維將卒親睦各護其長其將死其軍散其將存其軍完豈所謂以利爲義者耶而昧者徒取戰勝不用文備則冒死之將汨廉捐恥日趨於亂

終

籌餉篇第十六

馮唐有言趙將李牧之居邊也軍市之租皆自用饗士選車千三百乘穀駝萬三千百金之士十萬古之用兵其費至鉅也然以趙國區區李牧偏郡仰給市租不聞匱乏未有行軍而乏輿擁衆而憂饑者也明代則不然平時征賦半以養兵四海之富歲入裁二千餘萬十年之通餘不過一年之入郡縣府庫例不存儲大農春秋二撥或往往告匱至於軍興田賦不播糧關稅無登而振卹供給絲費相踵勸捐輸議假貸欲以一二貴戚大臣之私財贍天下之用計拙情緇始議加賦吏威不行漏卮不塞俗儒迂生紛咎其上

聖清鑒其敝二百餘載堅持不加賦之義兆民曉然潛息汪濊利原沮閉咸懷仁義然值有兵革非常之災連年彙歲之絀傾帑不足以供費則計臣束手矣洪寇之興始由部籌餉撥軍者六百餘萬其後困竭則以空文指撥久之空無可指諸將帥亦知其無益乃各自爲計其計有二捐輸釐金是也二者皆起於戰國秦漢之時而捐輸爲最拙又流敝滋大害於風俗胡林翼之言曰今之言兵者喜團練言餉者急捐輸及大錢鈔票樂其不費而取利也上苟持一無本取利之心則政事墮敗令甫下而民窺之矣捐輸之所行必避富貴權勢之家曾國藩初治湘軍慨然欲抑豪強摧并兼令故總督陶澍家倡輸萬金以率先鄉人澍子懋於巡撫籍其田產文券送藩司官士大譁遂以得免其後湖南布政使李榕倡言米捐當先



大戶是時曾國荃號有百頃田於法當上戶榕不能問也而京朝流言卒以敗榕故凡捐輸徒以虐良善肥不肖行之愈久愈不效乃通計天下歲得不出二十萬金

朝廷毅然知其害政於是遂罷然自咸豐元年以來盛衰相參所輸銀亦以千萬數捐輸得官者猶少於軍功保薦十分之三而其材智吏事或愈於正途牧令太守故夫以捐輸爲害政是也或以爲潛謀吏治亦未必然也刑部侍郎雷以誠治軍揚州用錢江謀奏推商稅關稅正則本千而取三十推之慶肆則入千而取十謂之釐金言金取一釐也釐金雖始於揚州然無所得曾國藩克武昌下九江乃令胡大任何玉葵孫謀於漢口行之姦民訴之總督下檄名捕大任等大任者禮部主事故國藩亦移咨楊需爭之需不得已委過藩司未幾武昌漢口復陷而湖南釐局興矣郭嵩燾尤喜言釐金始倡用士人使其弟佐總局而府縣釐局皆舉貢生童商民便之院司雖或委員總成列銜而已其後羣官稍資以給食又其後而陸增祥總省局始委權官員諸舉貢生童亦皆以保薦得官彬彬乎衣冠簿書有上下等威而釐稅益絀布政使吳元炳涂宗瀛盡革浮費鎔油茶葉各令自辦歲亦省千餘金然湖南釐稅初年歲百卅萬至增祥元炳時歲裁卅萬江西貨饒地廣初倚以供軍而數當兵衝不能遠逾湖南軍實之所由充始自湖北關於上海皆取給於釐稅所謂軍市之租者耶湖北釐稅川鹽爲大始承平時淮引正課不逾三十萬猶日訴引滯通稅歲積寇據江南鹽運阻塞川鹽方舟並下乃設局沙市試推其稅因資羨餘以充官用歲

益銀至百餘萬時湖南亦食粵私院司欲準湖北例範之不能效也然亦歲推銀三四十萬咸豐七年  
乘章用左宗棠議首減湘潭浮折漕糧定軍需公費先私取十五者率改爲公取一藩司以下大譴時湖  
南阻亂事專於巡撫乘章決行之遂通改漕章歲增銀廿餘萬民乃得減賦數百萬武昌既復林翼復效  
行之及曾國藩在江西亦效行之湖北江西賦倍從湖南故增銀亦多然民未甚得其惠其後乘章督四  
川設夫馬局津帖捐輸乃更爲敝治非獨務本難也逐末競利猶待人而興然以此益知軍興不乏財而  
將士愈饒樂爭求從軍每破寇所鹵獲金幣珍貨不可勝計復蘇州時主將所斥賣廢錫器至二十萬斤  
他率以萬萬數能戰之軍未有待餉者也湘軍初起時水師大將從南海新來嘗設宴議用錢二萬猶吝  
嗟以爲巨費其時江南糧臺委員自蘇至甯公館八所帷帳姬妾不徙而具徒以坐潰而湘軍起貧苦同  
餓餓轉戰五千里餉皆自釐金給之雖復頻奏徵餉四川廣東率爲其督撫所持所望十不償一二獨劉  
蓉蔣益澧本起蜀桂監司得總督協濟及其後蓉在陝西蜀餉不復應益澧入浙頻勝餉源自陞至平捻  
時京朝官至湘淮軍中各以私情餽遺動釀萬金孔子曰國不患貧寡富哉言乎觀帥能否於籌餉知之  
矣五口通商中國歲入銀七百萬加以貨釐鹽稅又率千萬而軍籍官用度支省減藩庫扣停者亦千萬  
故國富莫若今日計者不綜大端徇胥吏之虛詞輒曰財支訕用浩緜利孔弗一漏卮弗塞無事而屯軍  
舍本而逐末船廠無益之費盡糜所入未爲知籌也湘軍於餉艱難其後人人足於財十萬以上貨殆百

數當領未發之餉輒公輸縣官計銀動數十萬念前茲過計拙謀故述其略爲籌餉篇而其所取發奏咨之文皆不論載方釐金之興也雖津邏訶索固不敢問達官朝使舟然諸貴宦家人姻戚僕從多被護留不能公漏私言事者輒以病商害民爲詞交章請罷征曾國藩初授江督軍餉無出黃冕始建議增湖南釐稅十之三號爲東餉專供曾軍議初上駱秉章援蜀去文格代爲巡撫雅不善曾胡國藩恐己力不足令之手替冕履後曰徒結怨於新撫事定不行而黃冕裕麟等業建議卽不待報設局增稅曾文格翟誥相繼罷免毛鴻賓爲巡撫憚世臨繼之皆新進倚國藩自重而冕等所用權稅者亦堅悍無所顧畏或姦人聚衆毀局毆主者輒以毆船及營兵往助復設之牧令爭佐捕治商賈納稅恐後竟以濟師同治二年國藩徵餉江西九江關道蔡錦青分稅課以應乃報巡撫沈葆楨大怒設詞詆錦青國藩不能堪二人騰章相詆俱自劾求罷 朝廷爲發上海稅銀三十萬供曾軍以和解之明年克江甯首疏奏免湖南東餉諸釐局亦頻奉 詔裁減然論者不已於後左宗棠治西師有意加稅做東餉巡撫置不應其事亦罷然各省釐稅贍軍坐甲不用稅亦日絀而相承莫肯能與初權時意異矣

終